



150.5- Mohawk
Pew

GUACANAGARI	PONTIAC	BLACK HAWK
MONTEZUMA	CAPTAIN PIPE	KEOKUK
GUATIMOTZIN	LOGAN	SACAGAWEA
POWHATAN	CORNPLANTER	BENITO JUAREZ
POCAHONTAS	JOSEPH BRANT	MANGUS
SAMOSSET	RED JACKET	COLORADAS
MASSASOIT	LITTLE TURTLE	LITTLE CROW
KING PHILIP	TECUMSEH	SITTING BULL
UNCAS	OSCEOLA	CHIEF JOSEPH
TEDYUSKUNG	SEQUOYA	GERONIMO
	SHABONEE	



TO PERPETUATE THE HISTORY
AND DEVELOPMENT OF THE
PEOPLE REPRESENTED BY THE
ABOVE CHIEFS AND WISE MEN
THIS COLLECTION HAS BEEN
GATHERED BY THEIR FRIEND
EDWARD EVERETT AYER

AND PRESENTED BY HIM
TO
THE NEWBERRY LIBRARY
1911

421

M 814

B408 mat

1836

(R)

NE RAORIHWADOGENHTI

NE

SHONGWAYANER YESUS KERISTUS,

JINIHORIHOTEN NE

ROYATADOGENHTI MATTHEW,

KANYENGHAGA KAWEANONDAHKON KENWENDESHON

TEHAWEANATENYOU

ONI SHOGWATAGWEN

NE J. A. WILKES, JR., OHSWEGON KAIHONHATATYE, U. C.

NEW-YORK:

PUBLISHED BY THE YOUNG MEN'S BIBLE
SOCIETY OF NEW-YORK,
AUXILIARY TO THE BIBLE SOCIETY OF THE
METHODIST EPISCOPAL CHURCH.

Howe & Bates, Printers.

1836.

THE GOSPEL
OF OUR
LORD AND SAVIOUR JESUS CHRIST

ACCORDING TO
SAINT MATTHEW,

TRANSLATED INTO THE MOHAWK LANGUAGE

BY A. HILL,

AND CORRECTED BY

J. A. WILKES, JR., GRAND RIVER, U. C.

NEW-YORK:

PUBLISHED BY THE YOUNG MEN'S BIBLE
SOCIETY OF NEW-YORK,
AUXILIARY TO THE BIBLE SOCIETY OF THE
METHODIST EPISCOPAL CHURCH.

Howe & Bates, Printers.

1836.

NE NE KAHYATONHSERADOGENHTI

JINIYAWEAONH NE

ROYATADOGENHTI MATTHEW ROHYATON.

CHAP. I.

Ne watrorih jitagahnegwahs-adatye ne Keristus.

NE kahyatonhsera ne ne jikahnegwahs-adatye ne
Yesus Keristus, ne royen-ah ne Dawed, ne royen-ah
ne Agwerent.

2 ¶ Agwerent yeshoyen-ah *Isaac*; oni *Isaac* yesho-
yen-ah ne *Jacob*; oni *Jacob* yeshoyen-ah *Judas* oni ye-
seshagononhkwe;

3 Neoni *Judas* yeshoyen-ah *Phares* oni *Zara* ne
Thamar-haga; oni *Phares* yeshoyen-ah *Esrom*; oni *Es-
rom* yeshoyen-ah *Aram*;

5 Neoni *Aram* yeshoyen-ah *Aminadab*; ony *Amina-
dab* yeshoyen-ah *Naasson*; oni *Naasson* yeshoyen-ah
Salmon;

5 Neoni *Salmon* yeshoyen-ah *Booz* ne Rachab-haga;
oni *Booz* yeshoyen-ah *Obed* ne Ruth-haga; oni *Obed*
yeshoyen-ah *Jesse*;

6 Neoni *Jesse* yeshoyen-ah Dawed ne Korahkowah;
oni Dawed ne Korahkowah yeshoyen-ah *Solomon* ne ro-
nadeweton ne aonha ne ronehkwe ne *Urias*;

7 Neoni *Solomon* yeshoyen-ah *Roboam*; oni *Roboam*
yeshoyen-ah *Abia*; oni *Abia* yeshoyen-ah *Asa*;

8 Neoni *Asa* yeshoyen-ah *Josaphat*; oni *Josaphat*;
yeshoyen-ah *Joram*; oni *Joram* yeshoyen-ah *Ozias*;

9 Neoni *Ozias* yeshoyen-ah *Joatham*; oni *Joatham*
yeshoyen-ah *Achaz*; oni *Achaz* yeshoyen-ah *Ezekias*;

10 Neoni *Ezekias* yeshoyen-ah *Manasses*; oni *Manas-
ses* yeshoyen-ah *Amon*; oni *Amon* yeshoyen-ah *Josias*;

11 Neoni *Josias* yeshoyen-ah *Jechonias* oni ne shago-
nonhkw e, ethone ehnidyaweaonh shahonwadiyahawe
Babylon;



12 Ne ethone ohnagengeh nen shiyahonwadiyathewe *Babylon*, *Jechonias* yeshoyen-ah *Salathiel*; oni *Salathiel* yeshoyen-ah *Zorobabel*;

13 Neoni *Zorobabel* yeshoyen-ah *Abiud*; oni *Abiud* yeshoyen-ah *Eliakim*; oni *Eliakim* yeshoyen-ah *Azor*;

14 Neoni *Azor* yeshoyen-ah *Sadoc*; oni *Sadoc* yeshoyen-ah *Achim*; oni *Achim* yeshoyen-ah *Eliud*;

15 Neoni *Eliud* yeshoyen-ah *Eleazor*; oni *Eleazor* yeshoyen-ah *Matthan*; oni *Matthan* yeshoyen-ah *Jacob*;

16 Neoni *Jacob* yeshoyen-ah *Joseph* ne rone ne *Mary*, ehnonweh nihonageraton ne *Yesus*, ne ronwayats **KE-RISTUS**.

17 Ne agwegon jitagahnegwahsadaye tyodahsawe Agwerent jiniyore Dawed kea-niyoht kayeri-yawenre nikahnegwahsageh; ehtedyodahsawe Dawed jiniyagahewe shiyaondadyathewe *Babylon* jinigon kayeri-yawenre nikahnegwahsageh; nen eren shonsahonwadiya-tenhawihte ehnonweh *Babylon* yahonnewe Keristus-neh kea-nigon kayeri-yawenre nikahnegwahsageh.

18 ¶ Nonwa rotonnih *Yesus* Keristus ne naah jiniyaweaonh: ne ronistenha *Mary* ne rodirihwisson ne *Joseph*, arekho tehodinyagon, waganeronne tayeyenhtahkwe Ronighriyohstonne.

19 Ethone *Joseph* aonha rone, igen roderihwagwarihsyon, oni yahterehre agerihowanahte agarihonni atehenhsera, agwah irehre skenen-ah engyatondi.

20 Neoni ebniyoht negen rennonhtonyon, sadkaht-hoh, ne raoronhyagehronon ne Royaner wagagwatho raoserenhtagon, wagenron, *Joseph*, royen-ah Dawed, tohsa tesadonharenronh ne taejateranegen ne *Mary* teseniteron: igen ne nahoten aonhateragon yeyadat ne ne Ronighriyohstonne tyoyenhtahkon.

21 Neoni wadewetonne royen-ah, oni enhtsenatonh-kwe **YESUS**; igen ensehshagoyatago ne raongweta jiniyagorihwaneren.

22 (Neoni kengayen agwegon etho niyaweaonh, ne wahonni yegayerihsera jinahoten ne *prophet* rodatih Royanerhne, wahrenron,

23 Sadkahthoh, yahte-kanahkwayenterih kaneron-sere, ne oni shayadat ronwayen wadewetonhsere, neoni enhonwanatonhkwe raohseana EMMANUEL, ne nahoten tekaweanatennyon, Niyoh hitewese.)

24 Ethone *Joseph* nen wahaye ji rotas ehnaHayere jiniyoht ne raoronhyagehronon ne Royaner jinihaweanih, oni tehniteron wat'ateranegen:

25 Neoni yah-tehayenterhaonh jinahe onen shonwadeweton tyotyerenhton royen-ah: neoni wahonatonhkwe raohseana YESUS.

CHAP. II.

Ne ne ronttokhaskwe jitkarahkwinegense tahonnehte, ojistohk wahodinationhahse ka-nonweh ne Keristus nahatonni.

ETHOHKEH nonwa Yesus onen rotonnih ehnonweh *Bethlehem* ne *Judea*, shihodehniseratennyonhkwe ne *Herod* ne korahkowah, sadkahthoh, rodinigonh-rowanenhse jitkarahkwinegense nonkadih tahadiyentahkwe wahonnewe *Jerusalem*.

2 Wahoniron, ka nihenteron ne rotonnih Korahkowah ne Jews-haga? igen waagwadkahthoh ne raojistohk jitkarahkwinegense, neoni waagwawe ne wahonni ne ahshagweanidenhtase.

3 Ne *Herod* korahkowah onwa onen rothonde *ken* igen *jinikarihotense*, wathodonharenronh, oni radigwegon ne *Jerusalem*.

4 Neoni ne onen wahshagotkeanisaachte agwegon ne ronweaneanagerahton shagodirihonyeanih neoni ne shagodihyatonse nongwehogan, wahshagorihwanonton ka nit-karihwisson ne ehnonweh enhotonnih ne Keristus.

5 Neoni wahonwenhahse raonha, waairon jinonweh *Bethlehem* ne *Judea*; igen kea-niyoht jikahyaton ne prophetneh,

6 Neoni ise *Bethlehem*, yonhwenjade *Juda*, yah sonhaah tegenh kea-nihsaah yesewagwegon ne yekowanenhse ne *Juda*: igen isegeh enthayenhtahkwe ne Rayatagweniyoh, ne enhshagotsteriste nagongweda Iserathaga.

7 Ethohkeh *Herod*, ne onenh skenen-ah yahshagonke ne rodinigonhrowanenhse, washagorihwanondonse jinahe tyoronradihronne ne ojistohk.

8 Neoni wahshagonhane wahrenron Sewahtenti *Bethlehem* ne, neoni agwah sewesak ne rakshaah; oni nensewatshenri raonha enskwahrerih, wahonni ehyaagewe iih oni ahiyeenidenhtase.

9 Ne onen ronwathonde ne korahkowah, wahnontenti; oni, sadkahthoh, n'ojistohk, ne rontkahthohskwe jitarahkwinegense, ohenton onhtenti, oni yahahonwe neoni watkatane teyotogenhton jinonweh ni kayen ne rakshaah.

10 Ne onwa shahontkahthoh n'ojistohk, wahondonharen ne yonehragwaht kowanen adonharahk.

11 Neoni ne onen ronadaweyaton kanonhsagon, wahontkahtho ne rakshaah neoni *Mary* ne ronistenhah, oni agwah wathontragwenhtarho, wahnweanidenhtase; neoni jinihodiyeen wahadinondekshi, ronwawihe; ojinegwar karistanoron, neoni kahnehtagon, oni kanerahtiyoh.

12 Neoni Niyoh wahshagotogaten wahshagaweyen ne oserenhtagon ne yahtha-thonsahonhkete Herod-neh, thiyohahade jiniyonsahonne raonadonhwenjageh.

13 ¶ Ethohkeh onwa onen jiwahonhtenti, sadkahthoh, ne raoronhyagehronon ne Royaner wahodyadatatshe *Joseph* kaserenhtagon, wahrenron, Satketskoh, oni yahashawh ne rakshaah neoni ne ronistenhah, oni sategoh *Egypt* niyahase, neoni etho jiterondak jiniyore enhskon-yenhahse: igen ne *Herod* enhoyatisake ne rakshaah ne wahonni roryohsere.

14 Ethohkeh wahatketsko, wahoyatenhawe ne rakshaah oni ne ronistenhah ahsontheane, oni wahahtenti *Egypt* nonkadih:

15 Neoni etho nahhe yehenteron jinahrenheye ne *Herod*: ne wahonni agwah togenhske watonhsere ne nahoten rodatih ne *prophet*, ne Royanerhne wahrenron, *Egypt*-neh wahironhyenhare ne iyen-ah.

16 Ethohkeh *Herod*, shahadkahtho ne rodinigonhrowanenhse ronwanigonrhateani, ethone agwah wahunakhwen, neoni odyake shagonhaonh, ne wahshagodiryo agwegon ne exhaagon-ah ne *Bethlehem*, neoni ok-thate-yohkwatasetonh jiradinagere, ne teyohserageh jiniyagaskwe odyake senha niyagasa, ji agwah shagorihwanegeanih ne rodinigonhrowanenhse katkeh ni-hotonnih ne rakshaah.

17 Ethone tagarihwayerine ehnaaweane jinihoḍadihne netho *Jeremy* ne *prophet*, jinihawen.

18 Etho nonweh *Rama* oweana waonronke, yagonigonhraxhense, yontstaranih, oni kowanen teyonshenthohseron, *Rachel* tewahshenthohs aoriwa ne agoyen-ogonah, neoni yahtewehre ayongweyen, igen yah kanega teyense.

19 Ethone onen shihawenheyonne ne *Herod*, sadkahthoh, raoronhyagehronon ne Royaner wahodyadatatshe *Joseph* ne kaserenhtagon ne *Egypt* nonweh.

20 Wahrenron, satketskoh, ehtsyatenhawh ne rakshaah oni ronistenhah, isegeh, oni yasahtenti raodonhwenjageh ne Iseratt: igen ronenhayon ne ronesaxkwe ne raodonhsets ne rakshaah.

21 Ethohkeh wahatketskoh, wahoyatenhawh ne rakshaah oni ronistenhah, neoni yaharawe raodonhwenjageh ne Iseratt.

22 Ne ok saharonke ne *Archelaus* ronwagowanahton, *Judea* jithonakte ne ronihah *Herod*, wahohteronne netho niyahare: ok ne Niyoh wahotogaten ne oserenhtagon, ne wathonni akte wahahtenti *Galilee* nonkadiah:

23 Neoni yaharawe ehwaheanagerate jikanatayen konwayats *Nazareth*: ne wathonni agwah togenhske watonhsere ne nahoten rondadihne ne prophet-hogon, Enhonwanatonhkwe Nazarene-haga.

CHAP. III.

John roderihwahnoton ne shagohnegoserahs; rohnegoserhon ne *Keristus* kaihhoqhagon *Jordan*.

ETHONE shiwehniseratennyonhkwe warawe *John* shagohnegoserahs, roderihwahnotondyese karhagon ne *Judea*,

2 Neoni ratonne, sasewadatrewaht: igen ne aoyanert-sera ne karonhyageh kea ok etho.

3 Asagenh raonha negea-enh thoigen rodadihne ne prophet *Esaias*, ratonne, Tayeweanotatye ne karhagon, Senigwatago jinontahawenonhatye ne Royaner, senitawarihsi ne rohaha-ogen.

4 Oni ne shahayadat *John* ne ne raonena *Camel* aononhwerhon, oni ohnah tehodyagwaranhaston; oni jinahoten iraks kwenyoh neoni ji-iks oshes.

5 Nen tenhnon ehwahonnehte raonhageh *Jerusalem*, agwegon oni ne *Judea*, oni agwegon yenagerenyon thateyhkwataseton ne *Jordan*,

6 Neoni ethone wahontnegoserahwe raonhageh etho *Jordan*, oni ene-wahononni ne raodirihwaneraakshera.

7 ¶ Nok nen shahadkahtoh eso radi ehwahonnewe jinonwe nihshagohnegoserahs, wahshagawenhahse rononha, O sewahnegwahsate ne kenhnyaraxhen, onhka yetshirihwadatih ne aesewatego ne kanakhwenhsera ne tawe?

8 Karo kasenihawh jinikaystenhserotense ne shategena ne jondatrewahtha:

9 Neoni tohsa sewennononhtonyon nahesewenron ne jonhatseragon, yongwayen ne Agwerent ne shongwanihah: igen lih wagwenhahse ne Niyoh enhagweni ne ken igen kanenyageron ahshagogetskwahte exha-ogon-ah jinonkadih Agwerent.

10 Neoni nonwa n'atogan ehkayen ohtehrageh ne karonta-ogon: ne engarihonni niyadekarontageh ne yahtewahyanyontha ne wahiyose engayagon, oni ojistageh yeayagoti.

11 Lih togenhske gwaserahs ohnekanohs ne naonsayondatrewahte: nok raonha ne tare ohnagen rageshatstenhserageanyon niih, ne ne raohta yah ne shateyagena ne taagehkwe: ne ne raonh enhtshisewahnegos erahwe ne Ronigonhriyohston engene n'ojire:

12 Kaweyah oni rahawe ne rasnongeh, ken nenhayere enhronhewanyon raohswengarageh, enharoroke ne rawcanekeri ehayenhayen jikayendakhwa; nok enhatshahte ne oshewohtshera enrate ne yahtewaswahs n'ojire,

13 ¶ Ethone Yesus tontahayenhtahkwe *Galilee* ken ware *Jordan* ji hitrese *John*, ne nahohnegoserahwe ne raonha.

14 Nok *John* wahorihwahsten, wahrenron, lih tenhnon teyotonhwenjohon n'asknegoserahwe, lihne kadi genh nondahse?

15 Neoni Yesus saharihwaserago oni wahawenhahse, asehre eh nissa niyawen nonwa: igen keaniyawenhshere n'ayotkonyenhsthageh n'ongenonha hendeninahne agwe-gon ne aderihwagwarihsyonsersa. Ethone kadi waha-thondate.

16 Neoni ne Yesus, ne onen shahatnegoserahwe, yansahanonaran yogondatyeh jisahatogo, oni, sadkahthoh, ondenhotongo jitkaronhyade raonhageh, oni wahadkahthoh ne raonigonhriyohston ne Niyoh tondasennte jiniyoht ne Oride-kowah, oni raonhageh onnitskwaren:

17 Neoni, sadkahthoh, agoweana kas-onhyagon nontawe, yonton, ne ne gea-enh rinoronhkhwa Iyen-ah, ne raonhageh agwah wageryentiyohs.

CHAP. IV.

Keristus rawendondyehton oni okthihonwadendoryaton.

NETHONE jinaawen Yesus yehonwahsharinonh enegen ne ne Kanigonra ne nontahaweronhatyense ne onehsonhronon.

2 Neoni ne onen shihawendondyehton kayeri niwehniserahshen kayeri oni niwahsondahshen, raonha ohnagengeh nen wahatonhkaryake.

3 Neoni ne ethone ehwarawe ne okthenhoyeron raonhageh, wahrenron, Tokat nongenh ise ne Niyoh ronwayen, to-senhahs ken-igen kanenyageron kanatarohk watonh.

4 Nok saharihwaserago wahrenron, Kahyaton wahhi, rongweh yahne-ok thahronhehkwen kanatarohk yadekayatih, nok niyadeweanageh tkayagense ne rahsagonh ne Niyoh.

5 Ethone n'onehsonhronon enegen niyahoyatenhawe ne onatadogenhtigeh, oni ehyahotskwaren agwah enegen kanonhsoharageh n'ononhs-adogenhti-kowah,

6 Neoni wahawenhahse, Tokat nongenh ise ne Niyoh ronwayen, yasadyadenht: igen kahyatonh, Enhshagorihon raoronhyagehronon ne engarihonni nise; ne ne kondihsnongeh tenyesahwenharago, ne ten-ens ji ok nonweh tengarine ne sahsigeh otstehrageh engayenhte.

7 Yesus tontahadatih raonhageh, Kahyaton wahhi shegon, Tohsa othenonahtsyeron ne Royaner sa-Niyoh.

8 Shegon are, n'onehsonhronon kea-niyahoyatenhawe jinonweh ne aonhaah enegenh yonontes, oni wahonatonhahse agwegon jinikayanertserotense jiniyonhwenja, oni aonadonwesenhtsera;

9 Neoni wahawenhahse raonha, Iih engonyon agwegon jiniyotyerenh, ne tokaehtageh ahsadyatondi nok honi ahskwenanidenhten iih.

10 Ethone wahrenhahse ne Yesus, Eren seht *Satan*: igen wahhi kahyaton watonh, Ehtserihwanegen ne Royaner sa-Niyoh, raonhaahoh ok enhtsyotenhs.

11 Ethone n'onehsonhronon sahoyatonti, oni, sadkahthoh, kondironhyagehronon wagonnewe wathonwahsnyene raonha.

12 ¶ Nonwa ethone Yesus waharonke ne *John* nen ronwayatinyonten jiyondadenhotonhkwa, wahahtenti warehte *Galilee*;

13 Neoni yahadohetste *Nazareth*, yaharawe ehyaheanagerate *Capernaum*, igen kanyatarakta nonkadihkon, enegeraaserakta, ne *Zabulon* oni *Nephthalim*:

14 Ne wahonni yagarihwayerine jinihodatih ne *Esaias* royatadogenhtigenha, ne rawen,

15 Jiyonhwenjade ne *Zabulon*, oni Jiyonhwenjade ne *Nephthalim*, ehnonkadih kanyatarakta, isi nonkadih ne *Jordan*, ne naah *Galilee* raononhwenjageh ne *Gentiles*;

16 Ne ronongwehohon anyoht tyogarahs ji iyense wahadigen kadi kowanen teyohswathe; neoni rononhageh ne ehraditeron jinonweh yaweht yodahsatare ne kenheyon nen yoderihwagetskwen ne teyohswathe.

17 ¶ Ethone tyodahsawe ne Yesus onen roderihwahnoton, ne ne raton, Jadatrewaht: igen ne kayanertsera ne karonhyageh ken ok etho.

18 ¶ Neoni Yesus, ire kanyataraktatye ne *Galilee*, washagogen yadadenonhkwe, *Simon* ronwanatonhkwa Gwiter, oni *Andrew* yadategen-ah, yadenyerohs: igen ne ne nijagwas nihyatyerha.

19 Neoni wahshagawenhahse Itweh, engenihiiron nenyetshijagwase ne ongweh.

20 Neoni yogondatye wahonadi ne raonahare, nok wahnwahnonteratyeh.

21 Onen wahnhtenti, nare oya wahshagogen tehni-ahshe yadadenonhkwe, *James* ne royen-ah ne *Zebedee*, oni *John* yadategen-ah, kahonweyagowahne radiyadit ne *Zebedee* ne ronwanihah, shodinikhon ne ahare; oni yahshagononke rononha.

22 Neoni oksha-ok wahyahtkawe ne kahonweyah oni ronwanihah, oni yahnwahnonteratyeh.

23 ¶ Neoni Yesus yathatawenri agwegon ne *Galilee*, wahshagorihonyen raodinonhsadogenhtigeh, oni wahshagoderihwahnotonse orihwadogenhti oni kayanerseragon, wahshagojonte oni niyadekanhrageh yagononhwaktanyonni jiok niyagoyatawenhse.

24 Neoni wadewaderihwareni jiniyenagerahsera ne *Syria*: agwegon ehwaondadyathewe raonhageh ne yagononhwaktanyonni odyake ne ne agwah karonhyagenhserakshen, yagotyeani n'onehsonhronon, odyake ne ne yagononhratkenhse, odyake yawenheyon ne yeyerongeh; ne agwegon sahshagojonte.

25 Neoni wahnwahsere agwah kentyohkowanen nongwehogon ne ne *Galilee*, nityagawenonh oni odyake *Decapolis*, odyake *Jerusalem*, odyake *Judea*, odyake isi nonkadiah ne *Jordan*.

CHAP. V.

Keristus wahadashawen wadehshagorihwatheten onotoharageh:

NEONI wahshagotkahtho kanenhrowanen, wathatane onotoharageh: neoni ne nenwahatyen, wahnnewe ne raotyohkwa raonhageh:

2 Neoni rahsene wahanhotongo, wahshagohironyen, wahrenon,

3 Yagodahskats ne yeyesahse ne kanigonhrageh: igen agowenhk ne kayanertseragon ne karonhyageh.

4 Yagodahskats ne yagonigonranenhse; igen rononha ronwadihrejaronne.

5 Yagodahskats ne yagonigonhranetskha: igen ronwadiragweanire nonhwenja.

6 Yagodahskats ne yontonhkaryaks ony yagonyatat-hense ne wahonni aderihwarisyonhsera: igen ronah-tasere.

7 Yagodahskats ne yagonitenrehskon: igen ronwadi-tenrane.

8 Yagodahskats ne yahothernon teyore nagaweryaneh: igen ronwatkahthohsere ne Niyoh.

9 Yagodahskats ne skeanen thiyense: igen Niyoh shagoyeaogon-ah yondadenatonne.

10 Yagodahskats ne ronwadihrewahtha wahonni ad-erihwagwarihsyonhsera: igen agowenhk ne kayanertse-ragon ne karonhyageh.

11 Sewadahskats ne ise, neonen ne ongwehohon enyesahswenhsegeh, oni enyetshihrewahte oni onowen agwegon yotaxhen yesadadyase, ne wahonni iih agerihonyat.

12 Sewadonharak, agwah eso sewadonharak: igen enyetshiyeritshe kowanen ne karonhyagon: igen shate-ghot shagodihnonteratyeskwe prophet-hogon sewahenton.

13 ¶ Ise ne sewahyojis ne onhwenja: nok tokat en-waderagewe ne teyohyojis, ka naontawehte naonsayoy-neren? yahothernon thaonsayontste, ne wahonni atste yeayagoti, oni tenyonhskwaserongo nongwehohon.

14 Jonhha ne aohswatheta n'onhwenja. Wahhi genh, skanatat onontoharageh yah wahhi thaondahsehte.

15 Yah oni ne ongweh thayontegate ohogata, nok kanahkogon ayeyen, nok ken-enyehnyoten jiyehogato-tahkwa; neoni entkahswathete agwegon ne kanonhsa-gon yeteron.

16 Kea-nayawen ne sahswatheta awenehake ohenton n'ongwehohon, ne agarihonni ayontkahthoh ne sayoten-hseriyose, neoni ahonwanenton ne Yanihha ne karonhy-ageh thenteron.

17 Tohsa serhek kenh wagewe nagerihsi ne ahtyaw-enrahtsera, netea-ens ne prophet-hogon; Yah kenh tagehte nagerihsi nok tenhnon engyerite.

18 Igen agwah wagwenhahse, Jiniyore karonya oni onhwenja enwadohetste, yahtenji ne niyori-hwaah thaon-dohetste ne ahtyaw-enrahtseragon, ok naah agwegon eh-nenyaweane.

19 Onhka kiok kadi enhskat ne ken-igen tayerihwa-rihte jinikariwageh ne oyeri weanah, oni enyondaderihonyen nongweh n'ehnayeyere, enhonwanatonhkwe raon-haah nihraah ne kayanertseragon ne karonhyageh: nok onhka kiok ehnenyeyere, oni enyondaderihonyen jinikariwageh ne shagat enyondadenaton yekowanen ne kayanertseragon ne karonhyageh.

20 Igen wagwenhahse, Ne ne sewaderihwagwarihsyonhsera tokat yahthaondohetste ne raonaderihwagwarihsyonhsera ne *scribes* oni ne *Pharisees*, yahteyaweht aesewadaweyate ne kayanertseragon ne karonhyageh.

21 Sewathondehkwe ne nahoten yondadeani nagokstengen-haorihwagayon, Tohsa sheryo; oni onhka kiok enyondaderiyo yotteronhk jinenhoyatawen kajenhayenhtseragon;

22 Nok lih wagwenhahse, ken-igen onhka kiok enhonagwase ne yatadegen-ah ne yahte-honhigon othenon yotteronhk jinenhoyatawen kajenhayenhtseragon: neoni onhka ok enhawenhahse ne yatadegen-ah, *Raca*, yotteronhk jinenhoyatawen jirodijenhayen: nok onhka kiok enhawenhahse, Senteh, ehnonweh niyotteronhk jiyotekha n'onehshon.

23 Ne kadi wahonni tokat endeshawe n'adatawi etho Altar-neh, neoni enhsehyahrake ne jatadegen-ah othenon ehtsenigonhrakshatha;

24 Kayendak ne saneyonhkwa ohenton ne Altar, oni yasahtenti; tonsajadaderihwiyohten entewatyerenhte, jatadegen-ah, oni onen karo kaseht sahtkawah ne shawe.

25 Oksa ok, sasanigonhriyon ne tehsadatswenhse jinaheshagon ohahageh isenese; onwa ka ok non-nagenhatye ne yahswenhse enhyayatenhawe jinonka enyesayatorehte, oni ne shagoyatorehtha ahyana-hskonni shagoyenahs ahonhan'e, oni ayesayatondi jiyondadenhotonh kwa.

26 Agwah wagonyenhahse, yahthaonton n'aonsahsy-agcane nethoh, jinenwe skaristat ensatkarotage.

27 Sewathondehkwe ne nahoten yondadeani nagoksten genha orihwagayon, Tohsa kanahkwa ahserihwanerake.

28 Ok Iih wagwenhahse, Onhka agonhehtyen enyondadadkahthoh ne wahonni shateyoht enyenosha oksaokrorihwanera-agon ne raweryahsagon.

29 Oni tokat jiseweyendehtahkon skahtegheh ensarihwanera akten, kastahgwat, isi yasati: igen neyoyanere jisadonterese, oni aonton ne yahten agwegon jerongeh onehshon thiyayagoti.

30 Oni agenhake jiseweyendehtahkon sesnongeh engarihwanerake, jaak, isi yas-ati: igen neyoyanere jisadonterese: oni aonton yahten agwegon jerongeh onehshori yayagoti.

31 Ken oni yagawen, onhka kiok enhayatonti tehni-teron, ken nenhayere enhawen kahyatonha sera tenyondekhahsyate:

32 Nok Iih wagwenhasse, Onhka kiok enhayatonti ne rone, oya engarrihonni ne ok ne kanahkwa engarihwanerake ne wahronnissa aonha oni wagarihwanerake kanahkwa: neoni onhka kiok enhonyage aonha ne yondadyatontyon wahnirihwanerake kanahkwa.

33 Shegon oya, sewathondehkwe jinahoten yagawen wahninise, Tohsa tondaserihonnekjinisadatih ne saweanahniron, nok tokat saweanahniron tohsa oya agwah nok enhskat ne Royanerhne:

34 Nok Iih wagwenhassee, Tohsa sadatih ne saweanahniron; tohsa oni senhhas ne karonhyageh; igen Niyoh raodeanoshengeh jitkanaktanoron:

35 Nok oni nonhwenjageh; tohsa senhhas igen raonha tehorahsitagenserahkwen: yah oni *Jerusalem*; igen ne ehkanatayen ne Korahkawah rakowanen.

36 Ne tea-ens ne sanonjineh aheseewanahniron, ahsadatih ahsenhahse yahtense thaskweni skanonhkwiserat ahseragenhiste netea-ens ahshonjihste.

37 Nok sadewanagwarihsyonhak nise, etho, etho; yahten, yahten: igen wahhi nahoten ne senha isi nonweh ne ken igen, karihwaneraakseragon tyoyenhtahkon.

38 Sathondehkwe ne yagawen, skagarat yatengene nogara, oni skanawirat yatengene nonawi:

39 Nok Iih wagwenhasse, Tohsa kaserihwahsnyese ne wahetken: nok onhka kiok jiseweyendehtahkon sahanongeh enyesagonreke, yahastad ginyoh ne skadih.

40 Neoni onhka kiok tenjaderihwageani jikajenhayen, oni yenhahawk ne sadyatawet, nok oni ne nonosa terak nissa oneaneeh.

41 Neoni onhka ok ensahsteronse enhskat *mile* niyah-
esene yahasene tekenih.

42 Sheyon nenyesanegen, oni yasheyon neoni raonha-
geh ne irehre a-ahtsenih tohsa eren nontajerat.

43 Sewathondehkwe ne yagawen, Shenoronhkwak ne shasyadat, oni sheswenhsek ne yesahswenhse:

44 Nok Iih wagwenbahse, Shenoronhkwak ne ye-
sahswenhse, sheyataterist ne yesadeweanakshateanih,
yoyanere jinasheyeras nyesagenhronni, sheyadereanay-
enhahs ne yesaronhyagentha, oni teyesonharikhon;

45 Ne wahonni naah ahesewaton shagoyen-ogon-ah
ne ehjisewaniha Karonhyageh thenteron: igen raonha
ken nenhayere ne raorahkwa entkarahkwinegeane shat-
enyontsheanonni ne yogoyanere oni yehserohense, oni
jienhageanoreste shatonyaweane ne yagoderihwagwari-
hsyon oni ne yahtey agoderihwagwarihsyon.

46 Igen engenhake ahshenoronhkwageh ne ne yesa-
noronhkwak, ohnahoten enyesayeritshe? yah ken ehteha-
diyerha ne Radihwistoroks (*Publicans?*)

47 Neoni ne ok tenshenonhweronhege ne shenonhkwe,
nahoten neaneeh isi nonweh jiniyoht nodyake? yah kenh
ehtehadiyerha ne Radihwistaroroks?

48 Ne kadi garihonni kaserihwayerit, shatenyaweane
ne ehjisewaniha ne karonhyageh renteron jinithorih-
wayeri.

CHAP. VI.

*Keristus ok onen jinithoyeren roderihwahnoton ononto-
harageh: ne rohtharahkwen ne tenyondaditenrheke yon-
dereanayan.*

SEANIGONHRAYENTONHSEK tohsa ayogen-
tane nonywehne ne sheyawire: asegenh tokat ehni-
yoht yahteyorharats ne a-ahyatonrase ne yanihah karon-
hyageh renteron.

2 Ne kadi wahonni ne ehnaahsyere nothenon ensheyon, tohsa saderagarerast ne kahonrahwats sahenton, jinihadiyerha ne radigonatahkwa ne *synagogue*-tseragon oni jidekanatogenhseron, heneh-ronadatonnih nongwehne, ne raononwesehtsera. Agwah wagwenhahse, enhadiyena nenhontonratahkwe.

: Nok nonen ehnsesyere adaditenron, tohsa yotogens ne ehsenegwati sesnongeh jinagayere jiseweyendehtahkon

4 Ne kea-igen ne kentenrehtsera aonhsehton: oni ne yanihah tehaganere wahhi nadahsehtongeh, agwah raonha tenyarihwaseragwatan okthenwatkwotho.

5 ¶ Neoni katkeh onen enhsadereanayen, tohsa ehna-
jer jiniyoht ne radirihwayesahtha: radinonwese nahonde-
reanayen radigeanyate *synagogue*-tseragon oni jideyo-
denataktanohon; ne ne tahonwadiganerake heneh-rona-
dadonni nongwehne, agwah wagwenhahse enhadiyena
nenhontonratahkwe.

6 Nok nise, nonen enhsadereanayen, sadaweyat kishen jinonweh aonhaah nikanaktaah ne sanonhsagon, oni ne onen ensenhotonge jikanhogaronte, sadereanayen yanihnehha, adahsehtongeh; neoni yanihah, tehaganere adahsehtongeh; enhyatonraten okthenwatkwotho.

7 Nok nonen enhsadereanayen, tohsa okhoriwagon aghenake, jinihadiyerha ne yahtehodirihwiyohton: igen ronehre enyorihontane genh ji eso rondatihs.

8 Tohsa kadi nise ehnasewaweyanotenhake: igen ne yanihah roderyentare jinahoten tesatonhwenjonni, arekho tesarihwanonton jinalesatonhwenjonni ne raonhageh.

9 Ken kadi nenhsyere jinikarihoten nonen enhsadereanayen: Shongwanihah karonhyageh tehsideron, sahseanadogenhti:

10 Sayanertsera aontawehte: Thahsehre ehniyawen nonhwenjageh, jiniyoht oni ne karonhyageh.

11 Tagwanataranondenhshek oni jiniyadewehtisera-
geh:

12 Neoni tontagwarihwiyohton, jiyongwadatkarotanih jiniyoht ne jagwadaderihwiyohteanih ne yakhigartanih.

13 Neoni tohsa tagwahsharineht tewadadeanagerah tongeh, ne sane sajatagwahs ne kondihserohense, igen ise sayanerstera, neoni kashatstenhsera, oni onwesenht-ahtsera, ne jiniyenhenwe. Awent.

14 ¶ Igen ne tokat ensehsherihwiyohsten nongweh nahoten ahesanhigon, ise oni Yanihah karonhyageh ensyarihwiyohsten o-nise:

15 Nok oni ne yahthaonsahsherihwiyohsten nongweh ne yesanhigon, yah o-nise ne Yanihah thaons-ahyarihwiyohsten ne sarihwaneren.

16 ¶ Isi nonka ne kea-igen ne katkeh onen ensondondyehte, tohsa nise, ehnaier jinihadiyerha ne radiirihwayesahtha, ok thihoneanewearon ok oya tkiyoht jiradigonhsonde: kengayen jiniyoht nenyododahsi, nongwehne neayagawendoneyehte. Agwah lih wagwenhasse, enhadiyena naah enhodaderihwaseragwahse.

17 Nok nise, katkeh nonen ensondondyehte, seayen arhoe ne sanonjine, senohare ne jiskonhsonde;

18 Ken igen nise tohsa wene'n nongwehne nonen sondondyehton, ne ok Yanihnehah ne yodahsehton: oni ne yanihah, Tehaganere ne adahsehtongeh tkagonte enhyatonren okthenwhaderihwagwatho.

19 ¶ Tohsa othenon sateweyenton ne satshogowahtsera nonhwenjageh, ohskenrha se nea-ne engahetkenhte, jinonweh oni ne yenenhskwahs enyerihsi nok enyenenhsko;

20 Ken tenhnon kayen sadateweyentonhahse nahtshogowahtsera ne karonhyageh, jinonweh yahothennon thayotken ohskenrha kishen aonsagahetkenhte, ji oni nonweh yahthayondaweyate ne yenenhskwahs naysanenhsko:

21 Igen jikayen ne satshogowahtsera, eh oni ne serih kayen.

22 Ne ne kahswathetsera noyeronta ne wahhi ne ogara: tokat nongen ne skahtegeh ne ok enhskat, sayeron-tagwewon kahawe kananon ne kahswathedahtsera.

23 Nok oni ne skahtegeh tokat enwahetkenhake, sayeron-tagwewon oni entyogarahshege. Nok oni jinniwat ne teyohswathe nisetseteragon entyogarahshege, yon ehragwaht onhte kowanen ne tyogarahs!

24 ¶ Yah onhka ne rongweh tehniyahshe ahonwa-weaniyohake dejaron ahshagoyeritshe: igen ka ok nik-ayen enhohswen enhskat nok shayadat enhonoronhkwe; netens shayadat enhodyenawaste, ne shayadat enhogenhraten. Yahthayegweni ahonwayotenhs ne Niyoh nok oni tkarenganyehtsera.

25 Ne wahonni Iih wagwenhahse, Tohsa ne aahseanonhtonyonwe jisonhe, nahoten aahsege, ne teas nahsnegira, shegon oni ne jorongeh nahoten asahkwase. Yah ken onhte jiyagonhe senha teyogarowanen jiniyoht naayeke nothenon, nea-ne noyeronta jiniyoht ne kanena?

26 Jadkahthoh jitea-ah kondidyese; yahtekondiyenthohs, yah oni tegononekeriyaks, nagondiyonte jiyetskwayestha; nok yanihah ne karonhyageh ranontens. Yah ken tesewehre senha ise teyetshigeanyon?

27 Kaok nikayen jinijon nonwa ne tayerenh ahagweni johsidat senha ahahneayesenhake?

28 Neoni ohnyotyeren ne seweanonhtonyon ne kane-na? tejatoreht ken-watonnyanyonhs kahehtayenton, gondehyaronhs; yahtegondadyotenhs, yah oni tegondihshe-riye:

29 Neoni shegon Iih sagonyenhahse; kea-igen shateyoht ne *Solomon* agwegon ne ronwesenhtahkonne yah eh teyoyanere jinihahkwenyoteane jiniyoht enhskat ne kea-igen.

30 Ne kadi wahonni, igen Niyoh rahrawi ne ohonte-ogon ne kahentageh, wahhi nonwa yotonni oni enyorhea-ne nok enwatshaahnton, yah ken nise senha eso teh-yahrawi, O nigonhah sayen ne tewehtahkon?

31 Ne wahonni tohsa ne seanigonhrayenton, ahsadonhege, nahoten enyagwake? ne-teas nahoten entewahnegira? neoni ka naontawe nayongwarane?

32 (Igen jinonkadih agwegon jinikariwageh ne kea-igen ne *Gentiles* ronesax:) Igen ne karonhyageh then-teron yanihahroderyentare agwegon ne gea-enh tesatonhwenjonni.

33 Nok sewesak tewatyerenht ne kayanertsera ne Niyoh, neoni raoderihwagwarihsyonhtsera; agwegon jinikariwageh negea-enh ehneayaweane nisegeh.

34 Ne wahonni tohsa aahseanonhtonyonwe jineaya-wen nenyorheane; igen nenyorheane tenwadyatorehte se nea-ne jinahoten teytonhwenjohon. Ethohji wahhi jinigon yoyen niyadewehniserageh ne wahetken.

CHAP. VII.

Keristus waharihokten roderihwahnoton onontoharageh: rorihwahsten yagoserahrehton tayondadyatorehte.

TOHSA tesheyatoeht, ne nise ne yahthatenjesaya-torehtane.

2 Igen ok ehnenjaweane jinatensheyatorehte, nen ise tenjesayatorehte: neoni jinensheyatenyenten, onhka ok o-nise ne enjesatenyendenste nise.

3 Ohneane-eh sadkahthohs ne raogahrehta ne jatadegen-ah ragahrageh, nok oni yahthatehsyatorehtha ne ise senawasageh ne ne ise skahtegheh?

4 Ne tea-ens thenon nongenh ahtsenhahse ne jatadegen-ah, to-knyotago ne sagahrehta ne skahtegheh; oni, ahsadkahthoh, ne ise senawasageh ne skahtegheh?

5 Ise serihwayesahtha, tewatyerenht isi yasatih ne senawasageh ne skahrageh; ethone nen ise enskahriyohake onen ehnsnyotago ne jatadegen-ah raogahrehta ne ragahrageh;

6 ¶ Tohsa nothenon nokhwadogenhti aahsenonte herhar-hogon, ne tea-ens ne saraseses askehronhahse khweskhwes, asegenh tengonhskwaserongo ne gonhsigeh neoni ehnskonyerate onen ise enyesatkonten-eye-sarajongo.

7 ¶ Serihwanonton, oni enyeson; serak, oni enhsets-henri: yaskonhrekhn, nok enyesanhotongwahse.

8 Igen niyadeyagon ne yerihwanondons yondataw-ihs; naah neoni enyagesakshege yetshenryese; oni ra-onhageh ne enhagonhrekhn enhonwanhotongwahse.

9 Ne tea-ens onhka nonwa jinijon onhka ok ne roy-en-ah ahoriwhanondonse kanatarohk, yenhaon genh ra-onha onenya?

10 Ne tea-ens ahoriwhanondonse kenjonhk, ne gen yenhaon nonyare?

11 Nok oni nongenh nise, ne sarihwaneraakskon, saderyentare ki nahoten ne yoyanere ensheyon ne sakshata, to kadi onhte niyaweta Ranihah ne karonhyageh enhshaga-on ne yoyanerese nonhka ok ahonwarihwanegeaniheke?

12 Ne kadi wahonni agwegon jiok nahoten ihsehre ehnayesayerase nongweh, ehnasheyeras rononha; ne negea-enh nyoderihwagwarihsyon oni agoyatadogenh-tishon.

13 ¶ Sadaweyat jikanhogaronte ne wentori: igen kanhogaronh, oni yohahowanen, jinonkadiah enyagohsharinehte jinonkadiah atkaronnyat, oni yawetowanen eh-henyenhte netho:

14 Ne wagarihonni ji wentori jitkanhogaronte, neoni niyohahaah jinonkadiah, ayagohsharine ne neayagonhege, oni niyagon-ah neayetshenri.

15 ¶ Sewadeanigonraren ne onowen yetshiyaderihwahnotonse, eheyonwe agonena engeahake teyodinakaron-ton-ah, nok ne nagonh nonkadiah aniyocht onathayon-nih jinikanigonhrakshen:

16 Ensaderyentarane naah onwa jinihodyotenhseroten. Wani nongweh ayaroroke genh onenharatasehon aganyenten, ohiktageh tokat jogahrehtese enhanyentago orhogtegowah enwaton genh?

17 Eh kadi niyoht jinigon ne karondiyose wadyenththa ne wahiyose; nok ne karondakshen wahyakshen ki na nenganyonten.

18 Igen ne karontiyoh yahteyaweht aonhetkenhake nenganyonten, ji oni niyoht ne karontahetken yotakshen yah wahhi teyorharats ne wahiyoh aganyonten oneane-eh.

19 Niyadekarontageh ne yahteyoyanere naganyentane enyeyake, wahi ehyaagoti ojistageh.

20 Ne kadi wahonni agaonhatseragon enyongwatogense nahoten iwat jiniyagoyotenhseroten.

21 ¶ Yahten niyadeyagon ayondonhege iihne, Sayaner, Sayaner, ayondaweyate kayanertseragon ne karonhyageh; ne ok enwaton ne ehnenyeyere jinithonigonh-roten ne Ragenihah ne karonhyageh.

22 Yawetowanen yongweanire netho wehniserade. Sayaner, Sayaner, yah kenh teyongwahne sahseanagon? oni ise sahseanagon yoton-onh skonwadiyatinegeahon onehshonhronon-ogon? oni ne ise sahseanagon yongway-oten-onh yotyatanenyon?

23 Neoni ethohkeh lih enkhayenhahse rononhageh, yahnonwenton tegonyenteri; eren kadi seht, nise sayotehkonne sewaderihwatewahtonhsragwgon.

24 ¶ Ne wahonni onhka kiok yagothonde ne ken igen wakthare, nok oni ehneayeyere, ne wahonni tenhsyatye-reane ne ronighrowanen, ne otstenrageh wahadenonhsonni:

25 Oni kageanorahserowanen, aonhnoton ayotade, ehtayoyake jinonweh nikanonhsote; yahohthayawen; jikanonhsote; igen otstenhrageh tkanonhsahere.

26 Neoni niyadeyagon ne yagothonde jinigon ne gea-enh wagadatih, oni yah ehthenyeyerane, ehneayagoyatawen jiniyoht ne yagoteh nongweh, ehwahadenonhsonni onehsaronhk wageh:

27 Neoni kahstarowanen tonseane, onhnoton, watkaweratase, ehwatyoyake jikanonhsote; ondenonhsarihsi: yorihowanen ji naawen.

28 Neoni ehnaaweane, ne onen Yesus saharihokten jinigon wahrenron, nongwehgon eso waagorihwanehrago jiniwatoryahtseroten:

29 Igen jiwahshagorihonyen jinikarihoten agwah kashats, tenhsara jirodatih, yah ehteyoht jiniyoht ne *Scribes*.

CHAP. VIII.

Keristus sahshagojontanyon ne Leper, ji ok nahoten niy-agoyatawense.

NEONEN shatontahatsnenhte jiyononte, kentyohkowanen tehonityohkondatye raonha.

2 ¶ Oni jadkahthoh, ehwarawe ronhrare ne *Leper* oni wahonidenhtase, raonha, wahrenron, Sayaner, tokat ensathondate, enhskweni enhskejonte jiniwagyatawense.

3 Neoni Yesus wathonisonhsaren, keaniyahoyere raonha, wahrenron, ehnengyere; nen ki sahsadewhha. Oni yogondatye ne *leprosy* sonderagewe.

4 Oni Yesus wahawenhahse raonha, sadkahthoh tohsa nongweh shehrrori; ne ok heren saseht, ehtsenatonhahs tenhnon ne Rajihenhstaji, neoni ehnenhsyere ji ensheyon jinihawen ne *Moses*, ne enwatanenyendenhstahkon rononhageh.

5 ¶ Ne onen Yesus shiyahadaweyate ne *Capernaum*, ehwarawe ne *Centurion*, wahorihwanegen raonha,

6 Neoni wahrenron, Sayaner, rinhasse rayatyonna ro-nonhwaktanih ne ne *palsy*, agwah yonigonhrakshat jinihoronhyagen.

7 Neoni Yesus wahawenhahse, ehylene enshijonte.

8 Ne kadi *Centurion* saharihwaserago, wahrenron, Sayaner, yahohestonhah tekariwa jinigyatoden ne ehya-hahse jitewagadahskwahere: ne ok nenhsadatih, saweana enhshojonte ne rinhasse.

9 Igen Iih ne hejin wagityohkwayen, shoder, iih entkeanonhton enhiyenahase ken rongweh, waas, Ehyenre; nok hare oya, engiron Kaats, entre naah; oni rinhasse, engiron Ehnajer, ehnenhayere.

10 Ne ne Yesus rothonde, wahonehrago, oni wahshagawenhahse jinigon ne ronne, Agwah Iih wagwenhahse yahkanega tewagetshenryon ehnikowanen aontayagawehtahkon, yahten, ki ne Iserathaga.

11 Neoni wagwenhahse heso negen-enh ken hentyeyenhtahkwe jitkarahkwinengense oni jiyatewatsothos, oni enhskahne enhontyen, ne Agwerent, oni *Isaac*, oni Jacob, kayanertseragon ne karonhyageh.

12 Nok ne kakshata ne ken kayanertsera ronwadiyatinengenhsse ahsatagon niyenhanne; enwatsjitigo teayagonawiroke.

13 Neoni Yesus wawenhahse ne *Centurion*, Heren saseht; igen ehnaawen jidesehtahkon, etho nyawen nisegeh. Neoni ne ronhase sahayewentane ok oni ne wataye ne *hour*.

14 ¶ Neoni ne onen shahadaweyate *Peter* jirononhsote wahadkahthoh ne rone onistenhah yeyatyonna, yagonhwaktanih yatogonhkwarhohse.

15 Neoni keaniyahayere kasnongeh, neoni waodetonkwahrago; neoni ontketsko oni ondadenhane wagotsteriste.

16 ¶ Ji onen waogarahwe, ehwaondadyatheon eso yagonh ne ne yagonadeweaniyohston onehshonhronon-ogon; sahadiyatinegenwe kanigonhrakshen-ogon ne ok raoweanawarate, agwegon nea-ne sayeyewentane.

17 Ne kadi wahonni yagarihwayerine jinihodadihne ne *Prophet Esaias*, rawen, raonha wathadadehkwase jiniyongwayatawenhse, oni wahadahkatstatshe ongwanonhwaktenhsera.

18 ¶ Nonwa ne onen wahadkahthoh agwah kentyohkowanen watheanityohkonten raonha, oni washagodayase ne nahonhtenti eren nakaihonhatih.

19 Neoni rayatatogen ehwarawe ne nariwa *Scribe*, oni wahawenhahse, Tageweaniyo, Iih hentene engonhsere ji ok nonweh niyenhenhse.

20 Neoni Yesus sahawenhahse ne rongweh, wahi jitsho yonatshonwenyon, oni jiten-ogon gontsjinahkonnihs nea-neeh; ne ronwayen nongweh yah kanega tehonaktayen jiyahadenonjistayen.

21 Neoni shayadat ne jinihotyohkwa wahawenhahse, Sayaner, nyare tewatyerenht shiyadata-anhah ne ragenihah.

22 Nok Yesus sahawenhahse, Takser; rononha nissa ne raonenheyonta ronwayadata.

23 ¶ Neonen sahadita ne kahonwagon, wahonne ne raotyohkwa wahonwahsere.

24 Neoni, sadkahthoh, wagawerowanahte watyongwareehste ne kanyatarageh, agwah waganehragwahte onen watnegitaahs; nok raonha rotas.

25 Neoni ne raotyohkwa wahonnehte raonhageh, oni wahonwayehte, wahoniron, Sayaner, tagwayatagenha; waditewenheye.

26 Neoni wahshagawenhahse, Ohnea-neeh wesewahteronne O nigonhah tisewehtahkon? Ethone wahadketsko, oni wahariste ji yaote oni ne kanyatare; oni wahondarayewentho.

27 Jinihadi wahodirihwanehrago, rontonyon, Ot-honhte agwah nahrongwetodenh, jinaawen owera kanyatare wahonweanarhkwe?

28 ¶ Neonen shiyaharawe ne eren-nakanyataradi en agerahseragon ne *Gergesenes*, ehwathonterane tehniyahshe ne ne yonadeweaniyohston onehshonhronon-ogon, ok keanonweh thondane jiyondyadataahstha, oni jinate-yaongwetanonyaniht nihserohen, yah onhka thohah tha-ayenhte jitehyatawenri.

29 Oni, sadkahthoh, wathodiherenhte, wahniron, nahoten nayagyatyera, nisegeh Yesus, ne nise yayen-ah ne Niyoh? kentho genh tahsehte neorskenironhya-genhte arekhose yeyoderihwihhe?

30 Neoni inonh niyore ji-ninese jigonnese khweskh-weshogon teyonatskahontyese.

31 Ne kadi nonehshonhronon wahonweanidenhten, raonha wagoniron, tokat ensehskwayatinegenwe enwaton genh ne khweskhweshogon aonsayagwatyenahse.

32 Oni wahshagawenhahse, wasene, ne onen sahadiya-geane onen khweskhwestseragon sabondaweyate: oni, sadkathoh, khweskhwestseragwegon watkonrahtade yoderonhyenton yagontsnenhte wagarenre kanyataragon, yagondiskonne.

33 Neoni jinigon raoditshenen-genha wahontego, okthiyathonnehseron jikanatayen, wahontrori jiniyadekari-wageh, jinaawen ne ronatyeanihne Onehshonhronon-ogon.

34 Neoni, sadkahthoh, kanatagon agwegon waeya-geane yathonwaterahte Yesus: ne onen wahnwadhakatho, wathonwanonweron ne ne akte nonkadih niyaonsaro ne ehnonweh.

CHAP. IX.

Keristus sahshagojonte yagononhwaktani ne Palsy.

NEONI sahadita kahonweyagowahne, tonsahayayake, sarahwe jinonweh raonha ranagerahseragonh kanatagon.

2 Neoni, sadkahthoh, ehwahonwayathewe raonhageh rononhwaktani ne ne *palsy*, rayatyonnitye kanaktageh: neoni Yesus, wahagenh anyoh thonehtahkon, wahawenhahse ne rononhwaktani; Gonyen-ah, sadeanigonhkatstat; sarihwaneraakshera sayesarihwiyohsten.

3 Neoni, sadkahthoh, radiyatatogen ne *Scribes* wahonnehre ne rononhatseragon, Ne gea-ne rongweh waharihwanerake ne kowanen.

4 Neoni Yesus, roderyentare jironnonhtonyon, rawen, ohnyotyeren isewehre jonha wahetken ne sewerihogon?

5 Igen kanikayen onhte watyesenha, nayairon, sayesarihwiyohten nise; netea-ens nayairon, Testan, sahtenti?

6 Nok kenkayen ahesewaderyentarake ne ronwayen nongweh roshatstenhserayen nonhwenjageh nensehshagorihwiyohten ne yagorihwaneren, (nen wahawenhahse ne rononhwaktani ne *palsy*) Sadketsko, tesehk ne sanakta, ehynsaseh jidesanonhsote.

7 Neoni wahadketsko, sahtenti jithononhsote.

8 Nok onen jinikentyohkwa wahontkahtho, wahodirihwanehrago, neoni wahonwayonwesahte Niyoh, jiniyorihowanen shagoshatstenhserawi nongweh.

9 ¶ Neoni ne nen Yesus sahatongohte isi-nonwehshon, wahogen rongweh, ronwayats *Matthew*, ehrenteron jiyondyendakhwa ne radihwistaroroks: neoni wahawenhahse, Takser iih. Oni wathatane, nok wahohsere raonha.

10 Neonen shontongohte nea-neeh, Yesus wahatyen radekhonyane kanenhsagon, sadkahthoh, kentyohkowanen radihwistaroroks oni rodirihwaneraakskon wahonnewe wahontyen ok-henhsukahne raotyohkwa oni.

11 Neoni ne onen ne *Pharisees* wahontkahtho, wahonwenhahse ne raotyohkwa, Ohnea-neeh wathondonte nejisewaweaniyah ne radihwistaroroks nen-tenhnon rodirihwaneraakskon?

12 Nok neane Yesus waharonke negen-enh, wahshagawenhahse, Kengayen yahtha-teyotonhwenjohon ne yagoyanere natshinahkenta, ne ok nyagononhwaktani.

14 Wasene tenhnon jonha sewadadrihonyen nahoten nea-ne kenton, Iih agenigonra nayondaditenre, oni yahtha-gyena ne kaneyonhkhwa: igen yah kenh-tetewage-nonhton ne akhenyente ne yagoyanere, ne ok ne yagorihwaneraakskon ne aonsayondatrewahte.

14 Ethone ehwahonnewe ne raotyohkwa ne *John*, ronton, Oh-naaweane niih nok ne *Pharisees* ronendondyehtha yotkate, nok ne seniyohekwa yah nea-ne tehonendon dyehtha?

15 Neoni Yesus wahshagawenhahse rononha, Enwa-ton-genh nondadyen-ogon-ah nen se yonyagon aontshon-yonkwe, jiniyore enhskahne ronnese? nok enwehnisera-deke, nen eren enhonwayatenhawihite ne ronnyakhe, nen-tenhnon ethone ayagawendondyehte.

16 Yah onhka nongweh ayeranendakte nogenhase aghenake agayonneh ayeranendakte; nagonena igen ne-yeranendakte nase agayonneh, ne ok hegonh ne engahet-kenhte senha jiniyohtonne.

17 Yah oni nongweh thayageta ase ne *wine* katshe-tagayonne; nok se tengarine ne katshe, nok ne *wine* en-wawerontha, ok ne yagetaas ase ne *wine* ase oni ne katshe, dejaronh tengyatadyatanonhstade.

18 ¶ Shegon ne nihohtharagwen jinikariwageh ne rononhageh, ehwarawe rayatatagen ne ne Rarihwagwat-agahs oni waherihwanegen raonha, wahrenron, Kheyen-ah nonhten tyagawenheyon: nok tasheyeanisnonhsaren aonhaget, nok enjagonheke.

19 Neoni Yesus wathatane, ok yonsahohserehte, nok oni ne raotyohkwa.

20 Neoni, sadkahthoh, agonhehtyen, ne naonegwenh-sa yohetkeaonh tekenih johserare, ehshiyohit rahshonnea nontawe, nok wagayena jidetkagwathon ne raonena:

21 Igen wahehre naonhatseragon, Toka-nonna ne ke-eniyahagyere ne raonena, aonsagyewentane.

22 Nok Yesus wathatkarhateni; nonen wahadkah-tho naonha, wahrenron, Gonyen-ah, skeanen sadadenigon rayen; jidisehtahkon aoriwa sahsyewentane. Ne oninon hehtyen sagayewentane ok ne *hour*.

23 Neoni onen Yesus yaharawe jirononhsote ne rarih-wagwatagwahs, oni wahadkahtho ronwadinhaonh non-gwehogan ronaderitstare,

24 Raonha wahshagawenhahse, Tagwanaktothas; igen yah ne gen-enh ne kayataseah yahte-yawenheyon, ne ok ne yagotas. Neoni wahodiyeshon ne ne wahodi-genhraten yaweht.

25 Nek ji onen ne ronongwe sahonwadiyatinegenwe; ethone yahadaweyate, neoni wahshagonontsha, ethohkeh sontketsko.

26 Neoni jinaawen watewaderihogo jinihononhwenjanetho.

27 ¶ Neonen ne Yesus eren sarehte ne etho, tehnayahshe tehnironwegon wahonwahsere, tehodihenrehtha, yaton, Ise yayan-ah ne Dawed, ahskenitenre.

58 Neoni shiyaharawe jikanonhsote, ne tehnironwegon yohonwayatoreana: Neoni Yesus wahrenron, Tisenehtahkon genh ne iihne nisenehre enkkweni ehneayaweane? Wahniron ne raonhageh, Etho, Sayaner.

29 Ethone kea-niyahayere ne nigahtegheh, wahrenron, Ne ok engarrihonni jitisenehtahkonh, ehneayaweane.

30 Neoni onen sondenhotongo ne nigahtegheh: neoni Yesus wahshagorihwahniratshe, ne wahrenron, Seninig-onrare tohsa onhka yagotogens.

31 Nok rononha, ne ok wathondekhahsi, ok no wahnirih howanahte jinaawen enagerahseragwegon.

32 ¶ Ji nen-wahadiyageane, sadkahthoh, ehwahonwayathewe tehahonhtagwegon rongweh rodeweaniyohsteani onehshonhronon.

33 Ne onen nonehshonhronon shonsagonwayatinegenwe, nen oni sahaweanatane: oni jinikentychkwa wahodinehrago, ronton, Yahnonwenton teyongwagen jinake Iserathaga shigen.

34 Nok ne *Pharisees* ronton, Raonha shadatinegene onehshonhronon-onogon nese aoriwa ne thayatagweniyo royenawase nonehshonhronon.

35 ¶ Neoni Yesus wathetsdekhawhka jikanatayenton, shagorihonnyeanihatyese ne *Synagogues*, oni roderihwahnotontyese ne Orihwadogenhti ne kayanertseragon, oni sahshagojonte jiok-nikanhroten nongwehneh.

36 Nok onen wahadkahtho jinykentyohkwa, ehnaaweane jiniyoht ne wahshagotenre rononha, igen anyoh wahondonrishenhragon, igen a-naawen, jiniyoht teyodinakaronten-ah yahte-yodiyen ne tagonwadishsyene.

37 Ethohkeh wahshagawenhahse ne raotyohkwa, Sane jiniyoht enshigen ne yagohehtowanen, nok niyagonhah ne yagoyotens:

38 Jadereanayen kadi ne garihonni ne Royaner jiro-yenthon, ne engarihonni endehshagonhane ne yagoyotens jinonweh ne raohehtageh.

CHAP. X.

Keristus yahshagonhane te kenihsshade rodirihwiyohston wahshagorihwahniratshe ne kashatstenhsere.

NEONI ne onen shiyahshagononke raonhageh ne tekenihshade raotyohkwa, wahshagaon ne kashatstenhsere nenhadisheani ne kondinigonhrakshen, nenwaton enshadiyatinengenwe, oni jiok-nahoten agwegon enshagodijonte jiok-neayagoyatawenhshege kanhragon.

2 Ne nonwa ne raodihseana-ogon ne tekenihshade rodirihwadogenhti kea-nihadih: Tyotyerenhton, *Simon*, ne ronwanatonhkwa *Peter*, oni *Andrew*, yadategenah; *James* royen-ah ne *Zebedee*, oni *John* yadaten-ah;

3 *Philip*, oni *Bartholomew*, *Thomas*, oni *Matthew* ne rahwistaroroks; *James* ne royen-ah *Alpheus*; oni *Lebeus*, tehahseanarahkwe *Thaddeus*;

4 *Simon* ne Canaan-haga; oni *Judas Iscariot*, ne ne tehonigonhrasere.

5 Ne neh-nihadi tekenihshade *Yesus* yahshagonhane, neoni jinashagorihon, wahrenron, Tohsa ehniyahasewe jinonka ne ne *Gentiles*, ken oni nonkadiah jikanatayenton ne *Samaritans*, tohsa sewadaweyat.

6 Senha yoweyenhston ehniyahasewe jiniyoht teyodinagaronton-ah ne *Iserathaga*.

7 Neoni, janiyenhensewe, jiderihwahnoton, enseniron, Ne kayanertseragon ne karonhyageh ok-hetho naah.

8 Enyetshijonte kanhra, oni yetshiragewas ne *lepers*, sayetshigetsko ne yagawenheyon, sewayatinengenweh nonehshonhronon-ogon: watyesenja ji wesewayena, okthenwatyesenhake ji enyetshiyon.

9 Tohsa sadeweanotak ojinegwar karistanoron, yah oni karistagenrat, yah oni nojinegwarakshenhskwa sah-natahkne aondahke:

10 Tohsa oni ne yerahkwa nathahinon-onbkeh, yah oni tagenihake adyatawit, yah oni ne ahta, yah oni ne adeanits: igen ne yagoyodatyese enwaton heayondadenonte.

11 Neoni jiok-nikanatodenh tokat yonatawenhte en-sewadaweyate, ensewarihwisake etho onhte yaweryenti-yoht; neoni ehnonweh sewenterondak jiniyore eren en-sewehte.

12 Neoni ne onen enyetshinonhsoreane, teyetshinon-weron.

13 Neoni tokat etho jinikanonhsoten, yetshiyon ne sewayanerenhsara: nok yahten kishen yah ne shategena, isegeh enskayendahte ne yoyanere.

14 Neoni onhka kiok ne yahthayetshiyadewehkwen, netea-ens ne sewaweana yahthayondahonhsadate, nonen teajisewadekhahsi ne yagononhsote tokat kanatagon, sewagenrawak ne sewahsigeh.

15 Agwah wagwenhahse, keaniyawenhsere yenwatongohte jiniyaweaonh ne *Sodom* oni *Gomorrhah* enwehniseradeke raojenhayenhtserageh, ne ehkenatayen.

16 Sewadkahthoh, lih yagwanhane jiniyoht teyodinagaronton-ah yagonwanatori jigonnese onathayonni: ne kadi wahonni sewattokhak jiniyoht nonyare, tohsa oni othenon sasewaderihwatewaht jiniyoht oride.

17 Nok sewadadenigonrarak nongwehne: igen ehenyethiyahtkawe jiyagojenhayen, oni enyetshisohkwawishon raodinonhsagon *Synagogues*:

18 Neoni enyetshiyatinyonte radikorahshon oni korahkowahne ne niih ageriwa, ne enwatanenyendenhston jinenhodiatawen oni ne *Gentiles*.

19 Nok nonen ensewadenahskonni, tohsa othenon seweanonhtonyon nahoten ahesewadatih; igen enyetshiyon naah ok nen *hour* nahoten ensewenron.

20 Igen yah ise tegen nenhsadatih, ne ne kanigonra yanihah enyon nasadatih.

21 Neoni yadategen-ah yenhohtkawe ne nahrenheye nyadategen-ah, neoni ronihah ne shagoyen-ah: oni ne radikshaogon-ah tenhaditane enhonwatkonten ne shagoyen-ogon-ah, ne engarihonni ehneayaweane enhonwadiro.

22 Neoni agwegon nongweh, enyetshihswen ne niih akseana engahstonte: nok onhka ok yatenharihokten enhonwayatanonhstade naah.

23 Nok tokat keaneayesayere ne ken kanatagon, sewatego akte nonweh: Igen agwah wagonyenhahse, Arekho tensadenatongohton ne lseratthagageh, jiniyore ne Ronwayen nongweh henrawe.

24 Ne raotyohkwa yahtehotongohton ne roweaniyo, neoni ne ronhase jiniyoht raoyaneta.

25 Etho se jiniyoht igen ne raotyohkwa ne ehnyah-ton ne raoyaneta, oni ne ronhase jiniyoht ne roweaniyo. Tokat nongenh ahonatonhkwen ne rayatagweniyo jikanonhsote *Beelzebub*, to-kadi onh-niyaweapon ji-ahonwadinatonhkwen ne raononhs-agon ne ne senha agahseanakhshenhake?

26 Tohsa yetshitshahnihsek ne agarihonni: igen yahothennon tekharhoron, negeane yahthagatogenhsere; oni aonhsehton, negeane yahthiyagatogenhsere.

27 Nahoten lih gonhroni ne ahsatagon, jinahoten sadatih ji-wenteh: oni nahoten sathonde ne sahonhtageh, yasaderihwahnoton kanonhsoharageh.

28 Neoni tohsa shetshahnihsek rononha ne radiyohs noyeronta, nok yahthahadigweni agonwaryo nadonhets: nok ken tenhnon kayen ehtsetshahnihsek ne nenhagweni dejaron enhahntonte adonhets oni noyeronta onehshon.

29 Yah genh tekenih jiten-ah tewatenhninon yejo-ken-ah penis yadeyononh? ehskah kadi netho yah-teyaweht aonseane onhwenjageli yagayentane ne yah-thahayatarak ne Yanihah.

30 Nok jinihsanonhkwiserageh ne sanonjine yonyote wahraton naah.

31 Tohsa kadi sahteronshek; ise naah senha yogarawanen jiniyoht ne tekajitenserageh.

32 Onhka kadi ok iihne eyongeweanaten enyagoder-ryentarake nongweh, shateayawen lih oni tenhihsnyene raohenton ne Ragenihah ne Karonhyageh.

33 Onhka kadi ok enhagwadonhiyase teayeganerake nongwehogan, shateayaweane raonha oni lih enhiya-donhiye raohenton ne Ragenihah ne karonhyageh.

34 Tohsa sewerhek lih wagewe gyenhne ne kayanerenh nonhwenjageh: yah kenh tewagon nagyenhne kayanerenh ne ok tenhnon nasharegowah.

35 Igen Iih wagewe keanigyerane nongweh tengarih-warhene enhotkonten ne ronihah, oni gonwayen-ah enyotkonten onistenhah, oni nagosawhha enyotkonten nawenhonsa.

36 Neoni ne rongweh tenhadatswenhsege raonha raononhsagonh.

37 Raonha ne ronoronhkhwa ronihah tokat ronistenhah senha ji-ni-yoht yahotheron shategena: oni tokat ronoronhkhwa ne royen-ah shagoyen-ah teas senha ji-ni-yoht yahotheron shategena niihne.

38 Neoni onhka yahtha-taharahkwe ne raoyahsonde, oni yahthahagyanenhawe, yahotheron shategena niihne.

39 Raonha ne entheanonhton jironhe enhohtonse naah: oni tokat enhohtonse jironhe ne iih ageriwa enshatshenri naah.

40 Raonha ne yayenahs, ragyenahs niih; neoni onhka ok enhagyena niih, ne enhayena ne raonha ne thagenhaonh.

41 Raonha ne enhoyena ne royatadogenhti raohseanagon ne royatado genhti, enhayena ne royatadogenhti raotsheanonyahtsera; neoni raonha ne enhoyena ne rode-rihwagwarihsyon, ne rongweh raohseanagon ne roderihwagwarihsyon, ne rongweh, ne kadi enhayena jinenhonwatonradahkwen ne roderihwagwarihsyon.

42 Neoni onhka kiok enshagohnekanonte nayehnegira ne enhskat ne kea-igen niyagasa enhskat *cup* yowistok ohnekanohs, neok ne raoseanagon ne rorihwadogenhti; Iih agwah wagwenhahse jonha, raonha yahotheron thagarihonni ne ahohtonse nahonwadonhreani.

CHAP. XI.

Ne John yahshagoteanyehthe ne raotyohkwa Keristusneh.

NEONEN shontongohte, ne onen Yesus saharibok-ten jinahshagoteweyeanonyen ne tekenih-shadire, ne roderihwiyohstongowah nathondekhahsi, nenshagodirihonyen oni enhonderihwahnoton jikanatowanense

2 ¶ Nonwa neonen *John* waharonke jithanhoton raskwase jinihoyotatyese ne Keristus, raonha yahshag-onhane tehniyahshe ne raotyohkwa,

3 Neoni wahawenhahse, Ise genh naah ne yagwenh-tare, katon oya enyongwarharege?

4 Neoni Yesus saharihwaserago wahshagawenhahse, Wasene oni ehtsenatonhahse ne *John* shegon jinaawenhseron jinahoten sewathonde oni sewadkahthohs:

5 Tehadironwegaon sahadigen, oni yerenhshaksheane sahahtenti, neoni yagonhrare ne *lepers* sayoyanereane, oni teyonhonhtagwegonne sayonronke yagawenheyon sayontketsko, oni yagotenhtenyon waondaderihowanah-ten ne orihwadogenhtiogon.

6 Neoni rodahskats raonha, onhka kiok ne yahthahogenhratane niihne.

7 ¶ Neonen, shathondekhahsi, Yesus tahadahsawen wahshagawenhahse jinikentyohkwa ne hontstonde ne *John*, Ohnise-watyeranohne karhagon ne genh nahesewadkahthoh? nohstyentane watyogarenron ne owera?

8 Nok ohnaawen neane jisewatkensehronhne? rongweh genh rotsheronyaton nonetskha? Jadkahthoh, ne neane ronyatsheronyaton nonetskha ne na ne korahkowah raodinionhsagon raditeron.

9 Nok ohnaawen ji-seweronh gatkensehah? katon royatadogenhti? ahtsisewadkahthoh? togenhske, lih wagwenhahse, oni isi na-nonweh senha nagoyatadogenhti.

10 Igenh raonha naah ne ronwahyatonse, Sewadkahthoh, lih yakheyatcanyehte ne nagwadenhatsera ohenton ji-skonsonte, ne wahonni enyesatagwahse jiniyenhenhsenonhatye sahenton.

11 Agwah lih wagwenhahse, Agaonhageh ne yagonageratonh nagonhehtyengeh yah na ne teyagonageratstahkon ne senha ayekowanen jiniyoht *John* shagohnegoserahs: etho sane nea-neeh, raonha ne rohsthon ne kayanertseragon ne karonhyageh ne senha rakowanen jiniyoht ne raonha.

12 Neoni jidyodahsawe shihodehniseratenyohkwe ne *John* Shagohnegoserahs jiniyore nonwa ne kayanertseragon ne karonhyageh jiniyoht ne okthagonweanonhtonse, neoni ne yagonigonhrahniroon agwah jiniyeshatste jiyeyenas.

13 Igen agwegon ne *prophets* oni ahtyawenratshera yehodirihwadaton jiniyore John-ne.

14 Neoni tokat ehniyoht ehnsyena, negen-enh *Elias*, ne ne gen netho tawehsere.

15 Racnha ne tehahonhtonde nahahronkhage, Jinyoh raronk.

16 Nok ka onhte nonweh Iih agahskanegen negen-kahnegwahsade? Thohah teskyatyere jiniyoht hekshagon-ah yetarayan jiyontkehrondahkwa, oni yehshagodironhyenha ne rontenrotyese,

17 Neoni yehanenh, gwahsodonnihne, nok yahthatesewanonnyahkwen; oni gwatshonnyonhkweaninne, nok yahtesewadaditenron.

18 Igen ne *John* sharawe yahteraks yah oni tehahnegirha; neoni waairon, ronehshonhrontserayen.

19 Ne Ronwayen nongweh sharawe hiraks oni rahnegirha; oni rontonyon, Jadkahtoh ne rongweh ne ne rakowanen, neoni ne rahnekagastane, ne *wine*, ne rontenro ne radihwistaroroks, oni rodirihwaneraakskon. Nok kanigonhrowanenhsera enwaton tentkarihwagwarihsi naonha agoyen-ogon-ah.

20 ¶ Ethone tahadahsawen wahshagorihwasten yorihwashatste jikanatowanense jinonweh yotongohton kashatstenhsera raoyotenhsera jinihohson, ne wahonni jiyahteshonadatrewahton.

21 Wesewendenhthene, *Chorazin!* wesewendenhthene, *Bethsaida!* igen ne raoshatstenhsera jinihoyoteaonh jingon ehtshisewahsheaheani jonhageh ehniyaweaonh *Tyre* oni *Sidon*, aonsahonadatrewahton wahonnise ahonatston ahshirakshenhskwa oni ohsehara.

22 Nok Iih wagwenhahse, Keaniyawenhsera senha enwatyesenhake ne *Tyre* oni *Sidon*, jinenhodiatawawen nehnonweh niwehniserade jinatenyetshiyatorehte, jineayawen nise.

23 Oni ise, *Capernaum*, wahhi yetshiyeyenhahkwe ne karonhyageh, nok nonwa kadi yeayetshiyatondi onehshon: igen ne rashatste raoyotenhsera ne jini-kahson nisegeh ehnitkahson ne *Sodom*, asegenh ok honen nonwa jinayohton nonwa kenwente.

24 Nok Iih wagwenhahse, senha watyesenha jiniyawenhsera nehyonhwenjade ne *Sodom* enwehniseradeke-jinateayetshiyatorehte, jineayawen nise.

25 Ethohkeh nonweh Yesus, saharihwaserago wah-enron, Wagonyatonren ise, O Ragenih, Sayaner karonhyageh oni onhwenjageh, ne wathonni ise sahsehton jinigon negen-enh ronwanahsehteani rodinigonhrowan-enhse, oni okthityodokte ehnonkadiah jisadyehton kawirageh.

26 Ok shateyoht, Ragenih: igen anyoh ehniyoht yoyanere jidehskanere.

27 Orihwagweson ehtewakha Ragenihneha: yah oni onhka nongweh tehonwayenterih ne Ronwayen; ne ok ne Ranihah; yah oni onhka tehonwayenterih ne Ranihah, ne ok ne Ronwayen, oni raonha onhka kiok ne ronwayen ensehshagoriwawase.

28 Kats iihne agweson ne sewaronhyagenh sewayote oni ne yagohwisheane, oni lih engonyatorishenthose.

29 Tesehk nogwadyentanyaks, ahskwanageren; igen lih wagyatanetskha skeneaah nagweryane: oni enhsetshenri adorishenhtsera ne sadonhetsherageh.

30 Igen nagwadyentanyaks yahteyokste, akryena oni yahteyokste.

CHAP. XII.

Keristus wahshagogahkwarihsi ne Pharisees jiniyotyeren ne Sabbath.

ETHOHKEH nonweh Yesus ronne aondadogenh-tongeh wehniserade kahehtagonhshon; ononhste kayenthon, neoni raotyohkwa ronatonhkaryagonhatye, oni tahondahsawen wahadinahsarongo nonenhste, ne nenhadike.

2 Nok neonen ne *Pharisees* wahontkahthoh, wahonwenhahse, raonha, Sadkahthoh, sentyohkwa ehnahadiyere ne yahteyoderihwagwarihsyon ne ehmayeyere ne yawendadogenhton wehniserade.

3 Nok sahshagawenhahse rononha, Yah ken naah tesewaweanahnoton ne Dawed jinihoyeren nonen shihotonhkaryagonhatye, ji oni nigon ronne;

4 Eh wahhi yahadaweyate jirononhsote ne Niyoh, oni warake ne onataradogenhti, yahtense teyoyanere ne ahake, yah oni jinigon ne ronne ne ok ne radijihenhstaji?

5 Katon oni yahtesewaweanahnoton nahtyawentatsherageh, jiniyaweaonh ne ne aondadogenhtongeh wehniserade ne radijihenhstaji ononhsadogenhtigeh wahonwayonwesahte yawendadogenhton, oni yah kadi tehonwadirihwastani?

6 Nok Iih wagwenbahse nise, Kenthoh kanega irate ne rakowanen senha jiniyoht ne kanonhsa ononhsadogenhtigwoah.

7 Nok tokat aondesewaderyentarake nahoten ne genenh kenton, Iih gerihwanonwese ne adaditenron, nok yahten ne kaneyonhkwa, yah wahi onhte tasheyadewendehte ne yahteyagonhigon.

8 Igen ne Ronwayen nongweh Royaner naah oni naondadogenhtongeh.

9 ¶ Neoni nen eren shonsarehte, ehniyahare jirodinonhsote ne *Synagogue*.

10 Neoni, sadkahthoh, rongweh ehire ne ronontshagenheyon. Neoni wahonwarihwandondonse, wairon, Yoyanere genh aonsayondadejonte ne yawendadogenhton wehniserade? ne nothenon ahadirihwatshenri ne raonha.

11 Neoni raonha wahshagawenhahse, Onhka kadi nonwa jinijon nongweh tokat nongenh enhskat teyodinakaronton-ah, yagayateane nagonh aondadogenhtongeh, yah onhte genh thiyahayena aonsahayatago?

12 Senha wahi ese yotongohton nongweh kanoron jiniyoht ne teyodinakaronton-ah? Ne kadi wahonni yoyanere ne tkarihwayeri jinayontyere naondadogenhton geh-wehniserade.

13 Ethone wahawenhahse ne rongweh, stagwarihsi senontshageh. Neoni wahatagwarihsi; oni eh nonsayoyanereane, jiniyoht ne skadi.

14 Ethone ne *Pharisees* wahadiyageane, yahadijenhyen, to-nayaweane nahonwahtonde.

15 Nok neonen ne Yesus wahotogense, raonha akte warente; oni kent yokowanen yahonwahserete, oni agwewegon sahshagojonte;

16 Neoni wahshagawenhahse radigwewegon ne ne tohsa ahonwarihowanahse;

7 Ne ken-igen yagarihwayerine jinihodadihne ne *Esaias* royatadogenhtigenha, jinihawen.

18 Sewadkahthoh nagenhatsera, ne niih kheyataragwen; ne ne khenoronhkhwa, ne nagwadonhets waaweryentiyo: Iih kadi wagyonte negenigonra ne raonhageh, ne wahonni enhshagonatonhahse kajenhayenhtserageh narekho tehodirihwiyohton.

19 Yahteyaweh ahdatteronse, ne tens nahatstaren; yah oni ne nongweh thahonwaweanaronge jidekanatogenhseron.

20 Yahongo-onh ohstyentane yahteyaweht tahayake, oni ayotekhage ohskare yah na thahaswahte, jiniyore endeshagonhane kajenhayenhtserageh adensheanyehtserageh.

21 Neoni raohseanagonh naah tkagonte ne yahtehodirihwiyohton *Gentiles* enhondeweanodahkwe.

22 ¶ Ethone ehwahonwayathewe raonhageh shayadat rodyagweniyohsteani oneshshonhronon, teharonwegaon yahtehadatih: oni ne sahojonte, yagarihwageanyate ki sahagen teharonwegonne oni yahteshaweanatahkwe wahadatih.

23 Neoni agwegaon nongweh waagonehrago, yontonyon, Yah ken ne gen-enh tegen ne royen-ah Dawed?

24 Nok neonen *Pharisees* wahonronge, wahoniron, Ne ken igenh thirongweha jinihayerha shayatinegens oneshshonhronon-ogon, wahi ne royenawase *Beelzebub* ne rayatagweniyo nonehshonhronon.

25 Neoni Yesus roderyentare jironnonhtonyon, oni wahshagawenhahse, Niyadekayanertserageh ok agaonha tayonnityohtyake agenron eayonton; oni niyadekanatageh tokat oni kanonhsa taondekhahsi yahteyaweht agatage;

26 Oni tokat *Satan* ahoyatinegenwe *Satan*, raonha wahi tehadadekhahsi; to-kadi ne nayaweane raoyanertsera thaonsagatane genh?

27 Neoni tokat Iih ahagyenawase *Beelzebub* skyatinegens nonehshonhronon-ogon, onhka kadi ne gen-enh rodiyenawase ne yetshiyen-ogon-ah ji shadiyatinegens? ne kadi wahonni rononha enyetshiyatorehte nise.

28 Nok tokat Iih enskyatinegenwe nonehshonhronon engate Raonigonhriyohstahk ne Niyoh, nen kadi ne raoyanertsera ne Niyoh onwe nisegeh.

29 Ne tens, ne keanayaweane enwaton genh naho-nonhskari tokat renteron ne rashatste, raononhsagon enhahetkenhte ne royen, wahi nyare ahonerenke entewaty-erenhte ne rashatste? ethone onen enhahetkenhte ne raononhsagon.

30 Raonha ne yahteyagenese ragenogaronhs; oni raonha ne yahshahne teyageniroroks tenhatogwahton isinonwehshon.

31 Ne wahonni Iih wagwenhahse, Agwegon ne karihwaneren oni ronwatshaweanoryatha enwaton enjon-daderihwiyohtsten nongweh: nok nenhonwatshaweanor-yate ne Ronigonhriyohtston yahteyaweht aonsayondade rihwiyohtsten nongwehogan.

32 Neoni onhka kiok enyondatih skaweanat enhonwenhahse ne Ronwayen nongweh, enwaton enshonwarihwiyohtsten: nok tokat onhka kiok wahetken enhonwenhahse ne Ronigonhriyohtston, yahteyaweht aonsahonwarihwiyohtsten, ne ken yonhwenjade, nok oni noya jityonhwenjade ne tawe.

33 Ka ok ni kayen ehniyeyer ayerondiyohste, oni wahiyohtste; ne tens ayerondatkenhte ohyahetkeane ki oni; igen enyogentane jinikarondoten, ne ji nahoten wahyanyentha.

34 O kahnegwahsakshen onyare! ohnaahsyere ehse niyoht, wahetken, ahsadatih ne yoyanere? igen tkayagense yotkate agaweryane ehsagonh yondadyatha.

35 Royanere ne rongweh, tkayagense jitkanaktiyoh raweryane, ehtkayenhtahkwa karihwiyohtste: oni ne rongwetakshen, wahetken ki jitkayenhtahkwa, ehtkayagense ne karihwakshen.

36 Nok Iih wagwenhahse, Ken igen niyadekaweanageh orihwakshenhsakwa enhondatih nongweh, enyondad-erihodahsyase enwehniseradeke kajenhayenhtseragon.

37 Igen saweanaogon enwadyatorehte neayesayerit-she, oni saweanaogon enhsadewendehtahkwe.

38 ¶ Ethone radiyatatogen ne *Scribes* oni ne *Pharisees* wahadirihwaserago, wahoniron, Tagwaweanino, yagwehre ayagwadkahthoh nenwatenyendenhston nisegeh.

39 Nok saharihwaserago wahshagawenhahse rononha, Sewahserohense oni sewanahkwagastha karihwaneren sewahnegwahsad ne kadi sewesaks ne aontenyendenston; yah kadi othenon tenwatenyendenston nayetshiyawi, neok watenyendenston ne Royatadogenhtigenha *Jonas*:

40 Igen ne *Jonas* ahsen niwehniserageh ahsen oni niwahsontage kanegwentagon ne kenjowanen renterondahkwe; eh kadi oni ne Ronwayen nongweh ahsen niwehniserageh ahsen oni niwahsontageh enhenterondake awe-ryane nagonh jiyonhwenjade.

41 Ne ronongweh ne *Nineveh* enshontketsko kajenhayenhtseragon ok enhskahne ne ken kahnegwahsade, oni enwadewendehton: ne engarihonni shonadatrewah-ton shihoderihwahnoton ne *Jonas*; oni, jadkahthoh, senha rakowanen jiniyoht ne *Jonas* kenthoh irese.

42 Ne korahkowah agonhehtyen entyegeh ensewatketsko kajenhayenhtseragon ok enhskahne ne ken kahnegwahsade, oni enhonwanadwendehte: igen ehnontawe jiyodonhwenjoktanihon ne nayothondeke ne raonigonh-rowanenhsera ne *Solomon*; oni, jadkahthoh, senha rakowanen jiniyoht ne *Solomon* kenthoh irese.

43 Neonen ne kanigonkrakshen shonsagayageane ne rongwetagon, enhahtenti jiyaonhwenjathense, resaks nahadorishen, oni yahtehatshenryese.

44 Ethone enhenron, Nen ki sagahkete jitewagenonhsote sage ehse nitew-agenonh; neonen sharawe, wahatshenri aogon, yonhewen, oni waderaseston.

45 Ethone yahahahtenti, yahahawihte raonha thigate jatahk nikanigonrage ne senha ronongwetakshen jiniyoht ne raonha, oni yahondaweyate ehyahonnagerate: ne kadi nohnagen yahondoktahkwe netho ne rongweh isi nonkadih senha rahetken jiniyoht shondontyerenhte. Ne kadi shateayaweane negen-enh rodirihwaneraakskon yongwetakshen ne ken kahnegwahsade.

46 ¶ Shegon ne nihohthare nongwehne, sadkahthoh, ronistenhah oni ne shagononhkwe ehyegeanyate atste, iyenhre abiweanaran.

47 Ethone shayadat wahawenhahse, Sadkahthoh, sanistenhah shenonhkwe oni ken yegeanyate, iyenhre ayesaweanaran nise,

48 Nok waharihwaserago wahawenhahse raonha nahohrorih, Onhka naah nistenhah? onhka oni ne khenonhkwe?

49 Neoni yaheanontshagwarihsi jinonkadiah ne raotyohkwa, oni wahrenron, Jadkahthoh nistenhah oni khenonhkwe!

50 Igen onhka kiok ehneayere jinithonigonhroton ne Ragenihah karonhyageh thenteron, shateyoht nagyastategen-ah, oni agyadeanosenah, oni istenhah.

CHAP. XIII.

Ne tekarihwagenwahton ne kanen oni ne wahayenthoh.

NE shaehniserat Yesus wahayageane jikanonhsote, eh yahatyen kanyatarakta.

2 Neoni Agwah kentyohkowanen yagotkeanison raonhageh, ne wahonni kahonwagon wahadita, eh wahatyen, nok ne kentyohkwagwegon eh radigeanyate ehtiyogeh.

3 ¶ Neoni eso yoriwageh niyategonwahadatih ne tekarihwagenwahton, wahrenron, Jadkahthoh, rayenthos wahahtenti wahayenthohsere;

4 Neoni ne onen wahayenthoh, odyake ne kanen ohaakta yagayentane, neoni jitea-ah tonsagondihkwe wagentekhwisa.

5 Odyake oneayageh yagayentane, ne kanen nigonhah yaonhwenjahere; yohsnore nok waganyo wahonni keanigonhah yonhwenjahere;

6 Neoni jiniyoderahkwagarataton, nok ondyadatsha; igen yahteyohterondaonh, ne wahonni sontagenheye

7 Oni odyake ohnyon waragon yagayentane; wagondehyaron nohnyonwara, waodiryo ne kayenthon.

8 Nok odyake jiyonhwenjiyoh yagayentane, wagondehyaron waganenhonten, odyake weanyawe, odyake yayak-niwahshen, odyake ahsea-niwahshen ntyohnanet.

9 Onhka tehahonhtonde naharonge, rothondek gin-yoh.

10 Neoni ne raotyohkwa ehwahonnawe, wahonwenhahse, Ohneaneeh nise wahsheyaten tkarihwagenwahton.

11 Raonha saharihwaserago wahshagawenhahse, Ne wahonni wahi yetshiyawi ne nensewaderyentarake ne karihwanoronshon ne kayanertseragon ne karonhyageh nok nodyake' yahteyondatawi.

12 Igen onhka kiok royen, enhonwayen, oni shegon senha eso enyotkatege; nok onhka kiok yahteyagoyen, raonha enshonwahkwase saetho nigonhah ahoyentage.

13 Ne wahonni wagadatih tekarihwagenwahton: ne wahonni tehadiganere, yahtense tehodigen; oni ronathonde yahtehonhronkha yah oni tehodinigonhrayentaonh.

14 Neoni ranonhageh yagayerine jiniyehoriwagen ne *Esaias*, waton, Ji ensathondeke ehenhsaronke, nok yahthaesanigonhrayentane; oni tenskanerake enhsadkahthoh, nok yahithiyaahshewe:

15 Igen keaigenh ongwehogan raoneryane jinikahniraton, oni ne raonahonhta yahtewahonhsiyoh, oni raodigara tehonaderonwegon; onwa jiok nonweh ayoton-onh ahonadkahthon oni ahonahrongaonh, ne ronhonhtageh, oni aho-dinigonhrayentaonh, ne raoneryane, ne wahonni aonsahonadonhaganonnihon, oni aonsakhejonton.

16 Nok kayataderiston naah ne sewagara, igen yonadkahthos; oni sewahonhta, igen yonathonte.

17 Igen agwah wagwenhahse, Keaigenh eso radihne rodiyatadogenhti oni ronaderihwagwarihsyonne nongweh ronerhahkwe ahadigen jinigon ne keaigenh ne sewadkahthos, nok yahtehonadkahthon; oni ahonathondeke jinikariwageh nise sewathonde, nok yahtehonathonde.

18 Sewadahonhsadat kadi ne tekarihwagenwahton ne rayenthos.

19 Neonen onhka ok yagothondek ne oweana ne ne kayanertseragon, oni yahteyagonigonhrayentase, ethone entre nonehshonhronon, neoni akte enhahawighte ne ne jikayenthonne raweryane. Ne ne geaenh ne raonha ne royenah ne kanen ne ne ohahakta yagayentane.

20 Nok raonha royenah ne kanen jinonweh oneayageh yeyoyentaonh, ne shahayadat ne rothondehkwe noweana, oni oksa ok wahadonharen jiroyenah:

21 Shegon yahteyohterondaonh ne raonhatseragon, nok ken ok nahhe shotonni; igen neonen wathonigonhrawenrye wahotswatanyonse no wagarihonni ne oweana, onhwajok ok ne enhagenhraten.

22 Raonha oni ne kenkayen wahayena ne kanen ohikogon, yeyoyentaonh raonha naah ne rothonde noweana; ne ne tehorengeanyon jiyonhwenjade, neoni ronigorhateanis ne atshogowahtshera, ne wao-donryoktahkwe noweana, ne wahonni yahteyonenhontaonh.

23 Nok kenkayen royenah ne kanen ne jinonweh niyonhwenjiyoh raonha naah ne rothondehkwe noweana, oni ronigonhrayentaonh; oni onhyanyenten waganenhonten, yagahewe, odyake teweanyawe, odyake yagahewe yayak niwahshen, odyake ahshea-niwahshen.

24 ¶ Shegon oya tekarihwagenwahton wahaderihwahtendyehte ne rononhageh, ratonne Ne ne kayanertseragon ne karonhyageh aniyocht jiniyoht ne rongweh royenthon kanenhiyoh ne raohehtageh:

25 Nok jinahe rotas, ne ne ronwahswense ehwarawe ehwahayentho kanenhakshen heanekerageh, nen tenhnon eren sarehte.

26 Nok onen waganahsonten, kanenhiyoh, nok oni ehnaaweane nen wene tekayehston ne kanenhshen.

27 Ne kadi ne ronwadinhase ne ehkanonhsagon ehwahonnewe raonhageh wahonniron, Seweaniyo, wahi genh sayenthon kanenhiyoh ne sahehtageh? ka nontawe ne kanenhakshen watkondyeste?

28 Raonha wahshagawenhahse, Ne na ne rakswenhse ehnahayere. Neoni ne ronwadinhase wahonwenhahse, ehkadi genhyeayagwe eayagwaroroke?

29 Nok wahrenron, Tohsa; onwa jiensewaroroke ne kanenhakshen, ensewadehrotongo oni neanekeri.

30 Ginyoh nyare wadonnisa ok enhskahne jinikanorarihs; jiniyageanekeriya enkheyenahse nenhadiyake, Sewarorok tewatyerenht ne kanenhakshen, sewahryenonni enwatshen neanech: nok sewarorok neanekeri kanonhsagon sewayont.

31 ¶ Shegon oya tekarihwagenwahton wahaderihwahtendyehte rononhageh, ratonne, Ne ne kayanertseragon ne karonhyageh ehniyoht jiniyoht ne kanen ne *mustard* kanen, wahi rongweh wahayentho raohehtageh:

32 Wahi neane niyeyagosthon nonenhagwegon: nok ne nen onen ondehyaron, aonhaah yohontowanen nohonte-ogonhah anyoh karonta, jiten-ogonhah ehgondahsehtahkwa onenhrogonhshon.

33 Shegon oya tekarihwagenwahton wahshagodatyase rononhageh: Ne ne kayanertseragon ne karonhyageh aniyocht jiniyoht ne yottengwahtha, ne nonhehtyen watkahkwe, onhsehte ahshen niwatenyendentserageh othesera, jiniyagahewe wagwegon wattengwahton.

34 ¶ Agwegon jinikariwageh rodatih ne Yesus jikentyohkowanen ne tekarihwagenwahton; tokat yahne thahodatige tkarihwagenwahton yahothernon thashagaweani rononha:

35 Ne kadi jiniyaweaonh yoderihwananonh jinihodadihne ne *Prophet*, ratonhahkwe, Iih engenhotongo ji ikshagaronte ne tekarihwagenwahton; Iih engeriho-dahsi orihwagwegon ne yoderihwahsehton shondonhwenjadasawen nonwa keayonhwenjade.

36 Ethone Yesus tonsahshagorenyate ne kentyohkowanen, neoni yahadaweyate kanonhsagon: neoni raotyohkwa ehwahonnewe, wahoniron, Tagwahrerih ne tekarihwagenwahton ne kanenhak-shen ne kahehtageh yohnyo-onh.

37 Raonha saharihwaserago wahshagawenhahse, Raonha ne wahayentho ne kanenhiyoh ne na ne Ronwayen nongweh:

38 Ne ne kahehtageh jiyonhwenjade: ne ne kanenhiyoh ne ne kakshatiyose ne kayanertseragon; nok ne kanenhakshen ne ne raokshata ne rorihwaneraakskon:

39 Ne ne shagohswense ne royenthon ne ne onehshonhronon: ne ne jiniyageanegeriyaks ne jinenwadonhwenjokten; oni ne rononnegeriyaks ne ne radironhyagehronon.

40 Ne kadi wahonni ne kanenhakshen karoron igenh oni ojistageh eayagoti enwatshen; etho onea ne neayaweanee jinenwadonhwenjokten.

41 Ne Ronwayen nongweh tkagonte tahshagonhane raodironh-yagehronon, agwegon enhshagodiyatodahsi jini-kentyohkowanenhsera agwegon ne yagogenhratani-onh, oni ne jiniyagotyeren ne wahetkenhseragwegon;

42 Neoni ehynchagodiyatondi jiyotekha-onweh nojire: ehnonweh neayondatyesahte onawigenha enwatoge.

43 Ethohkehe neane nyagoderihwagwarihsyon teayonderonronten onen jiniyoht ne karahkwa, ne kayanertseragon ne Ronwanihnehah. Onhka tewahonhtonde nayonronke, ginyoh rothondek.

44 ¶ Nare oya: Ne kayanertseragon ne karonhyageh jiniyoht nagohwista aonhsehton kahehtagon; ka ok nagenhatye ne rongweh ahatsenri, aonsahahsehte, ahadonharen nok ahatenhninon jinihoyen, nok yahadatnionse nehnnonweh tkahehtayen.

45 ¶ Nare oya: Ne kayanertseragon ne karonhyageh aniyohht jiniyoht ne ratenhninonhskowah, resaks ne senha yorihowanen:

46 Onhka, nonen ahatsenri ne senha yorihowanen, ahatenhninonke jinihoyen, nok yaonsahahninon nethoh.

47 ¶ Nare oya: Ne kayanertseragon ne karonhyageh jiniyoht ne ahare, kanyatarageh yayago, aontagaroroke ok niyategon:

48 Neonen aganahne, ayagohtarhehte ajakta, neoni enhontyen, tahadiyehstahsi yoyanere kahonwagon enhonneta, nok ne wahetken akte yenhonati.

49 Eh kadi oneane neayaweane ne onen enwadonhwenjokten: ne yeronhyagehronon ethohkehe enthonne, tenhadiyehstahsi ne yagorihwaneren ji iyete ne yagoyanere,

50 Eh yenhonwadiyatondi jiyotekha-onweh nojire: jiononweh neayondatyesahte agonawigenha tengyatoke.

51 Yesus wahshagawenhahse, Watisewahonhtyen-tane ken negea-enh jinikariwageh ken igen? Wahonni-ron etho, naaweane Sayaner-

52 Ethone sahenron rononhageh, Ne kadi wahonni niyadehati ne *Scribe* igense ronwadirihonyeani aniyohht kayanertseragon ne karonhyageh, aniyohht jiniyoht ne rongweh ne raonha raononhsagon, aontahayageawe ne raohwista jiniyategon ase oni nagayon.

53 Neoni ne onen shontongohte, ne ne onen Yesus sahaweyeanentane jinigon ne tkarihwagenwahton, nen ethone akte yeshawenon.

54 ¶ Neoni onen shiyahonsarawe raonha ji nonweh nihanagere, ehsahshagorihonyen *synagogue*, ne ne jina awen agwah rodirihwanehragwas, rontonyon, Ka-onhte nithohah ne gen rongweh jinihonigonra, ji oni nikashatstenhseroten ne raoyotenhsera?

55 Yah ken ne tegen ne ranonhsonnis royen-ah? yah ken ne tegen ne ronistenhah *Mary* konwayats? ne ron-dadenonhkwe, ne *James*, oni *Joses*, oni *Simon*, nok *Judas*?

56 Neoni rondeanosenha, yah onhte gen agwegon tewese? Ka kadi ne gen nithorihwenha ne geane rongweh jinikariwageh?

57 Neoni jiniyoht wahonateronse ne raonhageh. Nok ne *Yesus* wahshagawenhahse, Wahi nagoyatadogenhti yahteyaweh ne yahthahonwagonyenhsthage, ne ok jinnonweh nihanagere, oni raonha raononhsagon.

58 Neoni yah agwah othenon tehotyeren ne kayotenhserashatste, ne wahonni ne wahonni ji yahtethonehtahkon.

CHAP. XIV.

Herod *jitehoyatorehtha* ne *Keristus*.

ETHOHKEH nonweh *Herod* ne rahseanowanen rothonde jinihatyerha ne *Yesus*;

2 Neoni wahshagawenhahse ne shagonhase, Ne ne gea ne *John* ne Shagohnegoserahs: shotketskwen jirawenheyonhne; ne kadi wahonni jinikayotenhserashatste ok rononha shagonatonnis.

3 Igen ne *Herod* wahoyena *John*, wahonerenke, wahunhoton wagarihonni *Herodias*, ne nyatadegen-ah *Philip* rone.

4 Igen ne *John* wahawenhahse raonha, Yahteyoweyenhston nise ne tahejatyen raonha.

5 Ne wahonni warehre yoweyenhston onhte nahrenheye, tenhnon ne wahshagotshanige jinikentyohkwa, asegenh ne wahonni jironnehre ne gea ne royatadogenhti.

6 Nok ne onen ne *Herod* raodehnisera raodateanyote, ne kadi ne gonwayen-ah ne *Herodias* wathonnonnyahkwase raodihenton, oni eso wahaweryentiyone *Herod*.

7 Ne kadi aoriwa waharharatsten roweanahniron wahrenron ji ok nahoten engarihwanonton.

8 Neoni aonha, keanaawen onistenhah tayoteweyea-nonyen wagenron ne enhsiron, ne wahonni wagenron, Tagenonjistarhas ne *John* Shagohnegoserahs raononji kehratne engarake.

9 Neoni ne korahkowah wahonigonhrakshen; etho sane nea-neeh, nok ki roweanahniron thodatih, neoni ne enhskahne raditeron tehondonts, wahrenron ehniyawen kayetshiyon.

10 Neoni ehnaawen yahshagonhane, yahonwanyaryake ne *John* jithanhonhkwé.

11 Neoni eh kadi kahratyé nononji kehratne, nen yagonwayon ne kayatase: eh-yonsagahewe nononji onistenhnehah.

12 Neoni ne raotyohkwa ehwahonnéwé wathadihkwe ne oyeronta, wahonwayadata, neoni yahonwahrori ne Yesus.

13 ¶ Ne onen Yesus waharonke jinaaweane, nen eren warehte kahonweyagowahne jinonweh agwah ok akte: ne onen nongwehogan wahonronke, wahonwahsere wahnontenti ehtagehshon onen ne jikanatayenton.

14 Ne onen Yesus wahahtenti, neoni wahshagogen kent-yohkswanen, neoni ehnaaweane raonigonra wahshagotenre, ne wahonni wahshagojontanyon ne yagononhwaktanyonni.

15 Ne ji onen waogarahwe, raotyohkwa ehwahonnéwé raonhageh, ronton, Agwah ok keanonweh kayese thite-wese, oni ontongohte jiniyewadehniserenhawise; aonsayonhtentyongo ne jinikentyohkwa, kentens jikanatayenton niyahonne, ahadihninon nahadike.

16 Nok Yesus wahshagawenhahse, Tohsa niyare tetewadekhahsi; yetshinonht tenhnon nyare.

17 Neoni sahonwenhahse, Ken ok negen nigon jongwayen ne ok wisk niskanatarageh, nok tekenih kenjonhk.

18 Wahrenron, Karo kashawiht iihne.

19 Neoni wahshagawenhahse jinikentyohkwa rontyen kahehtageh; onen watrahkwe ne wisk nikanatarageh, oni tekenih kenjonhk, neoni, karonhyageh yahadkahthoh, wahayatateriste, oni wathayakhon ne kanatarohk; neoni yahshagaon ne raotyohkwa, nok yonsahsagonon jinikentyohkwa.

20 Neoni agwegon wahadike, wahonahtane; oni ton-sahadihkwe ne teyonatarahrionh tekeni-yawenre niwa-therageh waganahne.

21 Neoni jinihadih wahadike ken onhte wisk-niwea-nyawehtserahshen ongweh, thigate nagonhehtyen-ogon eksha-ogonhah oni.

22 ¶ Neoni ok yathaditogenhte ne Yesus raotyohkwa oni kahonweyagowahne, ne ne yahonnewe eren nakan-yataradih, niyarehkwe aahshagawenhahse jinikentyohkwa sasewahtenti.

23 Ne onen shonsahshagotori ne jinikentyohkwa ethone onontoharageh warehte ehyahadereanayen: ne onen jiwaogarahwe, raonhajiwa onton.

24 Nok ne kahonweyagowah nen kanyatarhen, yaty-aongwareehste; igen tagawerogate.

25 Neoni kayerihadont nateyonttenyese jinityogara-onh Yesus yahshagorane, rononha hire kanyatarageh.

26 Neoni raotyohkwa yahonwadkahtoh hire kanyatarageh, neoni wathodinigonryake, rontonyon Kanigonra iwe; neoni okthathodihenrehte ne ne kahteronnionh.

27 Nok oksaok Yesus yahadatih rononhageh, wahrenron, Thatesewatodek sewanigonhrahniironhak; Iih naah; tohsa sewahteron.

28 Neoni *Peter* saharihwaserago wahrenron, Sayaner, tokat nongen ise, tagwenhahs ehyege iih oni ohnegageh.

29 Neoni wahrenron, Kats. Neonen *Peter* wahadi-tahks ne kahonwagon, wahahtenti ohnegagehshon niya-hare, Yesus jitare.

30 Nok onen wahadkahtoh kawerowanen, wahohteronne; oni oksaok yononwirehtonhatye raonha, ehwat-hahsentho, wahrenron, Sayaner, tagyatagenha!

31 Neoni yogondatye yathahjatede ne Yesus, sahoyna, oni wahawenhahse raonha, O nigonhah jidisehtahkon, ne wahonni okthatesanigonrageh?

32 Neoni ji onen sahyadita, watkaweriyake.

33 Ethone jinigon ne radiyadit wahonweanidenhtase raonha, wahonniron, Ne ne togenhske-onweh Ise ne Royen-ah ne Niyoh.

34 ¶ Ne onen nenshathadiyayake, ehwahonnehte jiyonhwenjade ne *Gennesaret*.

35 Ne onen ne ongweh ne ehnonweh niyenagere thadinigonrate ronweanonhtonyon, ne wahontenhane jiniyenerahsera, neh ayondadyathehonne yagononhwakhtonyonni;

36 Neoni wahonweanidenhton raonha ne ne ronnehre ne ok oni ne yayoroohthe nagwahsnongeh jitethagwathonhseron ne raonena; nok jinigon ne ebna-eyere sayeyewentane agwah ehnonseyoyanereane jiniyagonhoteane songwekhene.

CHAP. XV.

Keristus wahshagotenyen ne Scribes, nok oni ne Pharisees.

ETHOHKEH ehwahonnewe jirenteron Yesus ne *Scribes* oni ne *Pharisees*, ken tahadiyenhtahkwe *Jerusalem*, ronton,

2 Ohneane-eh sentyohkwa wahadirihwahetkenhte ne orihwagayon jinihodirihwison-onne rodikstenhogongenha? yahtehonahjohare wahadinatarake.

3 Nok saharihwaserago wahshagawenhahse, Thenon kadi nise wagarihonni wesewarihwahetkenhte jinihtshiseweani ne Niyoh noyeri weani ne raodiriwa norihwagayon?

4 Igen Niyoh shagaweani, rawen, Ehtskonyenhsthak ne yanhah oni sanistenhah: oni, Onhka ok rawenratons ne ronihah, ne tens ronistenhah, oksaok renheye kenheyatne.

5 Nok sewaton, Onhka kiok enhawenhahse ne Ronihah tokat ronistenhah, Yondatawi, ne ne jioknahoten ise satseanonगतahkwa aonton;

6 Ne yahtenshagonyenstane ne Ronihah ronistenhah kishen, enhadadeweaniyoke. Keanisewayeren ise sewahson genh noyeri weani ne Niyoh yakhadi thiyeyoyentaonh nise sewagaheayontsera,

7 Jonha sewarihwagonnatagwen! yoyanere jinihoyeren ne *Esaias* jiniyehoriwagen nisegeh, rawen.

8 Kengayen nongwehohon karo tahontkwite iihne jiradihsagaronte, wahonkkonyenste ne ok ne radihskwentageh; nok ne raoneryaneh inon teyagwatere,

9 Ok horiwagon jiniyoht ne rongweanidenhtasehs, ne shagodirihonyeani nayerihwenhawe ne nongweh jinihdirihwisson.

10 Neoni yahshagononke ne jinikentyohkwa, oni wahshagawenhahse, Jathondek, oni sewanigonhrayentan:

11 Yah na neane nehsagon yenwadaweyate thayagohetkense nongweh; ken tenhnon ne ne ehtagondiyageane ehsagonh, ne engahetkenhte tenhnon ne ongweh.

12 Ethone ehwahonnewe raotyohkwa, oni wahnwenhahse, Yahken tesaderyentare ne *Pharisees* waho-dihsehse, ohnagengeh jironathonde jinigon wahsiron?

13 Nok saharihwaserago wahrenron, Jiniyategon kayenthon kengayen ne Ragenihah ne karonhyageh ne ne yahtehoyenthon, ok thondonni, engahtehrotongwen naah.

14 Ok thihoneronhatye, tehadironwegan shagonahsharine ne teyeronwegan. Neoni tokat teyeronwegan, enyohdadenontshine ne teyeronwegan, onea-neeh dejaron yeayeyateane jidekahronyonni.

15 Ethone *Peter* tahadatih wahrenron, To tagwahrori ne gea-enh tekarihwagenwahton.

16 Neoni Yesus wahrenron, Shegon oni gen nise yah-tesanigonhrayentase?

17 Shegon gen honnise ne jonha yahtese~~wan~~anigonhrayentaonh, ken wahi onhka ok ehsagonh henegwentagon wahi yengayentane, enskayageane wahhi?

18 Nok ne keaigenh nagonh entkayenhtahkwe ehsagonh wagayageane ne nagaweryane tonhtenti; ne enyagohetkenhte nongweh.

19 Igen agaweryane tkayagense ne wahetken yonnonhtonyonhs, enyontswate ongweh eayondaderiyo, kanahkwa yerihwaneraaktha, kanenhskwen, enyondadeanonwenhten, ronwahseanayesahta Niyoh:

20 Ne ne gen jinikariwageh waagohetkenhte nongweh: nok ne yahteyagohjohare othenon eayeke yahtha-gaongwetakshate.

21 ¶ Ethone Yesus nenwahahtenti keanonkadiah niyahathahine, *Tyre* neane ne *Sidon*.

22 Neoni, sadkahtoh, agonhehtyen ne ne Canaan-haga ehntaweh jiniyahawenonhatye, yatewahsenthoh raonhageh, wagenron, Askitenre nihi O Sayaner yayah *David!* kheyen-ah yonehragwaht yagonigonhrotagwen onehshonhronon.

23 Nok yahothennon tehorihwaseragwen yahskaweanat. Ne ne raotyohkwa ehtahonne, wahonwenhahse, Sasategwaht; igen tayongwahsere naah.

24 Nok saharihwaserago wahrenron, lih yahtetyongenhaonh ne ok ne yodiyatahton-onh teyodinagaronton-ah engyatago raodinonhsagon ne Iserathaga.

25 Ethone ehonwe oni wahonidenhtase, wagenron, Sayaner, tagyenawas!

26 Nok saharihwaserago wahrenron, yah ehteyoht nayondadehkhwa ne exhaogon-ah agonatarohk, nok herhar yagonwanatyense.

27 Neoni wagenron, Togenskeonwah, Sayaner; shegon hens ne herharhohon wagondike nonawajista-ogonah tonseane ne raweaniyoh raodekhwarahkne.

28 Ethone Yesus saharihwaserago wahrenron, wahrenhahse, O sanhehtyen, orihwiyoh tisehtahkonh; eh ki niyawean jiniseryentodenh. Ne kadi nagoyen-ah saoyane-reane ok ne kade ne *hour*.

29 Neoni Yesus heren sarehte, ne ohnonweh ken warehte thohah kanyatarakta ne *Galilee*; ken niyahare onontoharageh, ehyahatyen.

30 Neoni agwah kentyohkowanan, ehwahonnewe raonhageh shadihawinontye ojiyohta-ogon-ah, yerenhsakshense, teyeronwewon, yahteyondatih, yagoyatayeshaonh jinahoten niyagoyatawenhse, ehwaondadyathewe; sahshagojonte agwewon:

31 Eh ki niyaganiharane kentyohkwagwewon waho-dinehrago, wahontkahtoh yahteyeweanat wahondatih, yagoyatayesha-onh sayonton, yontshinogahtha sayonhtenti, teyeronwewonne sayegen: neoni wahonwayonwe-sahte ne Niyoh jinatewa Iserathaga.

32 ¶ Neoni Yesus yahshagononke ne raotyohkwa, wahshagawenhahse, Anyoh wakhetenre jinikentyohkwa, ne wahonni tyotkon itewese nen ahsen-niwehniserageh, yahotheron tehodiyen nahadike; yah oni teyaweh aon-sakheyatewahte ronondondyehton, wahi onwa senha en-hondonrishehrahkwen jiniyenhshonne.

33 Ne raotyohkwa wahonniron, Ka onhte naontawe ne ehniyaweta kanatarohk ayongwayentane karhagonh, ne aonton ayagohtane jinikentyohkowanen?

34 Neoni Yesus wahshagawenhahse rononha, To ni-yongwanatarayen? Wahonniron, jatahk, nok tohkara nikenjasa.

35 Neoni wahshagodatih kentyohkwagwegon wahren-ron ehtageh jatyen onhwenjageh.

36 Neoni watrahkwe ne jatahk nikanatarageh oni ne kenjonhk, neoni wahatonren, oni wathayakhon, oni wah-shaga-onh ne raotyohkwa, oni ne raotyohkwa yonsah-shagonon ne kentyohkowanen.

37 Neoni agwegon wahadike, oni wahonahtane: neoni tonsahadihkwe ne teyonatarahrionh jatahk niwatherageh waganahne.

38 Ne jinigon wahadike keanighadi kayeri niweanya-weehtserahshen nongweh, thigate agonhehtyen-ogon one eksha-ogon-ah.

39 Neoni ethone wahshagotori jinikentyohkwa, sa-onhtentyongo neoni kahonwagon sahondita, oni keanon-ka yahonneuwe ne *Magdala*.

CHAP. XVI.

Ne ne Pharisees radirihwasaks nahoten enwatenyendenh-ston.

NE ne *Pharisees* neoni shagat ne *Sadducees* ehwahon-neuwe, agwah ronwenhnire, radirihwagohe nashagotonahahse ne naontenyendenston jineayaweane karonhyageh.

2 Raonha wahshagawenhahse rononha, Ne onen shagarahwe, wesewenron, wehniseriyohsere; igen ne karonya onegwenhtara naaweane:

3 Neoni jiwaorheane, Nen nonwa wehniserakshatane; igen ne karonya onegwenhtara naaweane oni ehtageh notshata. O jonha sewarihwayesahton! sewagenhs jik-agonhsonte ne karonya; nok yah kenh tesewadkahthohs watenyendenhstahkon jiniyotyeren ne ken onhwenjageh?

4 Agwah sewarihwaneraakskon oni kanahkwa karihwaneren jisewahnegwahsade ne kadi sewesaks naontenyendenston; yah kadi othenon teyetshiyawire naontenyendenston, ne ok ne watenyendenston ne *Prophet Jonas*. Ethone sahshagoyatondi, akte sarehte.

5 ¶ Neoni raotyohkwa nen yahonnewe heren nakanataradih, rodinigonrhea-onh yahodiha kanatarohk.

6 Ethone Yesus wahshagawenhahse, Jadeanigonra-renh, oni sewanigonrarak ne yaweh raonattengwahtha ne *Pharisees* nok oni ne *Sadducees*.

7 Neoni wahonnigonhrayentonwe rononha, ronton, Ne onhte wahonni ne yahtetyongwaha ne kanatarohk.

8 Ne onen Yesus sahattoke, raonha wahshagawenhahse, O nigonhah tisewehtahkon, ohneaneeh seweanigonhrayentonni ne gen wahonni ji yahtha tisewanatarenhah?

9 Shegon genh yahtesewanigonhrayentase, yah oni teseweyahre ne wisk nikanatarageh wisk oni niweanya-weehtserahshen, nok to-niwatherageh tejisewahkwen?

10 Ken oni jatahk nikanatarageh kayeri niweanya-weehtserahshen, to-niwatherageh tejisewahkwen?

11 To-niyotyerenh anyoh yahtesewanigonhrayentase jinigon wakthare yahten neane ne jiniyotyerenh kanatarohk, kengayen ne sewanigonrarak yahthiyataondyehstane ne *Pharisees* neoni *Sadducees*?

12 Ethone wahodinigonhrayentane jiwahshagawenhahse yahtehonadeanigonrare jiyonttengwahtha ne kanatarohk, nok jishagonadatihs ne *Pharisees* oni ne *Sadducees*.

13 ¶ Neonen ne Yesus shiyaharawe jinonka ne *Cesarea Philippi*, wahshagorihwanondonse ne raotyohkwa, Nahoten, nongweh yonton ne onhka agenhake ne Iih, Ronwayen ne ongweh?

14 Neoni wahonniron, Odyake yonton ise ne *John* ne shagohnegoserahs; odyake yonton, *Elias*; oni odyake, *Jeremias*, ne tens enhskat ne rodiyadogenhtigenha *Prophets*.

15 Raonha wahshagawenhahse, Nahoten kadi nise isewehre onhka ne Iih?

16 Neoni *Simon Peter* waharihwaserago, wahrenron raonhageh, Ise naah ne Keristus, ne Yayen-ah ne ronhe-onweh Niyoh.

17 Neoni Yesus saharihwaserago wahrenron, raonhageh, Waesayatateriste, *Simon Barjona*: igen nonwaronh onegwenhsa arekho teyondadenatonna nisegeh, nok ne ok ne Ragenihah ne karonhyageh thenteron.

18 Neoni shegon sagonyenhahse, Kengayen ise wahi ne *Peter*; ne kadi negea-enh oneayageh engenonhsonni agenonhsadogenhti; neoni jikanhogahronton nonehshon yahnonwenton thatayonigonrharen ayotswaten,

19 Neoni Iih engonyahtkawen ne yenhotongwahthagon ne kayanertseragon ne karonhyageh: oni jioknahoten ensadahkwarige ne onhwenjageh enganeren oni karonhyageh; jioknahoten oni ensehsnerenhshi nonhwenjageh ensewatnerenhshi oni ne karonhyageh.

20 Ethone wahshagorihonten ne raotyohkwa, ne ne tohsa onhka nongweh ahshagodihrorih ji raonha ne Yesus ne ne Keristus.

21 Ehtondahsawen wahshagohrongate ne raotyohkwa, jineayawen ne tkagonte Yesus ehwarehte *Jerusalem*, oni eso raronhyagenhsere enhonwaronhyagenhte ne rodikstenhase oni radijihenhtajih oni ne *Scribes*, nentenhnon enhonwaryo, nok oni enshatketsko ahsenhadont niwehniseragehadont.

22 Ethone *Peter* wahoyena, oni tahadahsawen wahonhese, wahrenron, Keaniyoht inonh, na nise, Sayaner: yahteyaweht ehnyawen nisegeh.

23 Nok raonha wathatkarhateni, oni wahawenhahse ne *Peter*, Kenh saseht aknagen *Satan*: eso waskerihwanhihten niih: igen nise yahotheron tehsyatagenha, jinahoten ne Niyohneh, ne ok kengayen ne ongwehne.

24 Ethone wahrenron Yesus jinonkadiah ne raotyohkwa, Tokat nongenh onhka nongweh iihne entyenhte, ginyoh rotih jinahoten ne raonhatseragon, neoni terahk ginyoh ne tekayahsonte, oni ragwatswanonnah yageneh.

25 Igen onhka kiok rononhste jironhe aonsahadadya-tago enhoti naah: neoni onhka kiok enhoti jironhe niih ageriwa enhatshenrinaah.

26 Igen nahoten ne rongweh raoyanerenhsera, tokat nongenh tahadentsha onhwenjagwegon, nok ahohtonse ne raodonhets? ne tens nahoten aontahonwayon ne tahataton ne raodonhets?

27 Igen ne Ronwayen nongweh nen tentre raonwesenhtseragon ne Ronihah enthonne raoronhyagehronon; nen oni ethone enhshagotonren niyateyongwetageh entyoyanenhawe nagoyotenhsera.

28 Agwah wagwenhahse, Ken nonwe yegeanyate kenthoh yahthayegen ne kenheyon, jiniyore enhonwagen ne Ronwayen nongweh tentre ne raoyanertseragon.

CHAP. XVII.

Ne wathadadyatateni ne Keristus.

NEONI ohnagengeh yayak nonta, Yesus keaniyahshagoyatenhawe *Peter*, *James*, oni *John*, yatadegenah, keaniyahonne enegenh ne nagwah yonontowanen etho,

2 Neoni jinaawen wathadyatateni raodihenton; neoni ragonksne wadyohstarathene aniyocht karahkwa, neoni raonena wagenrageane jiniyoht wenteh.

3 Neoni, sadkahthoh, ehshagodigenh rononha *Moses* nok *Elias*, wathadihtharen raonha.

4 Etho yahshagoweanarane *Peter*, wahrenron Yesus, Sayaner, ighre yoyanere nongyonhageh ne ken ahete-weseke: ne nahsathondate, ahetyonni jiyerihwahseronnyatha; enhskat nise, enhskat oni ne *Moses*, enhskat oni *Elias*.

5 Shegon ne nihohthare, sadkahthoh, otshatase wagentshatayenthoh rononhageh: oni, sadkahthoh, ehtayeweaninegeane notshatagon, wairon, Ne ne gen-enh rionronhkhwa Iyen-ah, ne raonhageh wageryentiyohs; ehtshijathondek.

6 Ne onen raotyohkwa ronathonde, ehtageh wahont-konhs-ayen, oni eso wahodihteronne.

7 Neoni Yesus ehsarawe oni keaniyahshagoyere, wahrenron, Jadjetsko, tohsa sewahteronn.

8 Ne onen sontharatade ne radigahtegheh, yah oya nongweh teshshagodigenh, raonhaah ok ne Yesus.

9 Ne onen shatontahontsnenhte jiyononte, Yesus wahshagorihonten rononha, Tohsa onhka nongweh yetshih-rorih jiwatisewatyeronyonse, jiniyore ne Ronwayen nongweh enshotketskwen ji enhawenhayonne.

10 Ne raotyohkwa wahonwarihwandondonse, ronton, Ohneane-en ne *Scribes* ronton ne keaigenh *Elias* tka-gonte entewatyerenhte entre?

11 Oni Yesus saharihwaserago wahshagawenhahse, *Elias* togenhske enthatyerenhte entre, oni ensharihwag-watago orihwagwegon.

12 Nok wagwenhahse, *Elias* nen wahi sahagwatho, nok tenhnon yahtehonwayenterih, nok ehnahtonwayerese ji ok nahoten rodrihwison. Shateyoht oni ne Ronwayen nongweh horonhyagentahkwe.

13 Ethone ne raotyohkwa wahodinigonhrayentane jinahadatih rononhageh ne *John* ne Shagohnegoserahs.

14 ¶ Ne onen ehshahonnewe jikentyohkwayen, ehwarawe raonhageh rayatatogen rongweh, wathodontshotha, wahrenron,

15 Sayaner, ehjitenr niyen-ah; igen teheanonhwawenri, agwah yonehragwaht: yotkate ojistageh wagay-entane, oni yotkate ne awengeh.

16 Oni yehiyathe sentyohkwageh, nok yahtehodigwenyon nahonwajonte.

17 Ethone Yesus waharihwaserago wahrenron, O yahtha tisewehtahkon sewathaharagwahton kahnegwahsade! to-nenwe onhete lih ahewesheke? to-nenwe agwahrorihshege? to-kajatenhawh iihne.

18 Neoni Yesus wahariste nonehshonhronon, neoni tonsahyadekhahsi raonha: ne rakshaah sahonwajonte ok ne *hour*.

19 Ethone ehwahonnewe ne raotyohkwa, jirenteron ne Yesus, wahonniron, Oh-onhte niyotyeren yongwanoronse naonsahoyageaonh?

20 Nok Yesus wahrenron rononhageh, Wahonni yah wahi tetisewehtahkon: igen wagwenhahse, Tokat ensewayentageh ne tewehtahkon jiok niwa ne *mustard* kanken yahisewenron ne ken yononte, Isi satkwit; oni heren aontkwite; neoni yahotheron thahesewanoronse.

21 Ok sane ne ehniyoht yahthakayagensere, ne ok enwaton ne adereanayent oni eayagaondondyehte.

22 ¶ Neoni shegon ehshiyehaditeron *Galilee*, Yesus wahshagawenhahse raonha, Ne Ronwayen nongweh tehonwanigonhraserane rononha radisnongeh ne ronongweh:

23 Neoni raonha ronwaryohsere, oni ahsenhadont niwehniserageh enshadketsko. Neoni agwah wahoneryentakshen.

24 ¶ Ne onen shiyahonnewe ne *Capernaum*, ehnonweh rononha ne radiyenaks nohwista nyeroroks ehwahonnewe Peter-neh, wahonniron, Yah kenh ne yaweaniyoh tesegaryaks jiyehwistaroroks?

25 Wahrenron, Etho. Neoni onen yahadaweyate kannonhsagon, Yesus wahonhese raonha, wahrenron, Nahoten ihsehre *Simon*? ka nitkonnese nohwistajiradiroroks rononha ne karahkwashon rondyatagweniyohstha nonhwenjageh? agaonhageh genh tkayenhtahkwa ne raodikshatha katon neeh ne agaonhwenjayen?

26 *Peter* wahawenhahse raonha, Ne nagaonhwenjayen. Yesus wahrenron raonhageh, Nen kadi ekshaogon-ah yondadeweaniyoh.

27 Etho sane neane-eh, onwa ayethinagwate, nok keayahase kanyatarageh, sasahryokkawinehtseronti, enseskogo entewatyerenhte: onen tenwatskarawe, ehensetshenri nohwista: ne jenah, yasheyon rononha ne niih ongyawenhk denigwegonh.

CHAP. XVIII.

Keristus wahshagorihwadatshe ne raotyohkwa roneanidenhtonhak.

ETHOHKEH nonweh ehwahonnewe ne raotyohkwa jithenteron ne Yesus, wahonniron, Onhka tkayatagweniyoh na ne kayanertseragon ne karonhyageh?

2 Neoni Yesus yahshagononke ekshaah, raodinenherhenh wahshagodyatenhawah,

3 Neoni wahrenron, Agwah wagwenhahse, Ne tkaw-eaniyoh nensewaderagewe ne sarihwaneren, oni ehnenjohton jiniyoht nekshaogon-ah tokat yahten, yahnonwenton thaahs-adaweyate ne kayanertseragon ne karonhyageh.

4 Onhka kiok ehneayohton eayagonidenhton jiniyoht ne kengayen ne eksha-ah, ne shaeyadat yeayeyatagweniyoke ne kayanertseragon ne karonhyageh.

5 Neoni onhka ok eayeyena ehneayohton jiniyoht ne ken igenh eksha-ah niih akseanagon, iih naah waongyena.

6 Nok oni onhka ok ayondatkanhraten enhskat jingon ne niyasa ne ne tyagawehtahkon niihne, senha yoyanere raonha aheanihtyake katheseronnyatha oneaya, oni kanyatarhen yagototi.

7 ¶ Yagotenht onhwenjagwewon wahonni yagogenrat-ogon! igen tkagonte ehniyawenhserere eayagoyendake nahoten ne ayondatkanhronni; nok rotenhtasere netho rongweh ne enharihonni enjonderihwatewahton!

8 Ne kadi wahonni, tokat sesnongeh sahsigeh tens ensagaronni, stoskar, isi yasatih: senha wahi yoyanere yahthatazenontshontage enhsadaweyate jiyenhsonhegeonweh, jiniyoht nahsyatagwewon, nok jiniyenhenwe ojistageh jiyotekha yayasayatonti.

9 Tokat skahtegheh ensadyeronhkwen, kastahkwat, isi yasatih; senha yoweyenston skadih sagahradak enhsadaweyate jiyenhsonhegeonweh, jiniyoht dejaron ensagahratahke yayasayatonti onehshon tyotekha.

10 Senigonrarak tohsa sagenhraten ken igenh niyagasa; igen lih wagwenhahse, Ken igenh ne karonhyageh raodironhyagehronon tyotkon tehonwaganere jiragonhsonte ne Ragenihah ne karonhyageh.

11 Igen ne Ronwayen nongweh kentho thawenonhton ne aonsahsagoyatago ne yagoyatahton-onh.

12 Nahoten ihsehre? Tokat rongweh ronahskwayen enhskat tegonnyawe teyodinagaronton-ah, nok enhskat agayatahton yah genh thiyahahtkawe ne tyohton niwahshen tyohton yawenre, oni jiyonontenyon niyenhenre, enhayatisake ne wagayatahton?

13 Nok tokat nonna aonsahayatshenri, agwah wagwenhahse, Enhadonharen senha engarihonni skayadat, jiniyoht ne tyohton niwahshen tyohton yawenre ne yah-teyodiyatahton-onh.

14 Ne kadi shateyoht yahtehanonwese ne Yanihah ne karonhyageh renteron, ne ehnyaweane ken igenh enhskat ne niyagasa ayontkaronni.

15 ¶ Isi nonwe shegon, tokat jadategen-ah ensyaderih watewahten, ehayahase ehtsrorih ohnea-neeh ehnaht ayere ok senonhaah: deseniogon tokat ennyadahon hsadate, nen wahi wesenirihwahseronni ne jadategen-ah.

16 Nok tokat yahthahyadahonhsadate, ethohkeh enhskat tekenih niyagonh yashenonk, engarihonni jieayagonthondeke tekenih ahshen nihadi niyadekaweanageh engarihahniraton.

17 Nok tokat shegon onea-neeh yahthashagodahon-sadate, satrorih ononhsadogenhtigeh nok: tokat yahthenhadahonsadate jinenhonwayerase ne kentyohtkwadogenhti, eh ki nenhayatodenhake nisegeh jiniyoht ne yahteyagorihwiyohston oni enhskat ne radihwistaroroks.

18 Agwah Iih wagwenhahse Ohkiok nahoten ensatahkwarige nonhwenjageh oni karonhyageh entewatahkwarige; oni nahoten ensewatnerenhshi nonhwenjageh oni ne karonhyageh engahnerenhshyon.

19 Shegon oya Iih wagwenhahse, Ken igenh tokat teseniyahshe ensenirihwisa nonhwenjageh ne nagwah othenon yoweanayen enyerihwanonton, wahi eh kadi nenhonwanatyrase ne Ragenihah ne karonhyageh.

20 Igen tokat tekenih tokat ahshen niyagonh yagotkeanison ne Iih akseanagon, eh igete agonenherhen.

21 ¶ Ethone *Peter* warawe raonhageh, oni wahrenron, Sayaner, to-nigon nagyadategen-ah enhagenigonhrakshate, nok aonsahirihwiyohsten? ji genh niyore jatahk nenwatnaneta?

22 Yesus wahawenhahse raonha, Yahthagiron nisegeh, Jiniyore jatahk niyohnanet: nok, Jiniyore jatahk niwahshen ne jatahk niyohnanet.

23 Ne garihonni ne kayanertseragon ne karonhyageh teskyatyeren jiniyoht rayatatogen korahkowah, jinigon ne shagonhase rohratonhatye jinihonatyeren.

24 Ne onen naah tahadahsawen taharade, shayadad ronwayathe raonhageh rogarotanih oyeri niweanyawe-eh-tsherahshen kahwistowanen;

25 Nok jiyahotheron tehoyen nahagaryake, ne raoyaner waharihwise nahonwatenhninonke, nok oni ne rone, shagoyen-ogon-ah, oni jinigon ahoyentageh raowenhson-ah, ne aontkaryaktahkwe jinayawen.

26 Ne ronwanhase ne wagarihonni ehtageh wahadyatonti, wahonidenhten, wahrenron, Sayaner, tagitenr sad-eanigonhkatstat, nok engongaryakshe agwegon.

27 Ethone ne Royaner ne ronhase wahotenre, sahohtkawe, wahaon ne rogarotanihne.

28 Nok ne ok shahayadat ne ronhase wahayageane, yahoyadatshenri ne shatehonwadinhase rogarotanih enhskat teweanawe nikaristageh; ehwahoyena, wathohonryake, wahrenron, Takkaryakshe ne gongarotanih yongondaty.

29 Neoni ne gen ne shatehonwadinhase ehtageh jitehahsitageron wahadyatonti, wathononweron, wahrenron, Sadeanigonhrahnrat engongaryakshe agwegon jinior-iwa.

30 Nok yahtehothondaton: nok wahahtenti, oni jiyondadenhotonh-khwa, yahoyatonti jiniyore enwataryake ehneayohton.

31 Ethone onen shatehonwadinhase wahontkahtoh jinaaweane, eso wahodinigonhrakshen, ehwahonnewe jirenteron ne raodi-yaner wahnwahrori jinaaweane.

32 Ethone ne Royaner, ohnagengeh shiyahononke raonha, wahawenhahse, O sarihwaneraakskon gonhase, Iih wahi gontenron gonkarotanihne, wahnnonni jiwahskerihwanegen iih:

33 Yah kadi genh nise aheseron khetenr oni iih ne shateyonkhinhase, jiniih niwagyeren gontenronh wahi.

34 Neoni ne raoyaneta wahnagonni, eh kadi yahohtkawe jironnese ne shagodironhyagentha, jiniyore enharihatshenri jineayaweane onen enhogaryakshe jiyogarote.

35 Eh kadi niyoht karonhyageh thenteron Ragenihah ehneane nenhayere nise, tokat ehentkayenhtahkwe se-ryane yahthaonsahsheriwyohsten jiok niyondategen-ah ne nayagorihwanhige.

CHAP. XIX.

Keristus wahshagojonte ne yagononhwaktanyonni.

NEONI ehnaaweane, ne onen Yesus shahaweyea-
nentane jinithodatih, nen eren tethawenonhton ne
Galilee, eh na tethawenonh keanonka *Judea* isi nonka-
dish ne *Jordan*;

2 Neoni kentyohkowanen ne ronwahnongeratye; oni
shagojontanyon nehnonweh.

3 ¶ Neoni ne *Pharisees* ehwahonnewe oneane-eh ra-
onhageh, jiniyoht ronwanigonhrayeheronh, wahonniron,
Yoweyenston genh ne rongweh nahayatonti ne ronyag
onh ji ok nagarihonni?

4 Neoni saharihwaserago wahshagawenhahse, Yah
kenh tesewaweanahnotonhs, ne raonha ken wahi rohson
jidyodahsawe, shagoyatonni ejin oni agonhehtyen?

5 Ne kadi wahonni Wahrenron, ne rajin enhoyatonti
ne ronihah oni ronistenhah, nok tkagonte yateayatyehte
ne rone; oni tnikhentenhnon sniwarat?

6 Ne kadi wahonni onen yahthatesnikhen, nok tenh-
non sniwarat. Ne kadi wahonni nahoten Niyoh tehyo-
ehston, yah onhka nongweh thayerihsi.

7 Rononha sahonniron, Ohkadi neane-eh ne *Moses*
shongwarihwawi nagahyatonke ne teyondekhahsyatha
enhayatonneke ne rone?

8 Raonha sahshagawenhahse, wahi *Moses*, ne waga-
rihonni jiniyohniron ne seweryahsagon, wahathondate
ne tahesewadekhahsi ne tisewenteron: nok jidyodahsawe
yah ehtyohtonne.

9 Neoni nonwa Lih wagwenhahse, Onhka ki ok en-
hayatonti ne rone, ne ok ne keaigenh ne kanahkwa
engarihwanerake, oya enhonyage, waharihwanerake ka-
nahkwa: oni onhka ok rodinyak ne teyodekhahsyon
waharihwanerake kanahkwa.

10 Raonha raotyohkwa wahonniron, Tokat kadi kea-
neayaweane ne rongweh ne rone, yah kadi teyoyanere
nayagonyake.

11 Nok wahshagawenhahse, Agwegon nongweh yah-
teyeyenahs jinigon katon, ne ok agaonhageh ne waon-
daton.

12 Igen odyake *Eunuchs*, tehshagodinyoseronhs eh-niyaweaonh ji ongweh ronaton-onh jironwanadeweton; neoni odyake naah ne *Eunuchs*, ne ne kabsahani ne ongweh: ehniyagoyeren nok shegon oya ne *Eunuchs*, ne ne rononha ronadattonni igen ne kayanertseragon ne karonhyageh aoriwa. Raonha ragweni rayenah, how nisa rayenah.

13 ¶ Ethone nonweh ehwaondadyathehon eksha-ogon-ah, nen keaniyahshagoyere tashagonihsnonhsaren, ohadereanayen: neoni raotyohkwa wahonwanariste.

14 Nok Yesus wahrenron, Karo ityenht neksha-ogon-ah, tohsa ne teyetshiyeryentharen; igen ehniyeyatoden-hse ne kayanertseragon ne karonhyageh.

15 Neoni wadehshagonihsnonhsaren, oni ethone eren sarehte.

16 ¶ Neoni, sadkahthoh, shayadat ehwarawe waha-wenhahse, Seweaniyohtseriyoh, To-naagyere ne yoya-nere, ne aongyentane ne jiniyenhenwe agonhege?

17 Neoni sahawenhahse, Ohneane-eh wahskwenhahse yoyanere? yah ne gen onhka teyagoyanere ne ok enhskat, ne ne, Niyoh: nok tokat enhsadaweyate jiyahson-hege, ginyoh senigonrarak ne Oyeri weanah.

18 Raonha wahawenhahse, Kanikayen? Yesus wa-henron, Tohsa ongweh sheryoh, Tohsa kanahkwa san-hik, Tohsa senenhsko, Tohsa sheyeaowenhten onhka;

19 Ehtskonyenhsthak yanihah oni ne sanistenhah; oni, shenoronhkhwak nongweh jinise nihsadadenoronh-khwa ehnajer.

20 Ne ranegenhteron, wahrenron Agwegaon wagyeriton keaigenh ken shitewagyen-ah ehshigyatodenh shegon nonwa: nahoten shegon tyodokte?

21 Yesus sahawenhahse, Tokat tesatonhwenjonni nahesaderihwagwarihsyonhak, wahnyoh ginyoh saten-hinon jinisayen, oni sheyon ne yagotenht, oni ensayentane natshogowahtsera ne karonhyageh; oni tagwatswanon nah iteneh.

22 Nok ne ranegenhteron ji nen rothonde jiwahadatih, eren sarehte wahonigonhrakshen: igen rogate yawetow-anen royen.

23 ¶ Ethone Yesus wahrenron ne raotyohkwageh, Agwah wagwenhahse, ne nagotshogowah otskerongeh ne yayondaweyate ne kayanertseragon ne karonhyageh.

24 Shegon oya Iih wagonyenhahse, Senha anyoh watyesenha ne karyotowanen ne *Camel* taondohetste jitewahonhtagaronte tewaderonwarongohtha, jiniyoht ne agotshogowah yayondaweyate ne kayanertseragon Ni-yohneh.

25 Neonen raotyohkwa ronathonde, agwah eso jiniyoht ne wahodinehrago, ne ronton, Onhka kadi onhnongenh ne gea-enh eayagoyatateri tayontongohte?

26 Nok Yesus wadeshagotkaneren, oni wahshagawenhahse, agwah sane ongweh okthikanoron; nok ne Niyoh agwegon yahotheron tekanoron.

27 ¶ Ethone *Peter* waharihwaserago, wahrenron, Sadkahthoh, agwegon niih yongwatyon, ise wagwahsere: nahoten kadi eayongwayentane?

28 Neoni Yesus wahshagawenhahse rononha, Agwah Iih wagwenhahse; negeane ise nonwa wahi itewese, ne ne jienjontnegwahsagwatago, ethone ne Ronwayen nongweh neayenhshenterondake raonaktageh jithaonwesenhtsera, eh onise neayaweane tekeniyawenre niwatyendah-tserageh jinonweh ensewatyen, eayetshiyatorehte ne tekeni-yawenre roditarageh ne Iserathaga.

29 Neoni niyadeyagon onhka rotyonh jirononhsote, ne tens raongweta, tens kayen ne yadeanosenhah, ronihah, ronistenhah, rone, shagoyen-ogon-ah, ne tens ne raonhwenja, oni ne iih agerihonnyat keaneayaweane weanyawe yohnanet enjagotyeritshe, nok oni eayondaweyate jiniyenhenwe yeayagonhege.

30 Nok yawetowanen tyagotyerenhton ne ohnagen enjagaonni; oni nohnagen ne tendyontyerenhte.

CHAP. XX.

Keristus jinithodeanonwakte ne yorihonni teshagorenyaton ne rodiyotenhs jiniyoht ne raohehtageh.

IGEN ne kayanertseragon ne karonhyageh jiniyoht igenh ne rongweh ahononhsotageh, onen wahaya-geane orhongene wahanhatserisakha nayagoyoten ne raohehtageh.

2 Neoni ne nen wahaderihwissa ne rodiyotenhs skaristat sewehniserat jongwedat, onen yahshagoreke raoh-ehstageh.

3 Neoni sahayageane are nahshenhadont *hour*, oni washagotkahthoh odyake skeanen thiyete jiyontkehron-dahkhwa,

4 Neoni wahshagawenhahse rononha, Wasene onise seniyoten kahehtagonh; neoni jinitkarihwayeri ehnenk-karyake. Neoni wahonhtenti.

5 Shegon are oya yonsahayageane ne yahyakhadont *hour* tyohtonhadont oni, etho are ehnahayere.

6 Ne onhte enhskah-yawenre *hour* nare sahayageane, shegon oya wahshagoyadathenri skeanen yegeanyate ronatsshorehton, oni wahshagawenhahse, Ohneane-eh ne ok ne kensewageanyate kenwendatye skeanen sewatsho-rehton?

7 Rononha wahonwenhahse, Ne wahonni yahtense teyonkhinhaonh. Raonha wahshagawenhahse, Wasene onise kahehtageh yaseniyoten; jinensewatyere jinitkarih-wayeri, ehnensewatkaryakshe.

8 Ethone ne nenwaogarahwe, ne royaner rohehtayen wahawenhahse ne ronhatseragweniyo, Yahshe-nonk ne rodiyotenhs, sheyon jinathondentsha, ehtewadahsawen ji ohnagen yahaonni yenskahewe jityotyerenhton.

9 Neoni onen ehshahonnewe ne ronwadinhaonh ken onhte enhskah-yawenrehadont *hour*, onen wahadiyena niyadehadih skaristatshon.

10 Nok ji onen ne tyotyerenhton warawe, ronnerhah-kwe isi onhte gen nonwe senha eayagwayena; etho kadi oneane naawen niyadehadih skaristatshon.

11 Ne onen jiwahadiyena, ohsnonniyoht wahonasthose ne raodiweanageh jinahonwenhahse ne rongwetiyo ne rononhsote,

12 Wahonniron, Keaigenh ne ohnagen tonderihokten ne ok enhskat, *hour*, neoni jinahsheyere satyaweanen non-gyonha, ne yongwaronhyagen jiniyodahkondak jiniyotarihen ne wehniserade.

13 Nok raonha saharihwaserago shayadat, wahrenron, Dyatenro, yahtewageron akte genh tagerihwayeritshe: eh wahi niyongenirihwison skaristatshon?

14 Tesehk ne sawenkh, eren saseht; ehnengyere oni negea-enh nohnagen eayahonni shateayaweane oni nisegeh.

15 Yah kenh teyorihwaweyenston ne ji ok naagyere ne ne yadegyatih agwawenkh? Sewagara wahetken genh ne aoriwa ne Iih wagyanere?

16 Ne kadi nohnagen tendyontyerenhte, oni tyotyerenhton ne ohnagen: igen yotkate ne eayondadenhahse, nok niyagonhah ne yondadyataragwen.

17 ¶ Neoni ken ware *Jerusalem*, wahonne ne tekenih shadire jiniyahonne, ehnonweh nahshagawenhahse, rononha,

18 Jadkahthoh, ken nonwa wetewe *Jerusalem*; ne Ronwayen nongweh keaniyawenhshere teahonwanigonhraseren jinonka radijihenhstajihne oni Scribes-neh, ronwadewendehtane enhonwaryo,

19 Ehyenhonwahtkawe jinonka ne *Gentiles* enhonwadentoryate, enhonwahsohkawawishon, oni tenhonway-entanharon raonha, neoni ahshen niwehniseragehadont enshatketsko.

20 ¶ Ethone ehwaonwe raonhageh ne ronwadinistenhah ne *Zebedee* raokshata ronne nagoyen-ogon-ah, ronwarihwanegeanire raonha, oni agwah thyoriwate rorihwanontonre raonhageh.

21 Neoni wahrenhahse aonha, Nahoten senyente? Wagenron raonhageh, Aahsheyon keaighen tehniyahshe khuyen-ogon-ah ehahyatyen, enhskat jiseweyendehtahkon, enskat sehsenegwatih, ne sayanertseragon.

22 Nok Yesus saharihwahserago wahrenron, Yehtejaderyentare nahoten senirihwanonton. Ensenigweni genh ne ahesenihnegira ne enjate ne *cup* ne Iih engate nenknegira, oni ahesenirihwiyohste adatnegoserhon ji niih nahoten wagatnegoserahton? Wahniron etho niyoht, eayageanigweni.

23 Neoni wahshagawenhahse, Ensenihnegira orihwiyo-onweh ne *cup* nagwawenhk, neoni enjatnegoserahte ne yerihwiyohstahkhwa jinahoten ne wagatnegoserahton; nok keagayen nayontyen jikeweyendehtahkon, oni skenegwatih, yah iih tewagawenhk nakheyon, nok ne eayondaton ne nonhka ne enhonwatsheronnyahkwenthose ne Ragenihah.

24 Neoni ne onen ronathonde noyeri nihadi, jiniyoht ne wahshagodinagwase ne geane tehniyahshe yadadenonhkwe.

25 Nok Yesus yahshagononke raonhageh, wahrenron, Sewaderyentare wahi ne radiyatagweniyose ne *Gentiles* ne rontenyentenhs jikentyohkowanenhse enegenh ashagonatragwen, jinigon oni ne radikowanenhse ondeweyenhstha ne nashagonaderihwagweniyohsten.

26 Nok yahehthayaweane jonhageh: igen onhkaok enhakowanenhake jinijonh, ne ki naah enjisewayatara-seke:

27 Neoni onhka ok jinijonh enhayatagweniyoke, ne ki naah sewanhatsera genhak:

28 Shaoriwat ne Ronwayen nongweh yah tero gen-tho ne ahonwatsteristhageh, nok tenhnon ahshagotster-iste, oni ahahtkawe ji ronhe ne engarihonni eso yagonh.

29 ¶ Ji nen eren sahonnehte jinonweh *Jericho*, agwah kentyohkowanen sahonwahsere.

30 Neoni, sadkahtoh, tehniyahshe tehnironwegan ohahakta niteron, nen ronathonde Yesus ehwahaton-gohte, ehwathodiherenrehte, yaton, Tagenitenr, O Sayaner, ise Yayen-ah ne *David*!

31 Nok jinikentyohkwa ronwanahristha, ne thahyatotade; neok hegen senha tahyaderayatahkwe, yaton, Tagenitenr, O Sayaner, ise wahi Yayen-ah ne *David*!

32 Neoni Yesus wathatane watogen, oni yahshagononke, wahrenron, Nahoten isenehre nagyatyeras ne senonha?

33 Wahniron jiwahonwenhahse, Sayaner, ne nagenigahtegeh aondenhotongon.

34 Eh kadi naaweane Yesus wahshagotenre rononha, keaniyahayere ne nigahtegeh: yogondaty kani waoyanereane wahnigen, oni rononha wahonwahsere.

CHAP. XXI.

Keristus wahohsaton Jerusalem warehte ne ne arekko tekaweyendeht.

NEONI onen okhetho ronne ne *Jerusalem*, nea ehnonweh jiyononte ne *Bethphage*, jiyonontowanen ne *Olives*, ethone yahshagonhane ne *Yesus* tehniyahshe ne raotyohkwa,

2 Wahshagawenhahse, Waseneh kanatagon, yadesenitogenht ok ehnonweh, oni oksaok enseniyadatshenri adenati ehkaneron: nidyoyen-ah igene; senihnerenhsi, karo endiseniyatenhawihite iihne.

3 Neoni ne tokat onhka nongweh othenon enyets-hiyenhahse, enseniron, Ne Royaner tehotonhwenjonni, negea-enh; yogondatye ehneayaweane endyonteanyehte.

4 Agwegon ehnaawen, ne kati yahaweanayerine jinihawen ne royatadogenhti-genha, rawen,

5 Shehrorih ne ondadyen-ah ne *Sion*, Sewadkahthoh, Sewakorahkowah tare isegheh, royatanetskha, rohse adenati, oni yedeweton yowirine.

6 Neoni etho wanehte ne raotyohkwa tehniyahshe, eh kadi naaweane *Yesus* jinahshagoyerase,

7 Neoni wahniyathewe nadenati, oni noyen-ah, oni raonosa-ogon wahadiren, ehwahonwentskwaren.

8 Neoni yonehragwaht kentyohkowanen wahadita-gwenrhtarho raonosa jiniyenhohse; odyake wahadinhahtoskare ne karonta, wahadigeron aktatye jiniyenhohse.

9 Neoni jinikentyohkwa nohenton ronne, oni ronwadihnonteratye, rontonne, *Hosanna* ji nonga royen-ahne *David*! Royataderiston raonha warawe raohseanagon ne Royaner; *Hosanna* enegenhji!

10 Ji onen sharawe *Jerusalem*, watyanatishonhkwe jinaheyageane, wairon, Onhka ne gea-enh?

11 Neoni jinikent yohkwa waairon, Ken wahi ne *Yesus*, ne royatadogenhti Nazarethaga ne *Galilee*.

12 Neoni *Yesus* warehte ononhsadogenhtigowahne, Niyoh raononhsa, oni sahshagoyatinegenwe neh rontenhninonhs oni tehadinonwayentha, oni wahagarhathohseron natekhwarah-ogon jiradihwistahrahkwa, oni eanitskwarahk jiraditeron norite rontenhninonhs;

13 Neoni wahshagawenhahse, Kahyaton negea-enh, lih agenonhsa kanatonhkwen jikanonhsote eayondereanayendahkwageh; nok nonwa ne ne kanenhskwa jonnyaton.

14 Neoni teyeronwekhon yontshinogahtha ehwaonwe kanonhsowaneaneh; oni sahshagojonte.

15 Ne onen thadiyatagweniyose radijihenhtajih oni *Scribes* wahontkahthoh yotyanatenyon jinahatyeranyon, neoni ne eksha-ogon-ah wathodihehrehthe kanonhsagon, ronton, *Hosanna* ne royen-ahne *David!* eso wahonateronse,

16 Neoni wahonwenhahse raonha, Sathonde genh nahoten ronton? Neoni Yesus wahrenron, Etho: yah ken nonwenton tesewaweanahnoton, wahi Jiyehsagahronton owirasa yenongerha oni waskweni ehwagondiyageane kanentontsera?

17 ¶ Neoni wahshagoyatondi, sahayageane kanatagon ken warehte *Bethany*, ehwahonhsontorarake.

18 Nonwa orhongene, ehsarehte kanatagon, nen wahatonhkaryake.

19 Neoni wahadkahthoh kerhide jogahrehtese jiniyahawenonhatye, yaharawe, yahotheron teyoniyonte, ne ok nonerahte, wahrenhahse, Tohsa nonwenton sewahyanyonten. Eh kadi naawen wagarontagenheye onhstathen.

20 Ne onen wahontkahtho ne raotyohkwa, wahodinehrago, ronton, Yohsnore agwah ontagenheye!

21 Yesus saharihwaserago wahrenron ne rononhageh, Agwah wagwenhahse, Tokat endisewehtahkon tohsa tesewanigonragehak, yah ne ok tegen ne ehnaheseyere jinaawen ne jogahrehtese, nok shateyoht, senhas ne ken yononte, Sadonnek, kanyatarageh seht, tkagonte ehneawaweane.

22 Neoni agwegon jioknahoten enhserihwanonton adereanayentseragon, entisehtahkon, unhsyena naah.

23 ¶ Neonen sharawe ononhsadogenhtigowahne, ne tkayatagweniyose radijihenhtajih oni rodikstenhase nongwehogon ehwahonnewe raonhageh jinonweh nihshagorihonyeani, wahonniron, Ka-negea nonweh tyesarihwawi ne kashatstenhsera jinisatyerha? onhka sashatstenhserawi?

24 Neoni saharihwaserago wahrenron, Iih oni gwarihwanonons joriwat, ne ne tokat eayonkrorih, Ehoni neayaweane engwahrerih ka-tkayatagwenis nageshatstenhsa jinigatyerha.

25 Thoigen adatnegoserhon ne *John*, kanidyawenon? karonhyageh katon ongwehne? Neoni wahonigonhrayentonwe, rontonyon, Wahi tokat ahewenron, Karonhyageh nidyawenon; oksha ok enhenron, Oh kadi neane-eh yahtetehjisewehtahkon?

26 Nok, tokat entewenron, Ongwehne; eayethitshani ne nongweh; igen ronwarhwawase naah ne *John* iyenhre royatadogenhti.

27 Neoni sahonwarhwaseragwen Yesu, waairon, yahthayagweni ayagwenron. Oni sahshagawenhahse, Yah ki onih thagwahrerih jinityawenon nageshatstenhsa jiniwagyote.

28 ¶ Nok nahoten isewehre ise? Rayatatogen rongweh tekenih tehawirayen ninegenhteron-ah; yaharawe ne tkakowanen, jirenteron, wahrenron, Kyen, waas sayoten akhehtageh.

29 Raonha saharihwaserago wahrenron, yahthaonton; nok ohnagen sahadatrewahte eh kadi warehte.

30 Neoni eh warehte ne ne shayadat, ok ne shagat jinahoyerase. Neoni saharihwahserago, wahrenron, Eh yenge; nok yahehthiyehawenon.

31 Ka-nikayen ne tehniyahshe ehnaheyere jinithonigonhroten ne ronihah? Wahonniron, ne wahi ne tyotyerenhton. Yesu wahshagawenhahse, Agwah wagwenhahse, Keaighen radihwistaroroks nok ne odinhehtyen yonatyesen jigononhe jiniyoht neane yahayonwe ne kayanertseragon ne Niyohne nok nise nohnagen.

32 Igen ne *John* iro isegheh aderihwagwarisyonhtse-ragon, nok yahtejisewathondati; nok ne radihwistaroroks oni yahtegontogentha ronwaweanaragwen sayerihwiyo-hste: nok nise, tesewaganere, yah kadi tejisewadatrewahton, ne naondesewehtahkon raonha.

33 ¶ Jathondek nare oya tekarihwagenwahton : Keaig-enh rayatatogen rononhsote, royenthon ne raohehtageh, oni wahateaenhronni, oni wahatagwate wahronni ne *Wine* yagonyatha, oni rononhsonni yononhsahniron, oni wahshagoni agoren eayagoyoten, nok ne raonha inon niyahrehsere jiyenageronyon :

34 Ne onen thoha jinikanorarihs, onen yahshagonhane nayagoyotensha, ne naonton ahadigo ne waganenhonten.

35 Neoni ne rodiyotenhs wahshagodiyena ne shagonhase, wahonwayesahte, nok enhskat wahonwaryo, thikade oneaya ronwayenhtanyon.

36 Nen, are oya yonsahonhane ne shagonhase senha eso radih jiniyoht ne tyotyerenhthon : eh kadi oneane nahshagodiyere rononhageh.

37 Ne kadi oneane ohnagen jinaawen yahonhane onen ne royen-ah, wahrenron, Tokat enhonwadahonhsadate niyen-ah.

38 Nok ne onen thodiyote wahonwadkahthoh royen-ah, nok wathondadenhahse, Ne ne gea-enh ne rayatagweniyo raowenhk ; how ehjitewaryo, nen tenhnon tenjitetwagwagayonte jinihoyendahkwe.

39 Neoni wahonwayena, neoni isi yahonwayatondi jikahehtayen, eh yahonwaryo.

40 Ne onen ne Royaner, ne raowenhk jikahehtayen enrawe, to-nenhshagoyere ne ehrodiyote ?

41 Rononha wahonwenhahse, Raonha tkagonte wahshagoronhyagente enhahtonde oni ne ronongwetakshen, oni thiyete ensehshagonhane eayagoyoten, ne kadi enhaduweanotahkwe erihoteweyenton nenganenhonten jinikanorarihs.

42 Yesus wahshagawenhahse, Yah ken nonwenton tesewaweanahnoton ne kahyatohseradogenhtigeh, Wahi oneaya ne radinonhsonyatha ne isi yahonati, ne kadi nonwa kayatagweniyo jikanetsker oneaya eayeyen : ne wahi negea-enh ne Royaner rodeweyeana, ne wahonni yonehragwaht nongwagara yonadkahthon ?

43 Ne wahonni katon Iih nisegeh, Ne raoyanertsera ne Niyoh enjesahgwahse, ne eayondaton ne niyadeyagaonhwenjageh tokat neane aganenhonten.

44 Neoni onhka kiok eayagoneayeane ne keaigenh tengarine naah jironhe: nok onhka kiok ahoneayeane engatheseronni ne rayerongeh.

45 Neoni rajihenhstajihkowatshon oni *Pharisees* ronathonde ne tekarihwagenwahton, ronnehre iih onhke genh yonkhiton.

46 Nok ji onen ronnehre keaniyahonwayere, wahshagoditshanige nongwehogan, asegenh jironnontonyon negeane royatadogenhti.

CHAP. XXII.

Tokarihwagenwahton ne kanahkwage jiniyoht Korah-kowah royenah.

NEONI Yesus waharihwaserago shegon oya shashagawenhahse ne ne tkarihwagenwahton ji wahadati, wahrenon,

2 Keaigenh ne karonhyageh thoha taonsagyatyeren royatadogen korahkowah, ne wahonyakten ne royen-ah,

3 Neoni yadeshagohjaren ne shagonhase ayontkwatane karo aontayenhte jiwadeanyote: nok yahtethonah-tentyon.

4 Nare, oya yonsahatentane ne shagonhase, wahrenon, Shehrorih ne ronweaneanyote, Jadkahthoh, onen wage-weyeantentaonh neayeke;agetshenen-ogon oni yonaresenhse kawenthon, neoni agwëgon nen kaweyeanentaonh; karo kadi kaseneht jiyagonyagon.

5 Nok wahontyesahte, akte niyathonnehseron, odyake raohehtageh ware, odyake jidehatehnhninontha:

6 Neoni ne wahondatenre ok hegen ronwadirihtwayesahtanyonhs ne ronwadinhase, oni wahonwadiryö.

7 Nok onen ne korahkowah wahotogense, wahohsense; ne wahonni yahshagohtkawe raonenhrinehsera, oni wahshagohtonde ne ronatswatön shagordiryohs nongweh, wahontshaahte jikanatayenton.

8 Ethone wahshagawenhahse ne shagonhase, Nen kaweyeanentaonh nonyenhskwa, nok ne ronweaneanyote ronaderayat yahki naah tehonathondagwanion roneronhatye.

9 Wasene, ne karihonni, agwegon aondaseweht ne negea-enh jiyohatenyon; jinigon eayetshighen, yetshিয়েanyoten jityagonyagon.

10 Eh kadi naaweane ronwadinhase yahonhtenti jiyohatenyon, wahshagodiyataroroke agwegon, jinahshagodighen, yegagwegon ronongwetakshen yongwetiyose; onen jiwadeanyote yatkarihwayerine.

11 ¶ Ne onen ne korahkowah wahatkensehah jiniyotyeren, eh kadi wahogenh yah ne tehenenontagon ne wadeanyote kanena;

12 Nok wahawenhahse raonha, Dyatenro, ohneane-eh kenh ihsese jiwadeanyote, oya niyoht ne sahkwennya? Neoni wahadeweanaton.

13 Ethone korahkowah wahshagawenhahse ne shag-onhase, Ehjisewanerenk ranontshageh rahshigeh, jityogarahonwe yahjiseniyatondi; ehnonwe yenhatstaren tahnawirok oni.

14 Igen eso ronwadihnongonne, nok nigonhah yondadyataragwen.

15 ¶ Ethone onen wahontkeanisa ne *Pharisees*, tehadiyatorehtha to-nahadiyere ne tahnwarihwawenryese jirohthare.

16 Neoni yahonwadinhane raonhageh ne raodityohkwa wahonne ne Herodian-haga, wahonniron, Tagwaweaniyo, yongwaderyentare nen nise togenhske-onweh, ne sherihonyeani jinayaweane ne Niyohne ne togenhske-onweh, nok oni okthiyagaweronhatye nongweh; nok oni yahtesherahkwa ne onhka ok nongweh.

17 Tagwahrerih kadi, Nahoten ise ihsehre? Yowey-enhston genh nahonwayon nogaryaksera ne *Cesar*, katon yahten?

18 Nok ne Yesus rottogense jirodirihwaneraakskon, wahrenon, ohneane-eh tagwanigonhrayeron, agwah sewarhwagonnatahkwa?

19 Tagwanatonhahse ne ogaryakshera ohwita. Neoni ehwaehewe enhskat penis jinigon.

20 Neoni wahshagawenhahse, Onhka na aoyatonni oni ne tewadeanagerahtontseronni?

21 Wahonwenhahse, *Cesar* raowenhk. Nok ethone wahshagawenhahse, Ehjijon ginyoh ne *Cesar* jinahoten raowenhk ne *Cesar*, oni nothenon ne Niyoh raowenhk yetshiyon ne Niyoh.

22 Ne onen ronathonde jinikaweanageh, wahodineh-rago, onen sahonwayatondi, eren sahonnehte.

23 ¶ Ok shaehniserat ehwahonneuwe raonhageh ne *Sadducees*, ne ne ronton yahthaonsayontketsko nenwadonhwenjokten, ne ronwarihwanontonni,

24 Wahonniron, Tagwaweaniyo, *Moses* rawen, Tokat rongweh enhrenheye, yahthenhowiryentage, ne ki nyatadegen-ah shodinyak ne rone-genha, ok kadi ne enganenhatatye jinayaweane.

25 Nonwa jiniyaweaonh nongyonhageh jatahk nadehondenhnonterahkwe: tyotyerenhton, wahonyage, nok wahrenheye, yatehodeweton, waodatenre kadi ne rone ne yatadegen-ah sahodinyage:

26 Eh kadi oneane naaweane, agare ne ahsenhadont, yagahewe ne jatahk nihadih.

27 Agare onenh oneane nagonhehtyen wagenheye niyaweaonh.

28 Ne kadi wahonni, tokat, nenwadonhwenjokten nen enjontketsko, kanikayen rayatagweniyo rone engenhake, ne jatahk nihadih rodinehkwe?

29 Yesus saharihwaserago wahrenron rononhageh, Sewarihwayatahtonhs, yahtesewaderyentare norihwado-genhti, yah oni ne raoshatstenhsera ne wiyoh tesewayenteri.

30 Igen jinenwadonhwenjokten yahthenskariwadeke nayagonyake, ayagonyagonne oni, aneayohton jiniyoht ne yeronhyagehronon ne Niyoh karonhyageh.

31 Ne gen nonwa yaorihwisate jinenjontketsko ne yagawenheyonhseron, yah ken nonwenton tesawaweanahnoton jinihodatih jonhageh ne Niyoh, rawen wahi,

32 Iih naah Niyoh ne *Abraham*, oni Iih Niyoh ne *Isaac*, oni Iih Niyoh ne *Jacob*? Niyoh yahten neane Niyoh ne yagawenheyonhseron, ok tenhnon ne ne yagonhe.

33 Ne onen kentyohtkwagwewon yagothonde ne kea-igenh, kowanen rodinehragwahs jinihorihotenh.

34 ¶ Nok ne onen ne *Pharisees* nen shahonronke onton wahonwaneanarahkwe thathontotade ne *Sadducees*, oksha ok wahontkeanissa.

35 Shayadat jinihadih, ne ne teharihwagenhas, wahorihwanondonse, yaweht okthihorihwaye-eron, wahrenron,

36 Tageweaniyo, kanikayen ne tkarihwagweniyo ne weani ne ahtyawenrahtseragon?

37 Yesus sahawenhahse, kengayen Ehtsenoronhkhwak ne Niyoh ne Royaner seryahsagwegon, sadonhetsheragwegon, seanonhtonyonhtseragwegon.

38 Ne ne gea-enh tyotyerenhton ne tkayadagweniyo.

39 Neoni ne takenihadont ne shateyoht, Shenoronhkhwak ne sahsyadat senonhsanekhaonh jinise nisadadenoronhkhwa najer.

40 Ne ne gea-enh tekariwageh ne weani tekaneren ne yoderihwagwarihsyon oni ne rodiyatadogenhti-ogon.

41 ¶ Ethone shegon ne *Pharisees* enhskahne ronakeanison, Yesus wahshagorihwanondonse rononha,

42 Wahrenron, Nahoten isewehre ne Keristus? onhka naah ronwayen-ah? Wahonniron, *David* royen-ah.

43 Raonha wahshagawenhahse, Oh kadi nyotyeren ne jiniyoht ne *David* ne kanigonhrageh raweanis Royaner? ratons,

44 Ne Royaner wahrenron wahawenhahse ne Iih agyaner, Satyen jikeweyendehtahkon, jiniyore engonyenawase ne ne yesahswense tensarahsitagenserahkwe.

45 Tokat nongen *David* enhawenhahse Sayaner, tokadi niyotyeren ahoyenhahageh?

46 Yah onhka nongweh teyagogwenyon ayagorihwaseragwen; yah joweanat wahontteron, oni othenon aonshonwatihwanondonse.

CHAP. XXIII.

Keristus wahshagehrongate nongwetagwegon neayerihwahsere ne yoyanere.

ETHONE wahshagodatih ne Yesus jinikentyohkwa, nok oni ne raonha raotyohkwa,

2 Wahrenron, Keaigenh *Scribes* oni *Pharisees* ehraditskwahronyon jiradyentatahkwa ne *Moses*:

3 Ne kadi, wagarihonni, oh kiod nahoten ronniron er-sonterene, wahi nensonterene ehkinenhsyere; nok tohsa shenageren ne raodiyotenhsera: igen nok ne rodihthare, yahteyaweh ehnahadiyere.

4 Igenh ne wahontagwariste ne yokste, yodahkondak oni yonigonhrakshat nayagogehte, eh enhadiren ne ongwehne ehnenhsageh; nok ne rononha yahtehadinonwese ahonoryaneron ne niyehsnonhsaah aahonte.

5 Nok agwegon ne raodiyotenhsera jinihonetyeren ne ok aoriwa ne ongweh ayontkahthoh: rodigowanaton ne karihwayatahtonhsara, oni rodigowanaton ne atste nonkadih oni ne raodinena,

6 Neoni radigonyenhstha ne ne gen kanaktenyon jirondekhonnyatha, oni aonhaah enegenh jirondyendahkwa ne *Synagogues*,

7 Neoni yondadenonwerons jiyontkehrondahkwa, ne nahonwadinatonhkwe, *Rabbi, Rabbi*.

8 Nok tohsa nise ayetshinatonhkwe *Rabbi*: asegenh shayadat ok ne jiseweawaniyoh, ne wahi ne Keristus; nok nise sewadadenonhkwe sewagwegon.

9 Tohsa onhka nongweh asheyenhahse Ragenih nonhwenjageh: enhskat se ok ne Yanihah, ne karonhyageh.

10 Tohsa oni nise ayesenhahse Tageweaniyo: igen shayadat se ok ne Yaweaniyoh, ne ne Keristus.

11 Ok tenhnon onhka ok enhakowanenhhake jinigon ne ne sewanhatsera engenlake.

12 Neoni onhka kiok radadenyahesen enthadokterinaah; nok ne ronidenhton raonha naah tehonwarenhsaronne.

13 ¶ Nok sewentenht jonha, *Scribes* oni *Pharisees*, sewarihwagonnatha! igen ise waehjinhotonse nongwehogan ne kayanertseragon ne karonhyageh: igen nise yathaesewadaweyate, yetshinonstadihs nodyake ne nyagodaweyaton.

14 Sewendenht jonha, *Scribes* oni *Pharisees*, sewarihwagonnaton! igen ise waetshigari ne yagodehreonse yodinonhsoton, neoni okhoriwagon sewadereanayendatserahs: ne kadi engarihonni kowanen sewayentasere en sewadejirendahkwe.

15 Sewendenht jonha, *Scribes* oni *Pharisees*, sewarih-wagonnaton! igen wesewatongohte kanyatarageh oni ehtiyogeh ayagaweron aonsayongerongwahse; nok jiniyore ehniyawenhs, watshijonyen tekenih teyohnanet nekshaah ne onehshon jiniyoht ne jonha.

16 Sewendenht, ne ne teyetshironweks jiniyetshiye-rase! ne ne sewatons, Onhka kiok enyondatih eayonde-weanayesahten ne *temple*, yah ne othenon; nok onhka kiok eayondeweanayesahten ojinegwar karistanoron ne *temple*, waondatkarothahse naah.

17 Sewendehserowanen, tesewaronwegan! kanikayen kakowanen, ne karistanoron, ne tens ne *temple* ne sewarihwayeani ne karistanoron nojinegwar?

18 Neoni, onhka kiok eayondeweanayesahte jiyeyatarastha, yah neane othenon; nok onhka kiok eayondeweanayesahte ji nonka ne yondataare ehagarake jiyeyatarastha, waagonontanhake neaneeh.

19 Sewentese, oni tesewaronwegan! igense nahoten oya agayatagweniyohake, ne yondatawi, netens ne yeyatarastha ne engonwayatateriste ne yondatawire?

20 Onhka, ok kadi, eayondatih ne yoweanahniron ji nonka ne jiyeyatarastha, jikahere oni, yagoweanahniron jinayeyere.

21 Neoni onhka ok ehayondeweanakshaten ne ononhsadogenhti *temple*, yagoweanahniron oni ji nonka raonha ne ehrenteron.

22 Neoni raonha ne ahadeweanakshaten ne karonhyageh, eh ki wahadeweanakshate raonaktageh ne Niyoh, ne ki wahoton ne renteron.

23 Sewendenht jonha, *Scribes* oni *Pharisees*, sewarih-wagonnatagwen! igen sewagaryahe nogaryaksera ne kahondagerase ogon-ah, neoni sewarihotarhon jiniyokste tenhnon ne kayatagweniyo ne ahtyawenrahtsera, nyoderihwagwarihsyon, kajenhayentne, kentenron, tewehtahkon; ne ne gea-enh ehnasewayeren, tohsa oni nodyake ahesewariwenron.

24 Tesewaronwegan yetshiyatendyehtonhatye! anyokt jiniyoht ne otskerongeha ne ojinonwa, nok se ne *Camel* karyotowanen watons neaneeh ahesewenhnekwane.

25 Sewendenht nise, *Scribes* oni *Pharisees*, sewarih-wagonnaton! igen sewaragewen ne *cup* ne atste nonkadih, oni oyashon nyerahkwa, ehniyoht nok se ne nagon nonkadih tewaderyahtikhonkseragwegon oni wahetken iyore.

26 Ise tesaronwegon *Pharisee*! seragewh tyotyerenhton nagon nonkadih ne *cup* oni nyerahkwa-ogon, nok oni atste nonkadih yoyanerek ohneane-eh.

27 Sewendenht jonha, *Scribes* oni *Pharisees*, sewarih-wagonnaton! igen jinisewayatodense jiniyoht ne kanonhsote yondadyadataastha nagwah kahsawetarhon, yonehragwaht sane yoyanere atste nonkadih, nok ne nagon kananon ongwehkenha ostyen, oni nagwah wahetkenhkwah.

28 Eh kadi nise agwah ehniyoht anyoh tkarihwayeri jinisewayatoden nongwehne, ken se kananon sewarihwayesahon oni sewarihwaneren.

29 Sewendenht jonha, *Scribes* oni *Pharisees*, sewarih-wagonnaton! ne wahonni ise yetshiseaeani jiradiyadat ne rodiyatadogenhtigenha, oni sewatyerongwen jiradiyadat ne ronaderihwagwarihsyonne,

30 Neoni sewatons, Tokat ethone aontayagyonhege shihonadehniseradehkwe ne ongwanihseragenha, yah onhte ehthayongwayatohteaonh yahthiyatayongweanonhton ne raodinegwenhsa ne rodiyatadogenhtigenha.

31 Ne wahonni ise sewarihwahnniraton jonhatseragon, ne ne jonha naah raodikshata ne shagonawenthon ne rodiyatadogenhtigenha.

32 Sewananh kadi jonha jiniwatenyenten ne yetshinibogongenha.

33 Jonha onyare, sewahnegwahsade kahnyarakshen! ohneneayaweane nahesewatongohte aonsesewanyageane wesewadejirendahkwe onehshon?

34 ¶ Ne wahonni, jadjakthoh, lih yakhenhane jonhageh ne rodiyatadogenhti, oni rodinigonhrowanense, oni *Scribes*: nok odyake eayetshiryo teayetshiyentanharon; odyake eayetshisohkwawishon sewanonhsagon ne *Synagogues*, eayetshihrewahte eayetsronhyagenhte jikanatayenton;

35 Ne wahonni jonhageh entewaseane jinigon nyoderihwagwarihsyon agonegwenhsagenha yodiyageaonh jiyonhwenjade, ethone tyodahsawen raonegwenhsagenha ne roderihwagwarihsyonne *Abel* jiniyore raonegwenhsagenha *Zacharias* royen-ah ne *Barachias*, ehnonweh nijisewaryo ok tyogenhke ne *temple* neane *altar* jiyerihwahseronnyatha.

36 Agwah wagwenhahse iseggeh, Agwegaon jinikariwageh tkagonte sayagorane ne ken kahnegwahsade.

37 O *Jerusalem, Jerusalem*, jonha yetshiyawenthon ne rodiyatadogenhtiogongenha, oni yetshineayoyen ne thonwadinhaon nisegeh, to-nigon tewagatonhwenjonihne nagwayatarorongenha ne sewakshataogongenha enhskahne, jiniyoht ne kitkit kanerahontshogon, nok yahtesewathondaton!

38 Jadkahthoh, jisewanonhsoton onen sonderihsi tkagonte naawen.

39 Igen wagwenhahse jonha, Yahnonwenton thaaskwaddkahthoh jinenwe, jiniyore enshiron, Ronendont raonha ne tare raohseanagon ne Royaner.

CHAP. XXIV.

Keristus wahshagotogaten sewaderihsyonhe ne ononhsadogenhtigowah.

NEONI Yesus sahayageane, eren sarehte ne jikanonhsode ne *temple*: neoni raotyohkwa ehwahonnewe raonhageh, ne nahonwanatonhahse jiyagononhsosni ne *temple*.

2 Neoni Yesus wahshagawenhahse, Yah kenh tsewadkahthohs agwegaon negea-enh jinikariwageh? Agwah lih wagwenhahse, Keaneayaweane yah na skaheayat thagenhake, ne yahten thaontayonsenhtane.

3 ¶ Neoni jirenteron jiyononte ne *Olives*, ne raotyohkwa ehwahonnewe raonhageh adahsehtongeh, wahoniron, Tagwahrorih, katkeh negen ehneayaweane; nahoten oni enwatanyendenston ne onen tendehse, nok oni onen enwadonhwenjokten?

4 Neoni Yesus saharihwaserago rononhageh, Sewanigonrarak tohsa onhka nongweh yesanigonrhaten.

5 Igen yotkate ne gen jineayaweane entyen ne ne lih aksheanagon, eayontonne, lih ne Keristus; eayetshinigonrhaten kentyohkowanen.

6 Neoni ensewaronke aderiyohsera, neoni waderiyohserakshense: tohsa tesewanigonrharen: igen tkagonte se ehniyawenhsera, nok arekho jiniyewadokten.

7 Igen niyagaonhwenjageh teayagorihwarhese kayanertserayenton, korahkowatshon teagarihwarheseron: neoni enganhratarine, adonhkaryagon, teayaonhwenjishonhkwanyon, okthiyonhwenjagwegon.

8 Agwegon ne ne gea-enh jientewadahsawen onigonhrakshatane.

9 Ethone tkagonte teayetshiyaderyahtikhonne, eyetshiyawenthoh, yetshihswenhsera agaonhwenjagwegon ne ne lih agerihonnyahsera.

10 Nen tenhnon yawetowanen agenron eayonton, teayondadenigonrhatanyonse, teayondadatswenhseron ne ongweh.

11 Nen tenhnon ne nonowenta eayetshirihowanahten, enhonwadinageren rodiyatadogenhtigenha, kanigonrhatenhserowanen jinensewayatawen.

12 Ne engarihonne ne karihwaneraakshera ensewane-renste, ne jiniyenoronhkhwa nodyake ensewawistohtahkwe.

13 Nok raonha onhka ok yatenharihohsere, ne shahayadat enhonwayatago.

14 Ne kadi negea-enh orihwadogenhti ne kayanertsera engarihowanahton onhwenjagwegon ne kadi wahonni eayagoderyentarake, niyadejonhwenjageh; ethone onen thoha engagwite nenwadonhwenjokten enwawe.

15 Ne kadi, onen, nen ensewadkahthoh kahetkenhsera kayese watonhsere, jiniyehogen ne royatadogenhti *Daniel*, ne ne gea-enh kahetkenhsera ehengatage aonhwenjadogenhtigeh, (onhka kiok raweanahnoton, raronk,)

16 Nen ginyoh jinigon ne yeteron *Judea* ken rontegwaht jiyonontowanense:

17 Raonha onhka ok kanonhsageh yahentskwarageh tohsa ratsnenhte othenon yaonsahago raononhsagon:

18 Yahten oni raonha ne kahehtageh yahreseke taontahahkete yataonsarahkwe raonena.

19 Neoni yagotenht ne yeneron, nok oni ne yonstarontha, nethone wehniseratenyon!

20 Nok jadereanayen tejadeanatonk nen ehneayaweane ne yah gohserageh thagenhake, yah oni thaya-wendadogenhtonhake:

21 Igen onen tenhnon kowanen waagoderonhyenhten jiyagonhe, ne ne yahnonwenton ehtedyaweaoonh jidyodahsawe shiyonhwenjade jiniyore nonwa, yah oni nonwenton oya ehthiyaonsayaweane jinenwe.

22 Neoni ethone enwehniseratenyonke tokat yahthayonsonhakha, yahohtahowahroten thaontongohte: ne ok ne yondadyataragwen engarihonni ne ehwehniseratenyon nenjonsonhah.

23 Ne ethone onhka ok nongwe enhyenhahse, Sadkahtho, Keristus ken renteron, tohsa kasenehtahk.

24 Igen keaneayaweane tayetasere eayairon Iih ne Keristus, ne nonowenta; onowenta oni *prophets*, eso yotyatenyon jinenhontyere; nen ki yengarihwageanyate tokat nongenh aonton, enhonwadinigonrhaten ne yondadyataragwen.

55 Jadkahthoh, arekho ehthiyaweaoonh nok Iih gwahrorih.

26 Ne wahonni tokat nongenh eayesenahse, Sadkahthoh, eh wahi renteron jo ok thihaonhaah ok keanonwe thirese; tohsa eh yahase: Sadkahthoh, eh wahi renteron adahsehtongeh jitkanakte; tohsa kajisenehtahk.

27 Igen jiniyoht ne teweaniregarahon jitkarahkwinegens, entkayenhtahkwe yateayoyake jiyatewatsothos; etho oneane neayohton jinenrawe ne Ronwayen nongweh.

28 Igen ka ok nonweh engayendake noyeronta-genha, ehnonweh engontkeanisa otonyon.

29 ¶ Yogondatyē kadi ne nen ohnagengeh shahonaderonhyenhten wehniseratenyonhkwe onen entyogarahwe ne karahkwa, oni ehniida yahthenjohswathege, oni ojistohkhogon entewaseane ne karonhyageh, oneane kashatstenhsera ne karonhyageh tenwatkarenron:

30 Neoni ethone tkagonte waogentane jinahoten enwatenyendenston ne Ronwayen nongweh etho karonhyageh: onen ethone ne nongwehogan niyadeyagaonhwenjageh nonhwenjageh eayagonigonranen, ethone onen enhonwagen ne Ronwayen nongweh otshatagon enthayenhhtahkwe entharihwenha kashatstenhsera oni onwesenhtak.

31 Neoni onen endehshagonhane raoronhyagehronon yoragareni kahunrawats eayoragarehre; ethone eayagoyataroroke yondadyataragwen jitengawerahkwe kayeri ni kawerageh, jiyoderonyotanihon agwegon.

32 ¶ Nonwa sewadaderihonyen ne tekarihwagenwah-ton ne jogahrehtese karonta: Wahi notenhadonniah, entkanerahtareke, igen yoderyentare ok hetho nagenha:

33 Eh kadi niyoht jonha, ne onen ensewadkahthoh agwegon jiniyotyeren, sewaderyentarak onen ok hetho, onense jikanhogaronte.

34 Agwah wagwenhahse jonga, Keaigenh kahnegwahsade yahthayontongohte, nyare ne keaigen orihwagwegon ehneayaweane.

35 Karonhyageh oni onhwenjageh waderihongohte neane-eh, nok ne ageweanaogon yahteyaweht ne yahehthayawenhsera.

36 ¶ Nok ne ehwehniserade oni ne *hour* yah onhka teyagoderyentare nongweh, yahten, yah oni ne karonhyagehronon ne karonhyageh, ne ok ne Ranihah roderientare.

37 Igen jiniyoht shihodehniseratenyonhkwe ne *Noe* jiniyaweaonh, eh kadi are neayaweane ne onen tentre ne Ronwayen nongweh.

38 Igen jiniyoht ne shiwehniseratenyon ne arekho shiyaonhwenjo-onh, ehniyohtonne tehontskahonyon radihnegirha, rodinyakhons rondeanyotonyons tyotkon, jiniyore oneane *Noe* nen wahadita ne kahunwagon,

39 Yahtehonnehre, onen genh waonhwenjo-onne nease aonderihwihewe eren onen shohawihton; eh kadi are onwa reayaweane ne Ronwayen nongweh nonen tentre.

40 Ethone tehniyahshè kahehtageh yenhneseke: enhskat enthonwayena, nok enhskat enhodatenre.

41 Tegeniyahshe odinhehtyen engenitheseronniheke ; enhskat engonwayena, nok enhskat enyodatenre.

42 ¶ Jatyehwatan kadi ; igen yahtesewaderyentare katkeh kanonweh ne *hour* ne Ehjisewayaner onen entre.

43 Jaderyentarak keaigenh, tokat ne rongwetiyohe ne rongwe rononhsote ahoderyentarake katkeh naayonwe nahonwanonhskari, tkagonte ahonigonraren, yah oni thayagogwenyon ayagohetkenhton jirononhsote.

44 Ne kadi wahonni oni nise sewarharek sewatshe-ronnyahkwenthohsek : igen ne enwadeke ne *hour* yah-tesewaderyentare ok na ne Ronwayen nongweh entre.

45 Onhka kadi negea-enh yonttokha ne yondadenhase ; igen wahi ne raoyaneta shagoyataragwen ne rarihwagwatagwas ne raononhsagon, nenhshagaon neayeke watogen wahi nonen eayondadenonte ?

46 Rodahskats na ne ronwanhase, onhka ok ne raoyaneta, jinensrawe, enhatyerok yoyanere jinihotyeren.

47 Agwah wagwenhahse, Ne na enhogowanahte enhanigonra rake jinihojen.

48 Nok tokat keaigenh kanhatserakshen enhatonheke raonhatseragon, yah wahi oksha ok thataontare ne royaner ;

49 Neoni keanenhayere enthadahsawen wahshagoyesahte ne shatehonwadinhase, oni skahne enhondekhonni enhadihnegira ne radihnekagastha ;

50 Ne royaner ne shagonhase ensrawe enwehni sera-deke yahotheron thenhorhareke, oni ethone enwadeke ne *hour* ne ne tenhotyerenhji,

51 Ne kadi tenshoyake enwahton-onweh, eh enrehte shagat yenhonton ne rodirihwayesahton : ehneayaweane tehonhsenthohsere tenhodinawiroke oni tenhonagaranye.

CHAP. XXV.

Tekarihwagenwahton ne oyeri nigondi ne yahtegondinakhwayenteri.

ETHONE jiniyoht ne kayanertseragon ne karonhyageh thoha teskyaderihwatyeren ne oyeri nigondi kondiwinon, watkondihkwe ohahsera, oni wagonhtenti yagonterane ase ronyagon.

2 Ne kadi wisk nigondi gonttokha, wisk oni nyoditeh.

3 Ne kadi ne yoditeh watkondihkwe naonawenhk yehahserahrahkwa, nok yahteyodiha ne keayeh:

4 Nok ne gonttokha yagondihawe ne keayeh kehratne naodihogata.

5 Jinahe ne yagonnyagon waondorishen oni gwegosenhtarane oni waagotawe.

6 Neoni ahsonthen tontayagohenrechte, Sewadkahthoh, yagonnyagon tayen, waas dejateratane.

7 Ethone agwegon ne kondiwinon watkonditane, wagondigwatago naodihahsera yatenhonwaterate.

8 Neoni ne yoditeh wagonnenhahse ne gonttokha, Tagweayenon; waongwaswase ne teyongwaswathetagon.

9 Nok ne gonttokha wagondirihwaserago, wagonniron, Yahehtekarihoten; onwa o-niih eayongwaswahse nigonha ok yongwayen; senha yoweyenhston ehyahsewa jithondenhninons, sewadatninons nissa.

10 Jinahe yegondigonte yodihnionron, onon ne ronnyakhe warawe; oni jinigon ne yagotseronnyahkwenthon yagondaweyate jityagonnyagon; oni jikanhogaronte onen sayenhoton.

11 Ohnagengeh onen oneane-eh wagonnewe nodyake kondiwinon, gonton, Sayaner, Sayaner, tagwanhotongwas oni niih.

12 Nok waharihwaserago wahrenron, Agwah Iih wagenhahse, Yahtegwayenteri.

13 Sewadeanigonraren, ne garihonni, igen wahi yah-tesewaderyentare ka-niwehniserade *hour* oni, ne onen tentre ne Ronwayen nongweh.

14 ¶ Igen ne kayanertseragon ne karonhyageh jiniyoht ne rongweh tehotawenrehatye inonh tyenageronyon, ne onen yahshagononke ne shagonhase-ogon, yahahtkawe ne raowenhshonhah enhontsteriste.

15 Neoni shayadat yahawen wisk ne kahwistowanense, oya shayadat tekeni, neane-eh oni oya shayadat enhskat neane-eh; yahawen niyadehadi ehnaawen ne tkaweaniyo jiniyonttokhatseroten; ethone onen nihoh-tentyon wathatawenryehsa.

16 Ethone ne onen ne royena ne wisk nigon ne kahwistowanense onen wathanonwayenhte, watyonaneta jinonsahago.

17 Neoni ehnaaweane ne tekenih tehojena, watyona-netane ontkwenyete.

18 Nok onen ne enhskat royena wahatagwate onhwenjagon, wahahsehte ne royaner raohwista.

19 Ohnagengeh wahonnise jinahe neane royaner ne raonhatsera nen sarawe, onen entharade neahadirihiwagwatago.

20 Ne onen ne royena ne wisk nigon ehwarawe, shahawi ne wisk nigon oni jinihogwen, wahrenron, Sayaner, negeane teskwawi wisk nikahwistageh; sadkahthoh, wisk nigon wakkweni ehnaakko.

21 Royaner wahawenhahse raonha, Yoyanere jinisatyeren, agwah tisehtahkon: wahsyerite niyorihiwaah wahsatsteriste, Nen kadi nonwa engongowanahte senha yorihowanen ensatsteriste: yasadaweyat jiyenhsadonharen ne ne sayaneta.

22 Raonha oni ne royena teyoriwageh ehwarawe wahrenron, Sayaner, teskwawi tekenih yorihowanen: sadkahthoh, tekenih ontkweni wagago thikade ne teskwawi.

23 Ne Royaner wahawenhahse raonha, Yoyanere jinahsyere, agwah tisehtahkon: niyorihiwaah gonrihontani, Nen kadi nonwa wagongowanahte yorihowanen enhsatsteriste: sadaweyat ahsadonharen ne ne yayanerhne.

24 Nen are neane thowi royena joriwat ehwarawe wahrenron, Sayaner, gonyenteri sarihwahniron nongweh, enhsyake jinonweh ne yahtesayenthon, enseroroke jinonwe ne yahtesarennyaton:

25 Neoni oksha shiwakteronse, oni wagahtenti wahahsehte ne sahwista onhwenjagon; sadkahthoh, ehkayen ne sawenhk.

26 Ne Raoyaneta saharihwaserago wahrenron ne raonhageh, Sarihwaneraakskon entorahsera gonhase, sade-ryentare engyake jinonweh yahtewagyenthon, oni engeroroke jinonwe ne yahtewagarennyaton;

27 Ken wahhi, nahesayeren, ehyahe sayendake nakwista jinonweh natehaditenyese, ne nen shonsagewe lih aonsongyenake nagwawenhk oni jinigon ayodehyaron.

28 Ehtsehkawah, kadi, ne kahwistowanen ne rahawe, oni yahahtshen ne ne rahawahkwe ne oyeri niyoriwageh nyorihowanense.

29 Igen niyadeyagon ne yahawahkwe enjondaton naah, ne wahonni eayawetowanha enhayena: nok kengayen enshonwahkwa ne yahse tehawahkwe, nok oni nok shihawahkwe.

30 Neoni isi yenhonwayatondi ne yahtethorihwayeritonh ronwanhase jinonweh tyogarahshonweh: ji non yenwatsjitogo oni teayagonawiroke.

31 ¶ Ne onen ne Ronwayen nongweh ne onen tka-gonte tare enthagwegonhatye raonwesenhtak, oni agwegon agoyatadogenhti karonhyagehronon enthonne, nen tenhnon etho entheanitskwaren raonwesenhtseragon:

32 Neoni raohenton eayegeanyatane eayontkeanissa jiniyadeyonthwenjageh; neoni *one* tenhshagokhahsi inon teayonterate, jiniyoht tagonwadikhahsi teyodinagaronton-ah nok kondiyatagerase:

33 Ehnokkadi engondigeanyatane teyodinagaronton-ah jiraweyendehtahkon, nok ne kondiyatagerase shanegwadih.

34 Ethone ne Korahkowah enshagawenhahse ne jinonkadiah raweyendehtahkon rasnongeh, Karo kaseneht yetshiyadaderiston ne Ragenihnehah, jadaweyat kayanertseragon shondonhwenjadahsawen thonaktahseronnyahkwenthon:

35 Igen shigatonhkaryakskwe, tagwanonten; Shiwagenyatathenskwe, tagwahnekanonten; Shiwagonhwenjaya, tagwayatinyonton:

36 Yahtewagenenayen, tagwarawi: Wagenonhwaktanihahkwe, tagwatkense: genaskwa shonton, tagwatkense.

37 Ethone nyagoderihwagwarihsyon enjerihwaserago, eayairon, Sayaner, katkeh shagwadkahthoh sadonhkaryakskwe, wagwanonte? katkeh oni sanyatathenskwe, nok wagwahnekanonte?

38 Katkeh shagwadkahthoh sonhwenjaya, wagwayatinyonte? sawaseron, oni wagwarahse?

39 Oni katkeh shagwadkahthoh sanonhwaktanih, shisenaskwa, oni yegwatkense?

40 Ne Korahkowah enharihwaserago rononhageh enhenron, Agwah Iih wagwenhahse, Ne ne jiniyetshiyatyerase ne jeyadat ne ne keaniyehosthon ne jinigon kahe-nonhkwe, ehse nisewayere niihne.

41 Ethone kense nenshagoyerase ne rononha ne shanegwadih, eren seneht yetshiyadewendehton, jinonkadiah tyotekha jiniyenhenwe, gonwadiseronnyeani nonehshonhronon jinihotyohkwa.

42 Igen shigadonhkaryakskwe, yahteskwanonten: Wagenyatathenskwe, yahteskwanwatanawenhthon:

43 Agonhwenjaya, yahteskwayatinyonton: agwaseron, yahteskwarawi; wagenonhwaktanih, genaskwa shonton, yahteskwatkenhsehahkwe.

44 Ethone are ne rononha enhshadirihwaserago, enhonniron, Sayaner, katkeh shagwageh sadonhkaryaks, oni sanyatathense, oni sonhwenjaya, oni sawaseron, oni senaskwa, nok yahteyongwatsteriston?

45 Ethone shashagorihwaseragwahse, wahrenron, Agwah, Iih wagwenhahse, Ne ne jiniyetshiyerase yahothennon ne ne enhskat ne yeyosthon ne jinigon ne khenonhkwe, yahtehteskwayerase niih.

46 Ne kadi jiniyagon eren eayenhte jinonkadiah jiniyenhenwe wakhehrewahte; nok yagoderihwagwarihsyon keaniyenheayen jiyeayagonhe jiniyenhenwe.

CHAP. XXVI.

Ne ne radihihwagwatagwas ronwarihwahretsteanih Kestus.

NEONI ne onen shontongohte, ne onen Yesus shahaweyeanentane agwegon nenshiyahrenron, nen wahshagawenhahse ne raotyohkwa,

2 Sewaderyentare wahi tekeni-thenwata ohnagen ehnonweh niwadeanyote enegen nenwatongohte, (*passover*), ne kadi ne Ronwayen nongweh ehnonweh natenhonwanigonhrasere neonen tenhonwayentanharen.

3 Ethone onen wahontkeanissa agwah radigwegon radijihenhstajihkowa, oni ne *scribes*, oni ne thodikstenhase ronongwehogan, jinonweh nihononhsotegowah rayatagweniyo rajihenhstajihkowa, ne raohseana *Caiaphas*,

4 Ehnonweh nahadirihwissa jineayaweane neahon wayena Yesus enganigonrhateani, nentenhnon enhonwaryo.

5 Nok odyake ronton, Tohsa ne wehniserade ne wa-deanyote, onwa nigen nongwehohon teayongwarihwatiha enwatsharogo.

6 ¶ Nonwa, onen Yesus *Bethany* yerese, jirononh-sote ne *Simon* ronhrare, (*leper*.)

7 Ehonwe raonhageh onhehtyen kahawi kahnatahk (*alabaster*) iwat ne naonhaah weayenanoron yogarowanen, ehwagarho raononjineh jirenteron tehontskahon.

8 Nok ji onen wahontkahtoh ne raotyohkwa, jiniyoht ne wahodinagonnyate, wahonniron, Nahoten yorihonte ken-ondeayenatyesahte?

9 Ne kea-igen ne keaye aontenhninonhake, eso yatay-onenon ayondatawi ne yagotenhtenyon.

10 Neane Yesus wahotogense, wahshagawenhahse rononha, Ohneane-eh watisewadadenigonrharen nagonhehtyen? yorihowanen wahi jinongwatyerase.

11 Igen tyotkon wahi sewayen ne yagotenht: nok niih yah tyotkon thensewayendake.

12 Igen negen jinagayere ongweayenarho gyerongeh, ne aoriwa ehmagayere igen yongyadata-anhe.

13 Agwah lih wagwenhahse nise, Kaakonweh neagenhatye orihwadogenhti eayonderihwahnoton jiyonhwenjade, engarake, ne kea-igen nonhehtyen jinongwatyerase, eayontroryathage jinityorihwayeriton ne aonha.

14 ¶ Ethone shayadat ne tekenihshadire, ronwayats *Judas Iscariot*, ken warehte jithaditeron radiyatagweniyo radijihenhstajih,

15 Neoni eh Yahshagawenhahse, To-naaskwagariakshe, nok lih yenhiyahtkawe isegeh? Neoni wathadirihonten ne raonha ahshen-niwahshen nikaristanorontserageh tahonyon nohwista.

16 Neoni ethone tahadahsawen onen ne ok naonsa-howeyenhsten nea-enhonigonrhaten.

17 ¶ Nonwa, tyodehniseradyerenhton jinihondeanyotha ne yahtewatthengwahton kanatarohk, ne raotyohkwa ehwahonnewe Yesus-neh, wahonniron, Ka onhte nonweh nasenaton nagwagwatagwahse ne a-ahseke ne enegen enwatongohhte (*passover*?)

18 Wahrenron, Wasene kanatagon rayatatogen rongweh, enjisenenhahse, Ne neh Shongeniweaniyo rawenhatye, Onen thohah yaongwaderihwihe: En kadi neayaweane engatsteriste ne (*passover*) sanonhsagon oni jiniwagityohkwa.

19 Ne kadi ehnaaweane ne Yesus jinahshagoyerase wahshagohongaryake ne raotyohkwa; wahadigwatago ne (*passover*.)

20 Ne onen kadi, jiwaogarahwe, onen wahontyen ne raotyohkwa.

21 Neoni ok ne jitehontskahon, wahrenron, Agwah Iih wagwenhahse jonha, enhskat ne jinijon tkagonte teyongenigonhraserane.

22 Neoni konwayats ne wahodinigonhranonwake, tahondahsawen niyadehadih wahonniron ne raonhageh, Sayaner, aten Iih?

23 Neoni saharihwaserago wahrenron, Ne ne enhskahne teyongenijenhton skakshatneh, ne shahayadat te-hagenigonhraserane.

24 Ne Ronwayen nongweh ehwarehte, jinikayeren jikahyaton jinenhoyatawen raonha: nok rotenht ne thorongweh ne ne wathonigonhraseren ne Ronwayen nongweh! senha yoyanere ne yahnonwenton thahonageraton.

25 Ethone *Judas*, ne negen wathonigonhraseren, wahawenhahse raonha, Tageweaniyo, aten Iih? Wahrenron, Etho jinahsiron.

26 ¶ Neoni, jitehontskahon, Yesus wathanatarahkwe, oni waha yatateriste, wathayakhon, wahshagaon ne raotyohkwa, oni wahrenron, Jenah, senek; ne nagyeronta.

27 Neoni watrakhwe ne *cup*, oni wahatonren, oni yashagaon rononha, wahrenron, Sewahnegira sewagwegon:

28 Nok kea-igen agenegwenhsa ne negen ne ase watenyendenbstahkon (*Testament*), wakrironh ne negen enskaragewahte eso karihwaneren.

29 Nok Iih wagwenhahse, Yahteyaweht aaknegira ayogondatye ne onenharatasehon, jiniyore ne enwehnise-radeke ne onen ne enseknegira nase enhskahne nise Ragenihnehah ne kayanertseragonh.

30 Neoni ne onen wathadiriwahkwe oreanase ethone wahadiyageane ken wahonnehte jityononte ne *Olives*.

31 Ethone rawen ne Yesus rononhageh, Agwegon negen yetshigenronnyane Iih ageriwa neayogarahwe: igen kahyatonh, Kea-nengyere tengeanityohgogwahte enhihrewahte ne ratsteristha ne teyodinakaronton-ah, oni ne teyodinakaronton-ah jinikentyohkwa okthiyatengonreni okthiwagwegon.

32 Ok ohnagen Iih enskadtetsko shegon, Iih ohenton enge ji-isewe ne *Galilee* nonkadiah.

33 *Peter* waharihwaserago wahrenron raonhagen, Etho sane agwegon nongweh enhonwadigenron ne engarihonni nise, yah ki niih nonwenton thiyaonkkenhraten.

34 Yesus wahrenron raonhageh, Agwah Iih wagon-yenhahse, Kea-igen nonwa enyogarahkwe, arekho ne kitkit thenyodadike, nise ahshen nenskwadonhiye.

35 *Peter* sahawenhahse, Etho enhskahne tendeniheye, shegon yahteyaweht agonyadonhiye nise. Radigwegon sane ne wahonniron ne raotyohkwa:

36 ¶ Ethone ehtahonnehte Yesus ronne jinonweh konwayats *Gethsemane*, wahshagawenhahse ne raotyohkwa, nyare kensewatyen, gadereanayen nyare.

37 Neoni wahoyatarago *Peter*, oni tekenih ne Shagoyeaogon-ah ne *Zebedee*, nentondahsawen jiniyoht ne ronigonhrakshense nagwah.

38 Etho wahrenron rononhageh, Agwadonhetsyoneh-ragwaht wagenigonhrakshense, ji oni giheyonhsere: ken sewenterondak, tewadeanigonraren.

39 Neoni yahahtenti isi nonweha, ehtageh wahatkonhsayen, wahadereanayen, raton, O Ragenih, tokat okthakanoron, wagatongohtas ne *cup* niih, etho sane nea-ne-eh, yah Iih tewageriwa, ne ok nise jinisanigonh-roten ehneayaweane.

40 Neoni ehsarawe jaditeron ne raotyohkwa wahshagoyadatshenri roditas, wahawenhahse ne *Peter*, Ohnawen! yah ken tesewagwenyon nahesewatyehwatage enhskat *hour* jinahe?

41 Sewadeanigonraren oni sewadereanayen, ne ne tohsa akte niyahesewanigonhrehnawe: Kanigonra orihwiyo ehnirihoten nok nowaron onetskha nea-neeh:

42 Raonha are eren sarehte ne tekenihadont, oni yahadereanayen, raton, O Ragenih; tokat negeane *cup* yahthatenwagatongohtanire, ji kiok ki na enknegira, jinenhsyere ehneayaweane.

43 Neoni ehsarawe jiraditeron roditas are, nen se yoxte ne radigahtegeh.

44 Nen are shashagoyatonti, eren sarehte, yonsahadereanayen are ne ahshenhadont, ok ne shagaweana jinahenron.

45 Ethone nare ehsarawe roatyohkwageh, wahshagawenhahse, shegon nisewentas, sewadorishen nonwa: onen Jadkahthoh, neane *hour* thohah kade, oni ne Ronwayen nongweh nen ok hetho ne tehonwanigonhrasere radihsnongeh ne rodirihiwaneraaxkon.

46 Tesenitan, tewahtenti: Jadkahthoh, nen ok etho ne tehagenigonhrasere niih.

47 ¶ Jinahe shegon nihohthare, jadkahthoh, *Judas*, ne nenhskat ne tekenih-shadire, nen tare, ronne tehonityohkondatye kentyohkowanen radihawi asharegowah kan-kyen-ogon, ehtahonnehte jithaditeron radiyatagweniyose oni thodikstenhase nongwehogan.

48 Nonwa, raonha ne ronigonrhateanire rawen enwayenyendenhston, Onhka kiok, rigwanyon, ne-eh ehjiseniyena.

49 Neoni okshaok ehwarawe Yesus-neh, wahrenron, Watkonnonweron, Tagewecaniyo; oni wahogwanyon.

50 Neoni Yesus wahawenhahse, Dyatenro, otnasatyerane ne gentho? Ethone nen wahonneuwe, onen yahonwayena ne Yesus ratshenen onton.

51 Neoni, jadkahthoh, shayadat ne Yesus ronnene, wahasharatago, wahoyenhte ne ronhase ne rajihenhstajihkowa yahohonhtyakte skadih.

52 Ethone ne Yesus wahawenhahse, Sasettan ne sashare: igen agwegon jinigon ne ronsharenhawe rontkaronnyane asharegowa rodiryohsere.

53 Isewehre ken nonwa yah genh thaakkweni ahiyadereanayenhahse ne Ragenihah, oni endeshagoreke ne isi nonwe ne tekeni-yawenre niyohnanet kentyohkowa nenhsera ne karonhyagehronon?

54 Nok to kadi neayaweane ne kahyatonhseradogenhtiogon engaweanayerine, wahi tkagonte-onweh?

55 Ok ne kade ne *hour* wahrenron ne Yesus jikentyohkowanen wahshagawenhahse, Eh ken nisewayere, jiniyoht ne yenenhskwas, sewahawinonhatye asharegowa oni yondadyenhtha jiwahskwayena? kense niyadeweh-niserageh enhskahne tewenteron gwarihonyeani jikanonhsotegowa, yah kadi neane teseweron shagwayena.

56 Nok agwegon ehnaaweane jiniyodatih norihwado-genhtiogon ne rodiyatadogenhtigenha ronadadihne tagayerite ehnaaweane. Ethone ne raotyohkwa agwegon wahonwayatondi wahontego.

57 ¶ Neoni jinihadi ne ronwayena ne Yesus ehwahonwayatenhawihthe jithenteron ne rakowanen *Caiaphas*, jinonwe nithonatkeanisson ne *scribes* oni thodikstenhase nongwehogan.

58 Nok *Peter*, wahohsere inon tenhnon tare jinonweh thanonhsotegowah ne rakowanen rajihenhstajih yahaweyate jiyononhsawenhte, ne ne tahaganerake jiyendawadokten.

59 Nonwa, ne radikowanense radijihenhstajih oni radikowanense nongwehogan, rodijenhayen onen wahonwarahse onowenta-ogon ne Yesus, ne wahonni ahonwaryo;

60 Nok yah onhka arekho: ethose, onen eso wahanweanowentase, arekho ki yaonderihwihewe. Ohnagengeh tehniyahshe wanewe onen ne ne engatogenhji enhonweanowenhten,

61 Neoni wahniron, Ken-igen rahetkenhskwa rawen, Iih wakkwenyon agenonhsarihsi jirononhsote (*Temple*) ne Niyoh, nok aonsagenonhsonni ahshen naonta aonsagenonhsissa.

62 Neoni rajihenhstajih kowah wahadyatagwarihsi, oni wahawenhahse, yahotheron tehsaton? serihwaserago nissa ohnyotyeren kense nonwa onen watisaderihwawenhege?

63 Neoni Yesus okthatehotode yahskaweanat. Neoni ne rajihenhstajihkowah wahodatih wahrenron raonhageh, Iih wagonyaderihoktahkon jironhe-onweh ne Niyoh, Nea nonwa tagwahreri gyaahsa ise genh ne *Keristus*, ne Niyoh Ronwayen.

64 Yesus sahenron raonhageh, Etho jinahsiron; etho sane neane, lih wagonyenhahse, Ohnagengeh ensehtsadhakthoh ne Ronwayen nongweh enhenterondake jiraweyendehtahkon rasnongeh oni kashatstenhsera, nen tentre otshatagon ne karonhyageh.

65 Ethone rajihenhstajihkowah waharajon ne raonena, wahrenron, Kea nonwa wahadatih waharihwanerakegowah; nahoten shagon isi nonweh yayerihwisake? Sewadkahthoh, nen nonwa sewathonde jinahayere.

66 Nahoten isewehre nise? Wahadirihwaserago wahonniron, renheye.

67 Ethone wahonweanitskeroserahwe ragonksne, oni wahonwayagwenrhtarho; ronwagonhrehkon ronwayenhtanyons,

68 Rontonyon, Tagwahroryanyon niihne, ise Keristus; onhka neane nahesaweyeanageani nonwa?

69 ¶ Nonwa *Peter* atste nonkadiah renteron jikanonhsote; kayataseah ehiwe jirenteron, wagenron, Ise wahi niseneskwe ne Yesus ne *Galilee*-haga.

70 Nok wahadonhiye ronathondenyon, wahrenron, yah tekyenteri nahoten saton.

71 Neoni, nens sahayageane jiyononhsote, oya kayatase wahotkahthoh irade, wagenron, Kea-irade rongweh neonne nineskwe ne Yesus ne *Nazareth*-haga.

72 Neoni shagon wahadonhiye agwah wahadeweahnirate wahrenron, yahtehiyenteri ne rongweh ne jiton.

73 Neoni kea-naheyah ohnagen oya ehire ehwathane, wahrenron *Peter*, Ise wahi iseneskwe: oya oni nihsewae-noten.

74 Nen tahadahsawen wahadeweanayesahtanyon, wahrenron, Yahotheron tehiyenteri ne rongweh ne jiton. Neoni yogondaty ne kitkit ondatih.

75 Neoni *Peter* yogondaty saharehyarane ne raoweana ne Yesus, jinahoten raweani, Arekho enhskat ne kitkit theayodadihake, nok ahshen nenskwadonhiyase. Neoni yahayageane, yahatstaren waganehragwahte.

CHAP. XXVII.

Keristus yahunwahtkawe raneren jirenteron Pilate.

NE onen jiwaorheane, agwegon ne radikowanenhse radijihenhstajih oni rodikstenhase nongwehohon onen wahonwajenhayen ne Yesus ne onen ahonwaryo.

2 Ne onen wahonwanerenke nok wahonwahsharine, ehyaonwanaskwewe jithenteron *Pontius Pilate* ne Rakorah.

3 ¶ Ethone *Judas*, ne tehonigonhrasere, nen wahadkahthoh onen wahonwadewendehte, ethone shadaderihwastanih, ehshahahewe ne ahshen-niwahshen nikaristanorontserageh jiraditeron ne radiyatagweniyose radijihenhstajih radikowanenhse oni,

4 Sahenron, Wagerihwanerake jiniwagyeren watakenigonhraseren ne ne kanegwenhsanoron. Neoni wahonwenhahse, Oh kadi ne henon niihne? ise ne saderyentare jinahsyere.

5 Neoni ehwahoti nohwista ononhsadogenhtigeh, eren warehte, oni yahadatnyaterenge.

6 Neoni ne radikowanenhse radijihenhstajih tonsahonnehkwe ne karistanoron, wahonniron, Yahteyoweyenhton nahetewateweyenton, igen yahatkene nonegwenhsa.

7 Nen wathadiyatorehte, onen wahonnonhwenjahni-nonte, jieayondadyadataasthageh nagaonhwenjayen.

8 Ne wahonni neh kahentayen rodinatongwen, Onegwenhsa kahentageh, nonwa shegon ne kenwehniserade.

9 (Nen yahonderihwihewe ehnaawen jinihodatih ne *Jeremy* royatadogenhti, rawen, Teshodihkwen ne ahshen-niwahshen nikaristanorontserageh, jinihayatanoronehkwe, ehnihodinatonehkwe ne ronwadiyea-genha ne Iseratt.

10 Ehnahadigaryake jiwahadihninon ne yetshetonnyatha kahentayen, ne ne Royaner jinihagyataragwen.)

11 ¶ Ne onen Yesus ehirade ohenton jirenteron ne Korah neoni ne korah wahorihwanondonse raonha, wahrenron, Ise genh naah ne korahkowah ne Jews-haga? Neoni Yesus wahrenron, Etho jinahsiron.

12 Neoni ji onen wahonwadonthonse jinahonwayere ne radijihenhtajihkowah oni radikowanenhse nok yahonthenon tehawen.

13 Ethone *Pilate* wahawenhahse, Yah ken tesathonde jiniyoriwageh wahesarihwahretsten notogeaonh?

14 Ne ne yahskaweanat tehorihwaseragwen; ne wahonni ne korah eso wahonehrago.

15 ¶ Ne ethone, jironadeanyote ne korah jinikarihoten shayadat ens wahohtkawe ne ranaskwa, onhka kiok tehonatonhwenjonni nongwehogan.

16 Neoni ethone ranaskwayen, raongwetanehragwaht ronwayats, *Barabbas*.

17 Ne kadi, onen enhskahne wahontkeanissa, *Pilate* wahshagawenhahse, Ka-nikayen isewehre aonsakheyahatkawe nisegeh? ne keaigenh *Barabbas*, nok Yesus, negeane Keristus ehjisewayats?

18 Igen roderyentare ne ok ne kanoshaonh aoriwa jironwayena.

19 ¶ Ne onen ji ehrenteron kajenhayentseragon jiyontyendahkwa ne rone tondenhane raonhageh, watonne, Tohsa othenon ahadewenharho nahawenhahse ne rode-rihwagwarihsyon ne rongweh: igen niih eso ongeronhyagenhte jinaawen ne kenwente kaserenhtagon adetsenhsera, ne aoriwa.

20 Nok thadiyatagweniyose oni radikowanenhse ronwadihrejaron jinikentyohkwa nahadirihwanonton *Barabbas* aonsahonwahtkawe, nok ne Yesus ahonwaryo.

21 Ne korah waharihwaserago wahrenron rononhageh, Ka-nikayen ne tekenih yenskwahtkawe? Wahonniron, *Barabbas*.

22 *Pilate* wahshagawenhahse, Oh kadi neane nenhiyere ne Yesus, ne ronwayats Keristus? Radigwegaon tahondatih wahonwenhahse, Tehonwayentanharen neane-eh.

23 Ne kadi ne korah wahrenron, Ohnyotyeren? Nahoten wahetken jinihotyeren? Ne ok hegen senha wahondeweanayentonwe, ronton, Tehonwayentanharen neane-eh.

24 ¶ Ne onen ne *Pilate* wahadkahthoh yahtehogwenyon ahoyatagenha, ne ok hegen tahondeweanahkwisron, ethone watrahkwe ohnekanohs, wahohsnonhsohare raodihenton jinikentyohkwa, raton, Ne lih agyatagate ne raonegwenhsageh igen roderihwagwarihsyon; Ise nissa jatsterist.

25 Ne onen wahadiriwaserago ongwetagwegon, wahonniron, Raonha raonegwenhsa iihne kayendat, nok oni nakhiyen-ogon-ah yongwaderihwayenhahse.

26 ¶ Ethone sahohtkawe *Barabbas* rononhageh: ne onen wahonwahsohkawawishon Yesus onen tenhnon yahonwahtkawe jinonweh yatenhonwayentanharon.

27 Ethone shodar ne korah raotyohkwa onen wahonwayena Yesus eh yahonwayathewe kanaktowaneaneh, onenh ehwahontkeanissa tenhnon ohshodarhagwegon.

28 Neoni wahadirihsi ne raonena, nentenhnon wahonwentyake jitagonhkwah ahshire.

29 Ne onen rodinhahseronni ohikta eanonwarore rononni, raononjineh waheren; oni ostyentane tahonyon rasnongeh jiraweyendehtahkon nonkadih, neoni tehonwanonhweronyon jiniyoht tahondontsothatage, ne ne kagonnaton, ronweani, Sanehragwaht, Korahkwah ne *Jews*-haga!

30 Neoni ronweanitskeroseras, wahonwahkhwa ne rahawe, wahonwayenhtanyon raononjineh.

31 Neoni nen ohnagen jironwagonnatha, nen sahonwentyahsi ne ahshire, ne sahonwadyatawite ne raonha raonena, onen wahonwahsharine jiyatenhonwayatanharon.

32 Neoni, ji onen wahadiyageane, ehwahonwayadatshenri rongweh ne *Cyrene*-haga, *Simon* ronwayats: tahonwea nonhtonse wahrennenhsaren ne tekayahsonte.

33 ¶ Ne onen yahonnewe jinonweh nikanaton konwayats *Golgotha*, ne nayairon, jinonweh ohstawenserake,

34 Ne wahonwanonte teyohnekahyojis ne ahahnegira tekayahston otshate: ne ji onen wahatkense, yahtehohnegiren.

35 Neoni wathonwayentanharon, wathadikhahsyongo ne raonena, wahadiyenthohji nonhka agowenhk enwaton: ne kadi ne yahaweanayerine jinihodatih royatadogenhtigenha, rawen, Wathadikhahsyongo nagenena rononha, nok oni wathadikhahsyongo nohenton wagadyatawiton.

36 Neoni, ehwahontyen, oni wahonnonna;

37 Neoni jiyehodenonjistate ehkahyaton kagonnaton ne ne waton, **NE NEGEA-ENH YESUS NE KORAHKOWAH NE JEWS-HAGA.**

38 Ethone oni tehniyahshe ninenhskwas enhskahne wathonwadiyentanharon; enhskat jiraweyendehtahkon, enhskat shanegwadih.

39 ¶ Neoni ne ehrontongohtha ronwatehatha, agwayatehonongarenron,

40 Neoni ronton, Ise genh ne ensenonhsarihsi ne ononhsadogenhti, nen tenhnon ensehsenonhsonni ahshen nenwada ensehtsa, to-kadi nonwa sadadyatagenha. Tokat ise ne Niyoh Ronwayen engenhake, kasatsnenht nonwa jidekayahsonte.

41 Eh oni nahadiyere radiyatagweniyose Radijihenhstajih ronwagonnatha radikowanenhse oni ne *Scribes* oni ne rodikstenhase, ronton,

42 Raonha shagoyatogenhas nodyake; nok ne raonha yahtahagweni ahadadyatagenha. Tokat raonha ne Korahkowah ne Iserathhaga, ginyoh tethatsnenht jidekayahsonte, ethone nen endehjitewehtahkwe.

43 Eh ken ronyahesen Niyohne; how nissa royatagenha nonwa, tokat togenhske enhononhweseke igen raton wahi, lih ne Niyoh ronwayen.

44 Ken oni ne ninenhskwas, ne enskahne wathonwadiyentanharon ne raonha, etho ok oneane thaaweane ok ne shagat wathonwenhahse.

45 Nonwa, ne yahyakhadont *hour*, tayogarahwe okthiyonhwenjagwegon jiniyore ne tyohtonhadont *hour*.

46 Neoni, etho onhteh ne tyohtonhadont *hour*, Yesus wathahsenthoh rowendeht, raton, *Eli, Eli, lama sabachthani?* ne nayairon, Ageniyoh, Ageniyoh, ohneane waskyatanigonrhen?

47 Odyake neh yegeanyate, nen ronathonde jinahoten wahrenron, ronten, Kea-igenh rongweh yehoronhyenha anyoh ne *Elias*.

48 Neoni okshaok shayadat watharahtade, yahatrahkwe watneginyontha, ne wahanahne teyohnekahyojis, ehwahanyonten ohstyentanegeh, ne nahohnekanonte.

49 Odyake ronton, Tohsa; tetewaganerak tenhnissa ahshighen itre ne *Elias* naonsahoyatago raonha.

50 ¶ Yesus, ne onen are tonsahohenrechte rowendeht, onen wahrenheye.

51 Neoni, sadkahthoh, tekanhotahkon ne ononhsadogenhti watewatoren enegen tondahsawen yahokten ehtageh; wahtyaonwenjishonhkwe, oni teyotstenrenyonthkwe watkarine,

52 Neoni jiyeyatataryon ondenhotongo; eso noyerontagenha ne tyagawehtahkonne yoditaskwe, sayontket-sko,

53 Neoni sayeyageane jiyeyatataryon nen shishotket-skwen, neoni ehniyehonenon O natadogenhtigeh, shonwadigen ne kentyohkowanen.

54 Nonwa ne onen ne *Centurion*, oni jinigon ne ronne ronwanigonrare ne Yesus, jiwahontkahthoh watyaonhwenjishonhkwe, ji oni naawenhseron, eso tahondonneke, rontonyon, Tkagonte togenhske ne ne Niyoh Ronwayen.

55 Neoni tyonathonwisen eso gondi ehkonneskwe, tegondiganere inon niyore tkondigeanyate, ne shagondiya dat ne ronwahsere ne Yesus *Galilee* nonkadiah shontahayenhtahkwe, ne ne ronwaweanarahwahkwe ne raonha:

56 Enhskat ne gonnene naah ne *Mary Magdalene*, oni oya *Mary* ronistenha ne *James* oni *Joses*, oni rodinistenhah ne *Zebedee* shagoyen-ogon-ah.

57 ¶ Ne onen jiwaogarahwe, ehwarawe rotkanonni rongweh ne ne *Arimathea*-haga, raohseana *Joseph*, ne oneane Yesus raotyohkwa:

58 Raonha ehwarehte jithenteron ne *Pilate*, yahonegen ne raoyeronta ne Yesus. Ethone *Pilate* yahshagawenhahse thonwayon ne raoyeronta.

59 Ne, onen ne *Joseph* wahayena noyeronta, wabahwenonni nagwah kanyatariyo.

60 Neoni ehayahayen nagwah raonha raowenhk ase oni jiyeyendahkwa noyeronta, agwah ne ne kagwatagwen otstenhrogon: nentenhnon kentstenhrowanen rodinhotongwen jirayadat, nen eren shonenonhton.

61 Neoni kenh-nigondi *Mary Magdalene*, nen oya *Mary*, ehkonditeron teyotogenhton jirayadat.

62 ¶ Nonwa, ji oya sayorheane ne ken wenteh rontsheronni, ne radijihenstajihkowah oni *Pharisees* ehya-hontkeanissa jirenteron ne *Pilate*,

63 Wahonniron, Tagwaweaniyo, yagweyahre thoi-genh ranigonrhatkagowah jinihoyeren, ne shegon shihronhe, rawen, Keaneayaweane nohnagen ahshenhadont niwehniserageh enskadketsko.

64 Ne kadi wahonni keaniyawen, yononna jirayadat, orihwiyo kadi enwaton igen ne yahehtheayawenhserie ne ahshenhadont niwehniserageh ne raotyohkwa ahsontheane enthonne enshadinenhsko, nok enhonniron ongwehegongeh, Shotketskwen jirawenheyonhne: senha kadi ne kayatahtonhsara jinayaweane jiniyonkhiyadadontha jiniyoht ne tyotyerenhton.

65 *Pilate* wahshagawenhahse, Sewayen wahi ne yonnonnha; eren saseweht, jinasewagweni jadeanigonraren.

66 Onen ehwahonnehte onen wahadinonna ji raydat, agwah kahnehtohraragon jitegondeneayarigon, nen tenhnon ehraditeron radinonhne.

CHAP. XXVIII.

Keristus shotketskwen jiwaherihowanakte karonhyagehronon.

JI ne ondokten ehniseradogenhti, onen ne sondahsawen ne entewadehniseratyerenhte ne sewendat, ehwagonnewe *Mary Magdalene*, nok oni noya *Mary*, gontkensere jirayadat.

2 Neoni, sadkahthoh, jinaawen yonehragwaht watyaonhwenjishonhkwe: igen ne raoronhyagehronon ne Royaner tayeyenhtahkwe karonhyageh, eren waganea-yagwite jikanhogaronte, ehonnitskwaren.

3 Ehnihagonhsoten jiniyoht teweaniregarahon, nok ne raonena kenragenh jiniyoht oniyehste:

4 Neoni jinahodihteronne ne radinigonrare wahodiya-dishonhkwe, ana-aweane waaiheye nongweh.

5 Neoni karonhyagehronon wagoweanarane wagenron nodinhehtyengeh, Tohsa sewahteronn; igen wagadery-entare sewesaks ne Yesus, tehonwayentanhare igenh.

6 Yah kenh teshenteron; asegenh onen shotketskwen, jinihawen. Kaseneh, sewadkahtoh jinonweh nihaya-tyonnihkwe ne Royaner:

7 Neoni wasene yohsnoren yaetshihrori ne raotyokwa nen shotketskwen jirawenahayonhne; oni jadkahtoh, ohenton enre ne nen *Galilee* yensene; ehnonweh nenh-jisewagen: sewathonde Iih wagwahrori.

8 Neoni oksha ok sagonhtenti yohsnore yodihteronssere oni kowanen yonadonhahratye, oni gondidakhenontye ne yaonsagondirihwihewe jithaditeron ne raotyohkwa.

9 Neoni jiniyonsagene jisahonwadihroryane, ne raot-yohkwa, wagyadkahtoh, Yesus wathonterane, wahren-ron, Agwewon watkwanonweron. Neoni ehtondagene, wageniyena rahsigeh, wahonweanidenhtase.

10 Ethone Yesus wahshagawenhahse nononha, Tohsa senihteronn: wasene yetshihrori ne yetshinonhkwe ken yeayen *Galilee*, ehnonweh nenjongwadkahtoh niih.

11 ¶ Nonwa, ne onen yonahtentyonhatye, wagyad-kahtoh, odyake ne radinonnahkwe kanatowaneane wa-honnewe, wahshagodinatonhahse ne radiyatagweniyose radijihenhtajih jinaawenhseron.

12 Neoni ne onen wahontkeanissa nok oni ne rodik-stenhase, nathadiyatorehte, eso nohwista wahonwenon ne Shodar,

13 Ronton, Keagayen ensewenron, ne raotyohkwa ehonhte rodi ahsontheane, ethone nijonkhinenhskwen jinahe waongwentawe.

14 Neoni neayaweane negea-enh ne korahne yenhon-hontogate, iih neane eayagwarihwagwatago, ne ne yah-teyaweht ahjsisewarahse nise.

15 Eh kadi na-aweane wahadiyena nohwista, ehna-hadiyere jinahonwadirihonyen: ne kadi jinahadiyere eh wahi niyoht jiwaherihowanahte ne *Jews*-hagageh shegon nonwa ne kenwehniserade.

16 ¶ Ethone ne enhskat shadire ne raotyohkwa ken wahonnehte *Galilee*, jiyononte chyeeshagonatonni ne Yesus jinonweh.

17 Neoni ne onen shonsahonwagen, wahonweanidenhtase; nok odyake ok thatehodinigonrageh.

18 Neoni Yesus ehwarawe, wahshagawenhahse, wahrenron, Agwegon ne kashatstenhsera yongwawi ne karonhyageh oni nonhwenjageh.

19 Wasene, ne engarihonni, oni yetshirihonyen agahonhwenjagwegon, eayondatnegoserahwe ne rahseanagon ne Ranihah, neoni ne Ronwayen, neoni ne Ronighonyohston;

20 Yetshirihonyen yeayehewe kadi agwegon jioknahoten Iih wagwenhahse nise; oni, jadtakthoh, Iih wahi itewese tyotkon, nok oni jiniyenwadonhwenjokten entewesheke. Awent.

Kenthoh yodokte ne rohyaton Royatadogenhti *Matthew*.

Burgsd Co 1940

Ayer
oBS
345
.M64
1836

385

3d floor

AYER

~~Mohr~~

3

